

DIALOGVS,

De Imitatione Ciceroniana, aduersus

pro Christophoro Lon
golio,

VIRTUTE DVCE,



COMITE FORVNA.


LVGDVNI APVD SEB.
GRYPHIVM,

M. D. XXXV.

*Iste liber non est legi etiam deletis nomine sine fronte
I. Dominus*



T V S G V L I E L M O
S C A E V A E , S .



B E R R I M V M
ad te scribendi argu-
mentum dum undi-
quaque colligo , &
diutius,quàm spera-
bas,sileo,tuam forte
de meo in te amore
atq; singulari bene-
uolentia opinionem
mirum in modum
fallo,neque tardi aut

parum diligentis nomen non subeo : sed si quā istius
modi suspensionem tibi mea tam longa taciturnitate
commoui,diligentiam adhibebo, illam ut quam pri-
mum deleam, perficiamq; profecto , mei ut silentij
usuram crebritate posthac & copioso literarum ser-
mone cumulatè sarciam. Iam primùm rerum te mea-
rum certiozem factum uolo. Idib. Octobr. Lutetiam
ueni, nulla neque corporis offensione, neq; molestia.
Atq; quoniam id à me maxime expetere te suspicor,
ut quid agam, quantoq; otio studia mea & colam &
tuear,quàm familiarissimè scribam,hoc ipsum princi-
piò explanabo,tum, quid hic geratur, per me scies.

luti nouo amore incensus, literas amplectar. Plurima
& commentor, & scribo, quorum tibi expectationem
nullam antea comouebo, quam ea prestare me posse
sentiam. Dialogum de Imitatione Ciceroniana aduer
sus ~~_____~~ ad te mitto, quem Gryphio reddes.
Amabo te, illum quam castigatissime excudendum
cura, neque committe, ut tuum mihi officium in ea re
desit, quod nunquam defuit. Quae ~~_____~~, ut nus
men, colit, & Ciceroni antefert imperita triuialium
grammaticorum turba, uix in me conuiuijs abstinebit.
Senectute quoque penè desipientem senem, audaces
adolescentis conatus pro ueteri sua & perpetua scur
rilitate risurum non dubito. Sed scurræ risu facilius
nihil à nobis fertur, neque à silicernio detibus defecto
morsum asperiorē timemus. Atque qui me insolentiae
accusabunt, & conuiuijs obruent, ~~_____~~ quod
oppugnem, uideant hoc prius, quo ~~_____~~ modo,
ab insolentis, & maledici nomine tueantur, qui Cice
ronis existimationi illudere, qui Ciceronis imitationi
studentes insectari ausus est. Meis linguae Latinae com
mentarijs ex integro describendis horas uespertinas
tribuo, quos ad calendas, plurimum, Ianuarias conse
cero. Reliquum hyemis tempus in altero orationum &
epistolarum mearum uolumine augendo consumam.
Tanta non pollicerer, id nisi decreuisssem, docturum
me aliquando, quid sit cupide & studiose in literis uer
sari,

Commentarij lin
guae Latinae.

5.
fari, quid uel laborem pro nominis immortalitate sus-
ceperim, delictum per me morte odisse. In studiis sine ulla
interpellatione uersor, otioque tanto fruor, quantum
semper optaui, sperare uisus sum certe nunquam.
Unum est hoc mihi in praesentia & ab angoribus atque
solicitudinum concursu, & à fortunæ iniurijs
profugium, doctrina & literæ: quibus antea, dum
per otium licuit, usus sum semper, utar postea uel ne-
gotijs omnibus implicatus. Nimirum me ornare iam
coeperunt, & sempiternam mihi spondent famæ no-
minisque memoriam, quam ne quidem uel cum Crassi
opibus, uel cum Varronis thesauris, uel cum omni-
bus beatorum omnium delicijs commutem. In hoc
totus sum, ut me non solum uixisse, quod nobis cum
brutis commune est, sed uirtutis studiosum uixisse,
posteritas intelligat. Id quod qui ridebunt, & me in-
sanire arbitrabuntur, uoluptatibus secum interituris
liquecant, & fluxis bonis cumulentur, per me licet:
ego uirtutem suspiciam & colam, quæ nos tenebris
mortis eximit: eam unam perpetuo sequar, neque
ab illa, nisi extinctus, abducar. Verum quantum in li-
teris studio, labore, diligentiaque consequar, id omne
ad arbitrium tuum conferam, ut scripta nostra uel
comprimi iubeas, uel proferenda censeas, qui me ne-
que perpetuo iacere uelis, neque praemature studio-
rum fructu, & leuiori, quam certiori laude celebrari
cupias. Ego meum puto esse, dum fert ætas, otioque
abundantia poscit, omnia in literis animose conari, ea

tantum edere, quæ cum aliorum doctissimorum iudicio, tum tuo, sine assentatione comprobari intelligā. Immenſus iſte ſtudiorum amor uetat mehercule, pedem domo, tanquam literis alligatus, ne uſquam eſſeram. Quare factum eſt, tuum ut Aemilium nondum inuiſerim, tuas tantum literas ei reddendas curarim: neque Budæum, quod mihi forte uitio uerti poſſit, adhuc ſalutarim. Illum primo quoque tempore conueniam, huic operam meam omnem ſtadiumq̃, præſens breui deferam. Iam Lutetiæ acta rumoresq̃ expectas. Ad omnia igitur ſic habeto. Longum eſt, & ſcriptu difficile, quantam hic rerum perturbationem offendi. In uulgi ſermonibus aliud planè nihil, præter factas Chriſto à Lutheraniſ iniurias. Diſſipauit enim conuitioſa quædam in cultum Chriſtianum ſtulta iſta & gloriæ exitioſæ appetens natio, quæ inuidiam, qua hætenus laborauit, uehementius commouerunt. Itaque cum ex infima plebis fece, tum ex ampliffimo mercatorum ordine, erroris Lutherani ſuſpicionem perſtricti multi in carcerem coniecti ſunt. Iſtarum tragicædiarum ſpectatorem me præbeo, & aliorum partim uicem doleo caſumq̃ miſeror, partim ſtultitiā rideo, qui ſibi capitale periculum ridicula quadam pertinacia & intolerabili obſtinatione conſtant. Tu ad me de tuis rebus quàm creberrimè, & quàm uberrimè ſcribes, quando & mea, & aliena ad te tam accuratè perſcribo. Quantum officiũ ſuſtineas, & quantopere tibi elaborandum ſit, ut me expleas
 ſcri

scribendo, uidere te nisi existimarem, pluribus uerbis
 & rogarem, & obtestarer, desiderio expectationisq;
 meæ ne deesses: at officiosissimum hominem ad offi-
 cium non ~~habeo~~ bor, neque sua sponte currentem in-
 citabo, expectabo sine dubitatione abs te non pusil-
 las aliquas literas, sed uoluptatem tuarum in pri-
 mis, tum omnium, quæ Lugduni geruntur, plenissi-
 mum. Id uero scribere ne prætermitte, qui nobis equi
 sint, qui iniqui ob uulgatam illam orationum nostras
 rum editionem. Tholosanas furias nihildum ad sa-
 nitatem rediisse, & multa in me sceleratè moliri aus-
 dio. Quod nisi me laceffere desinant, irritabunt quies-
 centem, cuius concitati morsus uix ferent postea, effi-
 ciamq; stili acerbitate ~~et infame~~ infaniæ suæ poenis
 teat. Sed de ijs pauca, ne sola hostium commemoras-
 tio, stomachum mihi nolenti faciat. Vosellijs tuis uis-
 ris humanissimis & literatorum amantissimis,

*Tholosane fu-
rie.*

Furnerioq; nostro, amico suauissimo salu-
 tem à me plurimam uelim dicas. Eos
 enim omnes unice diligo, cha-
 rosq; habeo. Vale. Lute-
 tiæ, quinto Idus No-
 uembris.

1534.

AD LECTOREM.

Ne hoc nescias, Lector, omnia penè, quæ Morus
 disputat, & loquitur, ex Ciceroniano ~~dialogo~~
 assumpta sunt. Cuius te rei certiore facere ui
 sum est, ne ~~tuus~~ sui dissimilem, id
 est, sulo modo inflatiore, modò
 flaccido esse putes.

Vale.



Durior est spectatæ uirtutis, quàm
 incognitæ conditio.

De Imitatione Ciceroniana, aduersus
~~_____~~, pro
Christophoro Longolio,

AD

IOANNEM LANGIACVM
Episcopum Lemouicensem, uirum eloquentis-
simum, & eloquentium studiosissimum.

PERSONAE,

SIMON VILLANOVANVS.

THOMAS MORVS.



DERAM CO-
ram certè præsens,
quum Symoni Villa-
nouano oblatus est
Patauij. à Thoma
Moro Ciceronianus

~~_____~~
dialogus. Legentis
uultum perlibenter
usq; eo tuli, dum in
transcursu peruolu-

tum poneret. Sermoni porrò interfui, qui ab illo
cum Moro tum de ~~_____~~, tum de Ciceronis imita-

b tione

posse uideor, qui de eloquentia, & ar-
ratione exactissime politissimeq; differere potuisset,
ab illo si discedamus, non extitisse nostra memoria.
Tibi uero & studio tanto postulanti, & precibus ob-
secranti, quæ in hoc genere disputabat, animo forte
& cogitatione à me comprehensa atque repetita, ut
cunque referre possim: hominis in disputando gra-
uitatem, acumen, elegantiamq; imitari non facile
queam, assequi sanè nullo modo. Quare id tua apud
me gratia autoritateq; dum impetras, atque efficis,
cuius mihi existimatio fama; chara est & iucunda,
illius ut de imitatione disputationem literis mandare
uelim, amici memoriam officiosè tantum colo, laudi-
bus ex sententia non respondeo: nec pro rara & exi-
mia doctrina sua, ac mirabili eloquentiæ ubertate,
sed pro tenui meâ & uulgari scribendi facultate disce-
ptantem in scenam adduco. Rem si minus gratam
Erasmo faciemus, sustinebit, qui omnia in omnis li-
berè semper scribere nullo neque loco neque tempo-
re dubitauit, eandem nos stili licentiam indulgens
tiamq; usurpare. Sed iam personæ gradum in
scenam faciunt, tu congregientes in-
tuere, & colloquentes exaudi, ac
rectius probabiliusq; disse-
renti ausculta.

ITAQ



TAQV E uorato cursim ~~di~~ Dias
 logo, dolore grauiter affectus Villas
 nouanus, edito post multam cogitatio
 nem simulato risu (ut indignantium
 est) sic nos mox à prandio separatim
 colloquentes interpellat. Non satis (inquit) habet
 Batauuus iste scriptor à uera Germana^q eloquētia &
 scienter & prudenter perpetuò abhorrere, omnia^q
 suo more fundere, nisi Ciceronianæ lectioni studios
 sius incumbentem iuuentutem, inani sua & ridenda
 uerborum uolubilitate retardare conetur, atq; adeo
 quod assequi per ingenij imbecillitatem & leuitatem,
 illi non datum est, stomachosè modò despiciat, despi
 ciendum^q suadeat. Inclusum quoquē hactenus &
 seruatum iracundè dolorem, quem ex iuuenili nescio
 qua Longolij epistola iam pridē accepit, ulcisci se anis
 mosè, nec sine immortalī gloria, & singulari existima
 tionis accessione arbitrat, si, quem uiuum adoriri,
 nedum offendere pungere ue timuit, mortuum impu
 denter oblatret, atq; perfidiosè mordeat. Occulto &
 recondito odio, doctis tamen non ignoto incensus,
 uita functum lacerat, quem accepto uulnere, grauius
 ne inferretur, gratia relata tam studiosè placauit,
 quàm diligenter cauit, præsentem ne laceraret, con
 gressu omnino impar, & uiribus ad certamen, quàm
 satis est, debiliior. Ac certè Longolij studiorum ratio
 nem ridere non solum maledico uisum est: pro ueteri
 sua & perpetua scurrilitate religiosum adolescentis

b z obitum

odum in
 Longolij episto
 la quadam consta
 tum est, qua Lon
 golius Budeum
 antepo
 nit.

obitum nanijs perstrinxit, quod in diui Francisci familiam ad extremum adoptari uoluisset, eiusq; ornatu sepeliri. Sic iniqui & maleuolentia ieiuni inanisq; animi documentum præbet inuidia disruptus senex, auditq; pessimè, quo nomine bene audire studeuit. Neque mehercule Longolij studia iure non laudare possit, quæ tantam illi in dicendo laudem gloriamq; attulere: neque Ciceronem sequentes à tam honesto cursu, suo consilio reuocare: nec maiorem celebriorem uel eloquentiæ famam sibi colligere, qui libens & ad metas hæret, & humi repere, non altius tolli, pulchrum atque amplum ducit. Sed Morum summa cum ~~Morus~~ amicitia coniunctum, huc accersi libet, ut quem accuratius legi prohibuit indignatio, uetuitq; recordatio quæsit in Longolium risus, dialogum nobis à principio recitet, ~~Morus~~ defensionem suscipiat, si quid occurreret audiendo, quod uel oppugnandum, uel conuellendum putesmus. Regustanti enim mihi non dubito, plurima uel leuiora, uel absurdiora uisum iri, nisi me fallit quorundã iam lectorum memoria. Ad hanc Villanouani orationem accersitur subito Morus. Domum intromisso præsto est frequens adolescentium cohors, quæ Villanouano, propter præstabilis illius doctrinæ atque eloquentiæ magnitudinem & celebritatem, perpetuo absidebat. Amicè inter se, ut fert uirorum humaniorum & liberius educatorum usus, consalutant. Tum Moro primum gratias ob acceptum

ptum munus uerbis plurimis & amplissimis Villas
nouanus agit, suâq; benignè defert atque prolixè
pollicetur. Vnde dum inter se perpetuant, produ-
citur longius sermo, ueniunt in ambulationem, &
spatia plura domi faciunt. At Morus: Nihil dum
me iuuat inambulatio, de uia fessum & languentem,
& equi iactatione conturbatum. Sed quid impedit,
quando sudum est, & nos in agros uocat læta ista
terræ facies, floribus nouis obsitæ, quin aliquò pro-
ximè urbem exeamus, & sub quercu ramis diffusa
nos in herbam abijciamus, uoluptatem literatis non
indignam capturi, ac iucundè inuicem confabulatur
ri: Facile in eam sententiam ab illis itur: oppi-
do confestim exeunt, locum occupant læta umbra cõ-
uestitum, & arboribus innixi confident. Tum Villas
nouanus, ut otij & desidii fugitans erat, & laboris
exercitationisq; maiorem in modum amans: Capiet
nos (inquit) protinus loci huius quantunuis amœni
satietas, adrepetq; fastidium, quod solet esse uolu- *Fastidium uolu-*
ptati finitimum, nisi sermo injiciatur, quo hic diei reli- *ptati finitimum.*
quum traducamus: uix enim sol pomeridianos tra-
ctus præteruectus est, necq; ante horam octauâ præci-
pitabit. Sermonē igitur unus aliquis inducat, qui &
tempori traducēdo longus sit satis, nec iucūditate fru-
ctusq; careat. Nimirum animū fructuosa ali uoluptate
par est, non oculos tantum optatis spectaculis pasci.
Villanouani consilio ut prudentissimo sic honestissi-
mo assentiuntur omnes, sermonisq; ordiendi primas

illi deferunt. Quorum quidem hortatu & suasu per-
 pulsus, ita Morum ad colloquendum appellat: No-
 ui, More, quanta tibi sit cum ~~_____~~ & amicitia &
 necessitudo: nequè certè dubium habeo, quo studio,
 quâue benevolentia illius existimationi & dignitati
 suffragêre. Quamobrem tuum huc aduentum tibi in
 primis gratulor, ut ~~_____~~ amicus, officium amico,
 dum à me oppugnetur, præstes: & mihi summope-
 re gaudeo, amico præstandi quoquè officij occasio-
 nem nactus, amico inquam, licet frigide laudato, non
 dissimulanter tamen ab ~~_____~~ læso. MOR. Iam
 animo cerno, quem commemoras, Longolius is ipse
 est. VILL. Probè uero: Longolius est, quo nemo
 mihi nequè amicior, nequè charior unquam fuit. Co-
 pulauit nos summum amicitiae uinculum, morum
 similitudo, & studiorum societas. Quid, nisi labefa-
 ctatam mortui dignitatem, rebus quibuscunq; opus
 est, non tuendam solum, sed augendam suscipiam?
 Non faciam, ut à meis officijs deferatur, neglectus ue
 iaceat. Non mobili erga illum animo ero, sed uolun-
 tate ita potius stabili, ut morte ipsa, quæ ab altero al-
 terum abstraxit, coniunctiorem constantioremq;
 non infirmiolem factam amicitiam nostram doceam.
 Tu ~~_____~~ benevolentiam operamq; tuam naua-
 ego, ut mea in Longolium studia omnia consent,
 elaborabo, accuius uiuam adhuc memoriam tene-
 mus, hanc, quantum potero, immortalem reddam,
 & ab obliuione hominum atquè à silentio uindica-
 bo.

Villanovanus Lō
 golij amicus.

bo. MOR. At quid tuo patrocínio indiget, qui nullam accepit iniuriam, nequè ab Erasmo uel leuiter perstrictus est. ~~Significè~~ contra, honorificèq; laudatus. VILL. Perspectum mihi est astutum Erasmi ingenium. Reliquit Longolius, quod adimi non potest: quæ summo iure detrahi forte possint, cupidè certè aufert. Sed ne, dum inter nos incalescit disceptatio, nostra oratio quòquò uersum euagetur, excursat uel sine modo longius, sic te habere uelim: primum Longolij causæ enixè inferuire mihi certum esse. Deinde, quòd sibi suo uelut iure assumit ~~Longolius~~ Longolius ne utilior, aut acceptior eloquentiæ studiosis sit, colligam. Postremo in eo uersabor, ut Ciceronem unum imitandum & ostendam, & probem: sed quemadmodum nos ad illum componas ~~planum~~ planum antea faciam. Etiam, quibus ab Erasmo uitis notatur Tullius, ea ab illo depellam atquè dimouebo, discusso, quantum necesse erit, Erasmi dialogo. Nunc quoniam huc ad animi remissionem concessimus, & oblectationis fructus est non contentio & commotior altercatio, sed animi relaxatio, ex composito inter nos conueniat, ut quietè & placatè disputemus, non sophistarum more, intemperantius uociferemur. Iam hic præsens animo esto, qui corpore ades. MOR. Equidem animo præsens ero, & quæ proposuisti, non inuitus audiam. Magna me tenet tui de imitatione iudicij expectatio: at me maior habet admiratio, quid tibi in mentem uenerit, ut

*Astutum
consilium in Longolio laude
spoliando.*

Longolij gloriam ab Erasmo uiolatam dicas, tot or-
nati laudibus. VILL. Longolio quid Erasmus tri-
buat, quid item detrahat, memoris beneo: quod in
laude aliqua poni possit, reuera coactus assignat,
quod omne punctum ferat, & ab omni laude felix
sit, Longolio manere, iniquo animo grauiterq; pati-
tur. Atqui tam uaria sua & inconstanti de longolio
sententia, famam illius non obterit, iudicis parum
æqui, & odium non omnino regentis omnibus suspi-
cionem facit. Ex tam diuerso iudicio subodorari licet,
uel coniectura protinus assequi, Erasmus quid ad-
duxerit, ut Ciceronianum dialogum scriberet. Ve-
rum id postea uberius. Nunc nihil causæ est, quare
recensere supersedeas, quas Longolio laudes Eras-
mus aspergit, ego quicquid trāsfundit, inuidia redun-
dare probabo, & amicè quæ tu pugnās tributa, obtre-
ctationis significatione de repente eleuari immutariq;
cognosces: sed quid de Longolio tandem? MOR.
Plurimum sanè laudis tulit Longolius. VILL.
Amica & honorifica prædicatio. MOR. At nimio
emptum. VILL. Existit iam summo capite simia,
detegitur res præproperè, proditur intempestiue
simulatio, nec sibi æger animus ex instituto tempe-
rat: perge, MOR. Diu tortus est, & tandem immor-
tuus est certamini nondum peracto, non leui profes-
cō studiorum iactura, quibus magno usui futurus
erat, nisi totum animum omnesq; ingenij uires ad
inanis tituli studium contulisset, VILL. Pulchra &
affabrè

Ex dialogo Cice-
roniano Erasmi
omnia loquitur
Morus.

affabre digesta laudum maledictorumq; confusio. Abunde laudat Erasmus, cuius obitu studia magnū damnum accepisse testatur, is igitur quicquam adferre poterat. Sed quid, quæso, attulisset, qui ad inanis tituli splendorem totum animum, omneisq; ingenij vires contulerat? Inani ambitioni deditus diu se temerè exercuit, ineptis conatibus immortalis est. Vnde igitur ille fructum studijs, si per mortem licuisset, parere aliquando poterat? uideo. Eum, opinor, luculentus ille & nunquam cessans scriptor Desiderius Erasmus Roterodamus, quicquid in buccā cadit, inconsultò garrere effutireq; docuisset: quā forte ratione bibliothecas nugis, & prouerbiorum farragine ponderosis libris non sine grammaticorū, & infantium admiratione auxisset. At nomini prudentius consuluit. MOR. Nihil est tamen quod isti Ciceronis simij nobis Longolium obijciant: alijs doctibus ille magnus erat, etiam si Ciceronianus non fuisset, & hæc ipsa uanissimi tituli ambitio fructum propemodum studiorum illius corrumpit, uitam abruptit. VILL. Quasi uero Longolium si ab inferis excites, non omnia Ciceroni accepta referat, debereq; ingenuè fateatur, aut, quas de Gallorum, iuris prudentiæ, & urbis Romæ laudibus orationes conscripsit à Ciceronis lectione alienus, illius plus illustrarint nomen, quàm quibus se Romæ in senatu defendit Ciceroni deditus. Amantissima fidelissimaq;

Bembus, & Sadoletus Longolio ad Ciceronis imitatio-

c

nihil onem autores.

nihil profuere, nocuere plurimum: qui per omnia scriptorum genera prima ætate diuaganti, autores summpere esse uoluerūt, ut totam suam dictionem inquinatam certè quidem illam atque corruptam, ad Ciceronis dicendi formam reuocaret, eumq; unum ex omnibus sibi imitandum proponeret, amaret, assidue legeret, exhauriret, concoqueret. Amici illi uiri tanta eloquentiæ & artium politiorum fama celebres, tamq; exacto iudicio præditi, adolescentis aciem, falso obiecto splendore & inani spe ostensa deprauarunt: iuuenem ad insanos & ridiculos conatus sua adhortatione inflammant, in pistrinum contrahunt, ex quo in lucem caput educet nunquam: iacet ignobilis, in uulgarium gregariorumq; munero tantum reponitur, Ciceronis stili effigendi ambitione, tanquam supersticiosa religione obstrictus, non Similia undiq; collecta, non pueriles in Prudentium commentarios, non ieiuna in Catonem scholia, non in Mimos Publianos, non in Nucem Ouidij annotationes, non in Laur. Vallam epitomata, non Institutiones grammaticas, non Florulētas epistolas, non Familiaria colloquia, non Querimoniam pacis, non Medicinæ laudes, non Declamationem contra tyrannidam, non Apophthegmata, non de Præparatione ad mortem, non Linguae, non Moriae, non Matrimonij encomium scripsit, non omnibus libris epistolas præfixit, non Græculas uoces Latinis aspersit, non Luciani muscam, non Scarabæum, non Eunuchum,

*Frigida & ieiuna
na Erasmi opus
scula.*

chum, non Lapytham è Græca lingua in Latinam conuertit, non surreptas Adagiorum chiliades in spissum & operosum uolumen retulit: non sacris prophana miscuit, non sumptas aliunde in Paulum paraphrases edidit, non Bedæ errorum elenchum, non Dispunctiones in eundē reliquit, non Militem Christianum enchiridio instruxit, non Sermonem pro uerbo in noui instrumenti interpretatione supposuit: non Paraclesim, non Exomologesim, non Commētarios in psalmos, non Paraphrasim in precationem dominicam, non Concionem de misericordia domini, non Comparationem uirginitatis & martyrij, non Expostulationem Iesu, non Casam natalitiam, non liturgiam uirginis Lauretanæ, non duas precationes ad uirginem matrem, non tertiam ad Iesum, non sexcenta alia stultitiæ & ineptiarum plena perfricta fronte confecit. Quid multa? Non una noscē, aut uno pede stans, concepta simul & parta egessit, effudit uē, quibus per ora hominū uolitare, quibus in omnium sermonem ueniret: non garrulitatē, non plebeios sales, non dicacitatem in promptu habuit, qua uel mediastinis, mulierculisq; satisfacere contenderet. Marci Tullij studio grauior paulosactus, longo tempore parturiit, quæ tandem peperit, non informia, non gracilia aut strigosa, sed opimo habitu ea quidem, sanguineq; & ossibus spectabilia, sic ut gigni nihil possit ualentius, aut omni ex parte politius constructum, Grandis est uerbis, & splēdidus:

*Quid Longolio
attulit Ciceronis
lectio.*

acutus, sententiarum & prudentiæ plenus, genere toto grauis atque elatus. Quam dicendi facultatem nisi ei suppeditasset assidua accurataq; Ciceronis lectio, eodem esset apud eloquentes loco, quem tenet Erasmus. Noli enim putare, More, quicquã illi tam spectandũ, qui aut Latinæ linguæ, aut Græcæ studio teneatur, quàm ut ad eos præcipuè rectà sese conferat, qui & uerborum copiam splendoremq; & sententiarum grauitatem acumenq; suggerant, nec minus sapientiæ prudentiæq; quàm eloquentiæ gloria efflorescant & abundant. His laudibus cumulatũ Tullium coluit studiosè Longolius, maluitq; ei operam dare, cuius dicendi formam uel tantum sequi, & notã habere, laudabile est, quàm in ijs uersari, quos uel si æques, uel superes, gloria iuxta careas, fordeasq; inter sordidorum & impurorum colluiem. Reuiuiscat, de quo sermonem habemus, licet, laudem aliam prorsus nullam, uitæ redditum aucupaturum putem, quàm quòd se Tullio totum inuoluerit: neq; si Ciceronianæ imitationis laudem adimas, reliqua ornamenta, quibus illum magnum fuisse prædicas, uel curet, uel magnificiat: tantum abest ut agniturũ arbitrer. MOR. Multum tamen absuit à Cicerone, cui materia defuit exercendæ mirabilis illius eloquentiæ, quam in serijs grauibsq; causis Cicero præstitit. VILL. Absurdum & insulsum argumentum. Tu'ne Ciceroniani gloria spoliandum iudicas, cui exercendæ eloquentiæ materia non suppetit: aut qui sublato

sublato senatu, eloquij organo, euerſaq; Repub. non
 tot cauſas dicat, non tot deſenſiones ſuſcipiat, quot
 ille Romanus orator, & ad Quirites, & ad patres con-
 ſcriptos dixit, reliquitq; poſteris? An idcirco arte de-
 ſtitutum quenquam, & ab eloquentia dicendiq; ſas-
 cultate male paratum probes, quòd dicendi campo
 hac ætate excludatur? Præſtitit Longolius, quæ. li-
 cuit, longè maiora præſtaturus, ſi tuliffent tempo-
 rum noſtrorum mores, & antiqua illa forenſis exer-
 citatio. Neque mehercule minoris aut negotij, aut
 eloquentiæ eſſe credam, fictam cauſam & quæſitam
 (id ſi etiam tibi à me dari uis) probabilibus argumen-
 tis tueri, quàm ueram & oblatam defendere, atq; ad-
 uerſarium tum exemplis, tum testimonijs cominus
 oppugnare, aut de gradu deijcere. Longolij uerò ſcri-
 pta diſcutiamus, & perpēdamus ad amuſſim. MOR.
 Edidit epistoſas ſanè quàm elegantes ac feliciter elab-
 oratas, fateor, ſed multas argumento perquàm hu-
 mili, plures affectato, quod genus uidentur aliquot
 epistoſas Plinij iunioris. Atqui tales non arbitror in
 epistoſarum numero reponendas. Quid enim ha-
 bent epistoſas Senecæ, quod epistoſas congruat præ-
 ter titulum? At in Ciceronis epistoſis nihil eſt accer-
 ſitum: ſi aut de grauibus ſerijsq; cauſis ſcribit, ea, quæ
 coràm exponeret, ſi licuiſſet, ſcribit, aut cum amicis
 abſentibus de familiaribus rebus colloquitur, aut de
 ſtudijs conſabulatur, quemadmodum ſolent amici
 præſentes inter ſe miſcere ſermonem, Quid quod Ci-

Longolij epi-
ſtolæ.

cero non edidit epistolas suas, & quasdam uidetur scripsisse neglectius, quàm loqui solitus erat? Vnde bona pars earum, quas Tiro Ciceronis libertus collegerat, intercidit, haud, opinor, peritura, si docti eas iudicassent immortalitate dignas. Primum igitur illa simplicitas & gratia sermonis in affectati, deinde ueritas abest in epistolis Longolij plerisque. Ad hæc quoniam nec eadem fuit fortuna Longolij, quæ Ciceronis, nec eadem negotia, sit ut interdum inepta sit ac frigeat imitatio. M. Tullius senator & uir consularis, scribit ad suæ dignitatis homines, quid moliantur duces in prouincijs, ut instructæ sint legiones, significent: ostendit periculum, diuinat rerum exitum: cum ad imitationem Ciceronis similia scribit ad cruditos amicos & in ocio uiuentes Longolius, ueluti sollicitus de summa rerum, non ne friget affectatio? Quid quod ipse in musæum abditus interdum literis mandat uanissimos rumores, quales uulgò circunuolitant, indigni qui uel sermone cordati hominis commemorentur? VILL. Instat, quod superius asserui, nec iam, puto, tibi excidit ex animo. Longolio, quod pro certo omnes habent, ab Erasmo relinquatur, quod dubium est, & quouis iure, quauis iniuria eripi possit, inimicè detrahitur. Elegantes ac feliciter elaboratas ab illo epistolas editas fatetur. Quis hoc nisi eloquentiæ expertus, & insigniter impudens neget? Sed tamen multas argumento perquam humiliter scripsit, plures affectato. Ecquod putat, More, Bat
tauus

tauus tuus rhetor humile epistolæ argumentum, mo-
 do ea epistola narret explicetq; , quorum certiore
 fieri intersit, ad quem ipse scribas? Ecquid epistolæ
 tam proprium, ecquid tam consentaneum, quàm &
 stili & argumenti humilitas? Ecquid disputat? ecquid
 probat? ecquid differit? ecquid refellit infirmat'ue
 epistola, quod tantam argumenti aut subtilitatem,
 aut gravitatem postulet? Omnino: suadeat, à sen-
 tentia abducat, consilia mutata significet: dolorem
 leniat, consolatione sustentet: casus priuatos aut pu-
 blicos explanet, res gestas comprehendat: ad scriben-
 dum appellet, cessantem increpet, officia deferat &
 polliceatur: expostulet, queratur: laudet, ad uirtu-
 tem incendat: commendet, opem imploret: gratule-
 tur, gratias agat: disceptet, opinionem referat: bella
 loquatur, diuinet, prælagiat: accuset, succenseat, sto-
 machetur: placet, reconciliet, recolligat, in gratiam
 reponat, restituat: onus imponat, negotia curet, man-
 data exhauriat. Quid? Hæc ne tot epistolarum cons-
 cribendarum capita familiari & plebeio tum argu-
 mento tum sermone exequi non possimus? Argu-
 menti tamen gravitatem in Longolij epistolis deside-
 rat. At istud ipsum tam absurdè facit, quàm hoc im-
 pudenter & ridicule scribit, bonam partem epistola-
 rum Ciceronis intercidisse, quòd neglectius scriptæ
 doctis forte uiderentur, & eam ob rem non satis im-
 mortalitate dignæ. Scilicet princeps ille & unicus Ro-
 manæ eloquentiæ deus, epistolas conficiendi artem

*Nihil epistolæ
 magis proprium
 quam argumenti
 et stili humilitas.*

*Communia epi-
 stolarum conscri-
 bendarum capita.*

ere non edidit epistolas suas
 scripsisse neglecius, quàm si
 bona pars carum, quas Timotheus
 legerat, interdidit, haud, opus
 iudicasset immortalitate di-
 simplicitas & gratia sermone
 tas abesse in epistolis Longinus
 quoniam nec eadem fuit fuit
 ceronis, nec eadem negotia
 fringat imitatio. M. Tullius
 scribit ad suae dignitatis lau-
 duces in prouincijs, ut infir-
 ficat: ostendit periculum
 ad imitationem Ciceronis
 amicos & in ocio uiuentis
 tus de summa rerum, nec
 quòd ipse in musæum
 dat uanissimos rumores
 tant, indigni qui uel
 memorentur? Vnde
 rui, nec iam, puto, nescio
 quod pro certo om-
 tur, quod dubium
 eripi possit
 elabor-
 nisi

endo, aut ad Octavianum
 Bembum, Sadoletum uel
 Nemo hoc, præter Eras
 his rebus plenius & sæpius
 esse putarit, id qui noue
 rum in eiusmodi rebus au
 na scribendo diligenter ex
 aldi faciat uel rogatui, uel
 ius, acta publica, res urba
 m conditionem, bella, præ
 orum inclinationes, pertur
 aut fractam: calentes rumo
 mones; metu perculsos alios
 res, alios resistentes & propu
 perscribit, quis id potius affe
 rem interpretetur, quàm offi
 argutam sedulitatem in amici
 leuando usurpare cupientis?
 in musæum abditus. Non pu
 rex, fieri amicorum diligentia
 ignorent ij, qui uel nomina de
 tu uersantur, ea ab amicis anis
 sta, ipsorum literis uerè & penè
 Sic Longolius ad Grimoaldum
 non adfuerat, sed quæ multorum
 cognouerat. Vanissimos tamen
 rumores literis, quales uulgo
 , qui cordati hominis sermone
 d comm

*Amici est, amicū
 in rebus nouis au
 diendis curiosum,
 uel uana scriben
 do explere.*

non tenuit, neglectius, quàm deceret, scripsit: minime hanc artis oratoriae & rhetoricæ partem ignorauit, subtiliores nouit. Senem repuerascentem miseror More, & nimia detrahendi cupiditate occęcatum doleo. Pari studio infectationis, plures Longolij epistolae affectato & quæsito argumento esse probare contendit, quod genus leguntur aliquot Plinij iunioris: sed nec eas in epistolarum numero ponendas arbitratur. Perinde quasi Plinij Longolij uel & rebus & consilijs interfuerit, uel præfuerit Erasmus, ut certum habeat, accersita sint & affectata, nec ne, uirorum tam doctorum in epistolis scribendis argumenta: aut perinde ac una tantum sit, & certis finibus circumscripta, neque latè pateat epistolarum materia, cautumque sit & sancitum senatusconsulto aliquo, ne uel res ferias & à statu nostro abhorrentes, ne uel curiosius collectos rumorum uentos & serpentem famam, ne uel nostram de rerum euentis opinionem, epistolis committamus. Friget hinc illa Longolij affectatio, abest simplicitas & gratia sermonis, abest ueritas in illius epistolis plerisque, cum, uelut sollicitus, de regum consilijs, de bellorum apparatu, de facta coitione, de comparata manu, de Gallorum copijs equitatuque, de Hispanorum legionibus & peditatu, de impressione facta, de uictoria huc uel illuc inclinante, de Italiae uastitate atque direptione, de oppidorum oppugnatione uel expugnatione, de exercitu aliquo dilabente, de fugatis hostibus, de clade accepta, de nonnullorum

Frequentia epistolarum Longolij argumenta.

rum stultitia in bello gerendo, aut ad Octavianum Grimoaldū, aut ad Petrum Bembum, Sadoletum uel literas uerbosiores mittit. Nemo hoc, præter Erasmus, damnarit, nemo de his rebus plenius & sæpius scribere, affectati sermonis esse putarit, id qui nouerit, amici esse partes, amicum in eiusmodi rebus audiendis curiosum, uel uana scribendo diligenter explere. Quod si, ut Grimoaldi faciat uel rogatui, uel expectationi satis Longolius, acta publica, res urbanae, Italiae statum, ducum conditionem, bella, prælia, interneciones, temporum inclinationes, perturbationes: spem erectam, aut fractam: calentes rumores, aut refrigeratos sermones: metu perculsos alios & deditionem cogitantes, alios resistentes & propugnationi incumbentes perscribit, quis id potius affectatum ineptè sermonem interpretetur, quàm officiosi esse ducat, atque argutam sedulitatem in amici cupiditate desiderioque leuando usurpare cupientis? At uerò istæ præstat in musæum abditus. Non putat rerum rudis senex, fieri amicorum diligentia posse, ut, quæ etiam ignorent ij, qui uel nomina dederunt, uel in exercitu uersantur, ea ab amicis animaduersa & perspecta, ipsorum literis uerè & penè exploratè sciamus. Sic Longolius ad Grimoaldum multa, quibus ipse non adfuerat, sed quæ multorum & nuntijs & literis cognouerat. Vanissimos tamen (inquit ille) mandat rumores literis, quales uulgo dissipantur, indigni, qui cordati hominis sermone

d comm

*Amici est, amicū
in rebus nouis au
diendis curiosum,
uel uana scribenda
explere.*

*Quis Erasmus in
epistolis scriben-
dis.*

*Voluminum tur-
ba illustris senex
Erasmus.*

commemorentur. Simile nihil prorsus apud Longo-
lium reperias: omnia & uerè, & grauitè, & sapiens-
ter ab eo scripta legas. Cùm autem tantam in episto-
lis & stili, elegantiam, & rerum grauitatem ueritas
temè requiras, atque ista epistolas exactè scribendi
laude Longolium paulò longius processisse neges,
Erasmi tui epistolarum farraginem perpendito, sti-
lum discuto, rerum pondus commonstrato. Abies-
cèt, frigide, ieiunèq; scripta omnia, sordida omnia,
impura omnia, malè culta omnia. Quid habet tuus
ille morosus alienorum censor, præter monachorum
conuitia, theologorum disputationes, rixas, turbas?
Graue si quid scribit & homine illo suo cordato di-
gnum, has tantum ineptias miscet. In epistolis con-
cionatur, declamat, theologum agit, de religione chri-
stiana disceptat, uiuendi morem præscribit: crimina-
tur, accusat, purgat, defendit, tragedias agit in nu-
gis, sophistarū scholis tributa inculcat, mortuos lin-
gua ferit, Longolium ridet, Albertum pium Carpo-
rum principem inertiae infantiaeq; notat, Gallorum
ingenijs diffidit. Denique ne parum leuis fortè uis-
deatur, qui grauis nomine nihil peius odit, ructus
suos, uentrisq; crepitus narrat, ulcus recrudescere
declarat, calculi dolores remisisse significat. Atqui uo-
luminum turba illustrem senem asperius urgere non
libet, artium nostrarum studioli gloriam infringere
quoq; pudet. Longoli existimatione tueri, nō Eras-
mi laudibus detrahere, mihi in animo est. Reliquæ
illius

illius commentationes, quo sint apud Erasmum numero, tu pro tuo instituto fac, ut ex te audiā. M O R. Orationes duas scripsit uelut in Capitolio habitas. *Longolij ordinationes.* Ego eas sanè magna cum animi tum admiratione, tum uoluptate ab Erasmo lectas scio. Effecerunt enim ut de illius ingenio longe, quàm antè, magnificentius sentiret. Adeo, ut cum de illo præclaram concepisset existimationem, uicit multis partibus expectationem illius. Videtur enim in has deprompsisse, quicquid uel suo potuit ingenio, uel è Ciceronis orationibus hauserat. V I L L. Eximium & amicum testimonium. M O R. Eæ tamen tot annis elaboratæ, toties sub incudem reuocatæ, toties criticorum censuram perpeffæ, quantulum habent Ciceronis? non quidem Longolij culpa, sed temporum. Aptissimè dicebat Cicero, uix aptè Longolius, quandoquidem Romæ nec patres conscripti sunt hodie, nec senatus, nec populi autoritas, nec tribuum suffragia, nec magistratus, nec leges, nec comitia, nec actionum forma, nec municipia, nec prouinciæ, socij, ciues: Postremo Roma noua, Roma non est. V I L L. Ad ingenium redit Erasmus, solennèq; suum illud diligenter quidem seruat, ut principio pūgere dissimulet, mulceat, adblandiatur, postea obtreccatione impotenter laceat. Orationes (inquit) uerbis ornatissimas, & sententijs splēdidissimas scripsit Longolius, quibus omnium de se opinionem multo pluribus, partibus uicit: quas tamen cum tot annos elimauerit atq; perpoliue

*Aliud stans, aliud
sedens Erasmus.*

rit, cùm toties sub incudem reuocarit, toties criticorum censuræ submiserit, quàm longo interuallo ad Ciceronem accedunt: Iam aliud stantem, aliud sedentem Erasmus sentire cernimus. Laudis exceptione è cœlo detrahit, quem nuper in cœlo esse omni laude uoluerat. Aliorum operam, criticorum censuram & iudiciũ Longolio exprobrat, temporis spatiũ longinquitatemq; obijcit: quibus ille neq; adiumentis, neq; diuturnis & assiduís laboribus assequutus est, ut uel tantillum Ciceronis habeat. At non sua quidem culpa, sed temporum. Aptè enim dicere uix potuit, ut Cicero, qui semper aptissimè dixit, Risu penè corruo, More, cùm animum ad inauditas istas Erasmi

*Non aptè dixit
Longolius Erasmi
iudicio quòd patres
conscriptos
finxerit.*

ineptias paulò diligentius aduerto. Igitur non aptè dixit Longolius, quòd patres conscriptos, quòd populi Romani auctoritatem, quòd tribuum suffragia, quòd magistratus, qui nulli sunt, esse ipse finxerit. An hic mecum risum non prolixum edas? Aptè scilicet dicere, hoc non ipsum est causæ seruire, causæ propria dicere, in argumentis tum refellendis, tum aduersario opponendis crebrum esse, potentia debilitare, debilia, quæ ad rem nostram faciunt, enixè confirmare, deprimenda deprimere, attollenda attollere, crescere, cùm opus est, remittere, cùm oporteat: augere, minuere, docere, oblectare, affectus suis locis mouere, denique in ijs singulatim prudenter uersari, quæ causæ susceptæ congruât, quæq; nos iuuent maximè, non argumento repugnent, aut per inertiam

inertiam nostram aduersentur. Singula ista quando quidem & acutè & ingeniosè, periterq; & scienter à Longolio perfectà non dubitamus, quid oratori tam eximio ob decentem illam ad uerba Romana allusio- *Decens Longolij allusio ad anti- qua uerba Ro- mana.*
 rem obloquimur? quid, cum ne quidem næuum aut labem in toto Veneris corpore Momus perspi- →
 ciat, leue nescio quid calumniatur? Quid non po-
 tius spectatam formam, uenustam membrorum com-
 positionem, pulchra oris lineamenta, optimum ha-
 bitum, spetiosumq; colorem intueatur atque suspici-
 at, quàm oculos ad ima & uiliora deiciat? Magis
 stratum antiquorum nomina minus apud nos usi-
 tata non inuitus fatear, sed non id tamen dabo, pas-
 trum conscriptorum ordinem, & officia sic omnino
 sublata, ut illos antiquis etiam nominibus compella-
 ri rectè in causis dicendis non conueniat. Senatum
 habet Roma suum, habet Gallia, habet Britannia, ha-
 bet Hispania, qui quando certo senatorum numero
 constat, causam haud facile dicas, quin eos patres
 conscriptos uerbo proprio & significanti appellare
 liceat. Legibus hoc etiam tempore gubernamur, ma-
 nent suffragia, actiones intendimus: municipales, so-
 cios, ciues nostros habemus: neque est, in quo hæc
 exoleuerint, nisi forte uocum immutatione à barba-
 ris inuecta atque inducta. Vocibus huiusmodi Long- *Vocibus Roma- nis antiquis rectè usus est Romæ Longolius, idq; de industria.*
 golius rectè uti potuit, non apud imperitam multi-
 tudinem & plebis fecem, sed audientibus doctissimis
 eruditissimisque uiris, antiquorum istorum uerborum

non ignaris. Adde, non Friburgi Brisgoiæ, non Londini, non apud Hispanos aut barbaram aliquam gentem, sed Romæ in Senatu, Latino populo intuentes & auscultantes, orationem Longolium habuisse, illicque uerbis de industria usum, quæ illic nata, quæ illic nota, quæ illic usitata, uulgata, atque grata essent; quorum usu si abstinuisset, inuidiam, qua premebatur, auxisset, ea siquidem tantum accusatione in iudicium ab aduersarijs uocatus, quod Romani nominis gloriam maledictis depressisset, quod Romæ dignitati detraxisset. Quam inuidiam, quo potuit modo prudentius sapientiusque lenire aut commodius extinguere, quam ea inculcans uerba, quibus maiorum gloriam ob oculos iudicibus poneret? & charam sibi iuandamque Romanæ antiquitatis memoriam testaretur? Eo consilio à iuvene ingenioso factum est, ut obsoletis & desitis nominibus æquales nostros appellaret, ut orationem ad hominum studia & uoluptatem accommodaret, qui adhuc Romam rerum dominam & suorum magistratuum ordine efflorescentem somniant, qui tametsi honoribus & dignitate orobati sint, honorum tamen insignia, & superba gloriosaque maiorum nomina Romæque mores libenter audiunt atque agnoscunt. Fac uero si uis, ut forte uis, Longolium affectatè magis, quam ullo consilio, aut ea quam attuli, ratione, uerba ab ætatis nostræ statu & moribus remota in orationem suam coniecisse, patres conscriptos liberius appellasse, quos ius
dices

dices aptè appellare debebat. An idcirco cuiquam dubium sit, sublato rerum usu, uerbis ipsis posse nos sine uicio uti? Quis sic loquentem iure barbariei notet? Bonis ominibus, uel secundis auspicijs ad rem aggressus sum. Propriè sic loqui possumus. Vbi tamē ominum, aut auspiciorum ritus? ubi cultus? ubi obseruatio? ubi inanis illa religio aut superstitio? Remansit tantum loquendi usus, res ipsa exoleuit, interciditq; iampridem. Multa mihi huiusce generis in mentem ueniunt, & tibi fortasse plura, sed ad rem reuertar, & hoc sine dubitatione asseram, Patres conscriptos, aptè proprièq; à Longolio uocatos, cui deliberatum erat, iudices falsa gloria, inaniq; nominum auctorum splendore commouere, incendere, infatuare. Sed meam hanc defensionem nihilo secius Eras-
 mus improbabit, quàm Longolij orationum argumenta contemnit. MOR. Ludicrum ille plusquam serio agit, non aliter alludens ad ætatem Ciceronis, quàm is qui scripsit Batrachomyomachiam, alludit ad Homericam Iliaden, ranis, ac muribus, rebusq; ridiculis ac friuolis, deorum, dearum, heroum splendida uerba, factaq; accommodans. Ita Longolius exaggerat capitis discrimen; ornatas cohortes, gladiatorum manum, quorum uiolentia, autoritas amplissimi ordinis, ac secundum leges agendi libertas fuerit impedita. Fingit priscam illam Romam orbis reginam, & huius præsidium ac tutorem Romulum cum suis Quiritibus, somniat patres conscriptos, &

*Sublato rerū usu,
 uerbis ipsis rectè
 uti possumus.*

*Deliberatum erat
 Longolio nomi-
 num auctorū splē-
 dore iudicibus il-
 ludere.*

augustissimum ordinem. Populum in suas tribus distinctum, prætorum ius, tribunorum intercessionem: somniat prouincias, colonias, municipia, & socios urbis septicollis: recitatur Senatusconsultum, citantur leges, appellantur ueteres illi Romanæ ciuitatis principes, è monumentis excitantur. Quid non? perquam faceta res est. Cæterum cum nec sit ex historia petatum argumentum, ut saltém per fictionem suo tempori, suisq; personis conueniat, quâ fieri potuit, ut hîc totum exprimeret Ciceronem? In hac tamen materia, tanto studio, tantâq; dexteritate ingenij, rem gessit egregius iuuenis, ut hodie neminem norim, uel apud Italos, quem existimem idem præstare posse, tantum abest, ut Longolij laudibus aliis quid detrahare uelim. Hæc eò tantum dicuntur, ut adolescentiæ studijs prospiciam, ne se superstitiosè discrutiet affectatione Ciceronianæ similitudinis, sic ut hac intentione ab utilioribus, magisq; necessarijs studijs auellatur. V I L L. Magna solitudine sum, More, atque intimis sensibus angor, quod iam Erasmo nomen rectè possim adscribere. Profusum ne laudatorem uocem, quem tributarum laudum tam subitò pceniteat? acerbum obtrectatorem appellcm, qui obtrectationem tam profusis laudibus misceat? senem uersipellem aut bilinguem nominabo, qui modo candidus sit, modo ater nimium: qui linguam alteram melle delibutam, alteram toxico distertam ac rigentem gerat, Cedo, quid Italus omnibus antepōnit

Erasmi natura
& mores.

nit, cuius argumenta, ut inania & ludicra ridet: quem Pop. Rom. finxisse, quem Quirites somniasse coarguit: Somniauit uigil atque animo excubans, quæ nisi causæ inseruisset, non aptè, sed ineptè: non conspiciè, sed exiliter & pressè: non sublatè, sed attenuatè: non ornatè, sed sordidè & inquinatè: non grauius, sed leuiter: denique non oratoriè, sed grammaticè dixisset, Nihil supra modum, sed omnia intra modum potius, nihil inops, nihil ieunum, nihil inflatum, nihil corruptum: nihil cessans, nihil redundans, nihil circumfluens, nihil superuacaneum: nihil non uerisimile atque probabile, nihil senatui Romano non conueniens, nihil causæ susceptæ non congruum, nihil non laudabili inuentione, & arte admirabili accommodatum. Audet tamen impudens scurra rem tam seriam, ut ludicram, aspernari: adolescentiæ studijs prospicere se putat, eam cum admonet, ne Ciceronianæ imitationi hæreat, eam cum à scriptore tam diuino dehortatur. Mallet forte Apuleij Asinū, Beroaldi declamationes, Alexandri grammatica, Baptistæ Pij racemationes & spicilegia, Caroli Vituli epistolæ, Britonis synonyma, Porcorum pugnam, à iuuentute legi, ut nulla maiori laude in dicendo procederet, ipsèdemque finibus subsisteret, quibus ille subsistit: uel quanto Vatinius odio Cicero infectatus est, tanto ipsa contemptu & desplicatu Ciceronis liberos auersaretur. Porro cuperet præclarus iste & fidelis suafor, eloquentiæ studio neglecto, alia nos uti-

e liora

Quibus nomi-
bus utile est elo-
quentiæ studium.

Non solum artis
dicendi laude, sed
philosophiæ etiã
præceptis & in-
stitutis clarus Ci-
cero.

lora magisq̃ necessaria sequi. Quis nisi emota & alie
nata prorsus mente hoc non insanū iudicet, eloquen-
tiæ studio utilius ullum dici? qua cæteris animantis
bus præstamus, qua ad deorum numen proximè ac-
cedimus, qua nos inter nos coniungimur, qua dolo-
rem aperimus, qua molestias leuamus, qua animum
despondentes sustentamus? Neque etiam si philoso-
phiæ studium intelligat, hoc à Cicerone abest: simul
cum singulari illa eloquentiæ facultate, & Latini ser-
monis copia, Philosophiæ instituta atq̃ præcepta ad
animum excolendum affatim suggerit, rerum causas
indagat, recõditionora scrutatur, & quicquid ad sapien-
tis grauitatem constātiāmque pulchrum est, aut ad mo-
derandos & cohibendos animi motus necessarium,
nobis plena manu è Græcis depromit. M O R. Non
prophanum philosophiæ studium, sed sacras literas,
Christi disciplinam Erasmus intelligit. In quam scri-
ptis illustrandam si uigilias collocasset, quas actionis
illis ludicris impendit Longolius, quantum uti-
litatis uel religioni Christianæ, uel studijs, uel patriæ
allaturus erat? Profectò miseret me adolescentis. Tes-
tatur se scripsisse etiam orationes quinq̃ in laudem
urbis Romæ. O pulchrè collocatam operam. Quan-
to rectius eam collocasset, si ciuitatem illam, atq̃ eos
præcipuè, qui bonas literas ibi profitentur, orationis
bus aliquot elaboratis, ad Christi cultum, ac pietatis
amorem inflammare studuisset? At quibus tantum
uigiliarum datum est? V I L L. Aperit hic se latus ser-
monis

monis campus, ut non Erasmus solum, sed uniuersam Lutheranorum sectam, insolentiae, gloriae intolerabilis, dementiaeque accusem, qui suis commentarijs, & discrepantibus inter sese scriptis, Christi discipulis nam uel illustrare & patefacere, uel ornare, ad eamque nos rapere arbitrantur. Quid? Num cum illo uociferari libet? O uanas hominum mentes, o pectora caeca. Caeca mehercule inanis laudis studio. Et est, si dijs placet, qui diuina humanis laboribus, & uigilijs iuuare se posse credat? Est, qui hominum scriptis & consilijs adhortationibusque nos ad Christi doctrinam & amplexandam, & colendam incendi potius suspicetur, quam uel renuentes summa illa dei uoluntate, & iussu adduci, trahi, rapique existimet? Quae (malum) est ista impudentia atque arrogantia, sacris humana miscere? & in diuinæ potentiae societatem uenire uelle? Ergo minus potens Christus, & patris æterni numen. Ergo fractior illa est, & debiliior uis cœlestis ad conciliandas retinendasque hominum mentes & studia, nisi Erasmi, & theologorum quorundam blateronum opera, labor, uigiliae, scriptaque opem deo tanquam suprauires conanti ferant. Ergo nobis imposuere, tenebras nobis offudere, reconditos & abstrusos, non obtiosos sensus diuini autores reliquere. Ergo Erasmi commentarijs & interpretatione opus. Ergo spiritus ille cessat, nobis omnia edocendis à patre praefectus. Illius fungitur officio, illius partes subit, illius negligentiam & desidiā sarcit sua loquacitate Erasmus, suis nos

De Luthero, et
Erasmo.

scriptis ad religionem inflāmat. Ergo si ne litera quidem ad institutionis nostræ libros accessisset, Christi non satis teneremus præcepta, Christum non audiremus, Christi mādāta non exhauriremus. Ergo nisi Christiani militis enchiridiō, nisi paraphrases in Paulum somniasset, nisi garrulo hoī de re Christiana garrire libuisset, Christū non nosceremus, Christū lentē & fastidiosē amplexaremur. Longē alia est doctorū & bonorum opinio, atque Erasmus existimat. Religionem omnem ingenua animi inductione, metu & reuerentia contineri, non uerbis induci, sapientibus exploratum est. de qua si disceptes, aut liberius uerbosiusq; scribas, languet reuerentia, tollitur sensim metus, conuellitur rei diuinæ opinio, religioq; in rem uulgarem dilabatur, atque dissipatur. Paulō hic fusius, acutiusq; ratiocinemur, More. Rem uerā narrabo, & te mihi subscripturū non despero. Quid Lutherus? quid Zuinglius? quid Oecolampadius? quid Buccerus? quid Erasmus? quid Melancthon? quid Lambertus? quid Farellus? quid reliqua recentiorum theologorū sentina suis tam acutis & luculentis in sacros libros cōmentarijs genti Christianæ attulit? Videor hic aliquē unū mortis minis, & uitæ periculo territū, nō clara id uoce profitentē, sed strictis labris mulsitantē audire. Superstitionē sustulerunt, religionē retulerūt, & suis natalibus restituerūt. Insolens & arrogantiæ plena oratio. Sic igitur de hoīm labore, & autoritate pēdet nititurq; religio nobis hoc tēpore restituta.

Quibus rebus cōstet religio.

Quibus rebus laeditur religio.

restituta. Sed aliquāto secus, atq; sperabāt, euenit. Er-
rorum (quos uocāt) dum fontes aperiūt, Christianæ
persuasionis dū capita quēdā discutiunt, & omnia ad
suā sententiā nutumq; reuocant, dum religionē uelut
elimant & perpoliūt, fit profectò, ut introspectis my-
sterijs, quæ reueriebantur antea, multi iam multa ne-
gligant, uanaq; & commentitia opinentur, Christi in-
stitutionem despiciant, Deum humana curare negēt,
animam corpori non superstitem prædicent, credātq;
omnia morte deleri, nec ullum sensum manere. Hanc
nostri seculi labem & maculam confluuit explodens
da Lutheranorum curiositas, qui cū errantes in
uiam reducere (id quod dictitant) & ad frugem bo-
nam reuocare studuerunt, religionis dignitatem la-
befactarunt, notiora (ut humanum est rerum nota-
rum fastidium & contemptus) aspernandi ansam de-
derunt, diuina euerterunt, humana introduxerunt,
stupidos & rudes acuerunt, acutos & solertes infas-
tuarunt. Nunc Erasmus inconsultò clamet Longolij
male collocatas operas: nihil Christianæ religioni at-
tulisse, nihil utile conatum queratur: adolescentis tam
ineptis conatibus immortui misereatur. Plus Erasmo
Lutheroq; religioni attulit, eam cum reuerenter cos-
luit, maluitq; ad omnia conuiuere & prudenter siles-
re, quàm, quæ religionem euerterent atque pessun-
darent, commentari: rem superuacaneam conari nos-
luit, quod sciunt omnes, docente Christo, docere,
tanquam Christus, erubuit. Obijciat, quæ uolet, &

*Quantum reli-
gionem Christianā
labe factarint
Lutheri conatus.*

*Humanum rerū
notarum fastidiū.
Quid Lutherus
suis scriptis effe-
cerit.*

*Plus religioni
profuit Longo-
lius, eam dū reue-
rēter coluit, q̃ Lu-
therus aut Eras-
mus dum omnia
miscuerunt.*

*Erasmi garru-
litas.*

uidebuntur, Erasmus : sua, qua omnes solet, garrulitate nos obtundat : non fidem mihi tamen faciet, homines (eos semper excipio, quibus uel credita ciuitatis alicuius Christianę administratio, uel singularis omnium consensio, ad id suscipiendum excitabat, Augustinum, Hieronymum, Chrysostomum, Cyprianum, & reliquos pietate potius erga suos ciues ductos, quàm gloria semiustos, & inanis ostentationis studio, ut Erasmus & Lutherus, flagrant) sacram literarum interpretes aut esse planè, aut esse ullo modo posse, cultores tantum esse debere mihi persuas-

*Effrenata inter-
pretandi audacia
in theologis Ger-
mania.*

deo: neque effrenatam istam interpretandi audaciam probo, quæ in immensum & infinitum facilè quidem crescat, gignatq; sua sponte sexcenta controuersiarum uolumina, fructum nullum pariat, alios tantum in alios incendat, & rixam sempiternam excitet, non Christianam fidem confirmet, aut alat, nullo nisi Dei præsidio stabilem & constantem futuram. Præcepta sua si alia, quàm prima Apostolorum enuntiatione, indigere censuisset, explicatiora reliquisset Christus : quorum neque rationem quisquam explicatam habeat, neque sensum teneat, nisi ab eo fonte hauriat, à quo primum dimanarunt Iesu Christo crucifixo. Grauißimas commentationes Lutherus proferat, luculentas paraphrases Erasmus emittat, inaudita Oecolampadius crepet, monstra narret Zuings, stupenda Lambertus abiecto cucullo loquatur, unus est nihilominus Christus, qui suo numine mouet.

mouet, qui allicit, qui trahit, qui retinet, qui seruat, qui transfugas post culpam agnitam recipit, qui desertoribus ignoscit, & aditum ad castra optata patefacit. Frigent cum frigido, mortalium commentationes adhortationesq; nisi qui ipse ignis est, frigentem torpentemq; excitet, calefaciat, inflammet. Commune nihil habet, cum Christiana suauitate & lenitate stomachus; Christiano homini ira, indignatio, iniuriæ conuitiæq; non satis quidem conueniunt. At quid Luthero Erasmo'ue in Monachos, in Episcopos, in summum Pontificem acerbius? quid conuitiosius? quid ardentius? Non tam stupido ingenio sum, More, aut ita rerum ignarus, ut Monachos uitam agere dicam, quæ monachi nomine significatur, quæ monachis propria est: neque Episcopos uitiosis moribus plerosque, & uita flagitiosa esse negem, horum hominum ordinem uoluptatibus magis, quàm religioni deditum non diffitear, neque Romanos semper. Pontifices omni uitio caruisse asseram, multa Romæ nihil minus quàm christianè fieri, denique religionem propè omnem impotenti sacerdotum libidine, avaritia, ac structis ad pecuniam uis, labefactatam, foedatamq; meapte sponte haud dubiè prædicem. Non tamē tantas excitatas & à Luthero & ab Erasmo tragedias, tot facta omnibus conuitia, totq; maculas asperfas probem. Quàm duplices sint Monachorum mores, quàm discolor sub cucullo discoloris uita, nouere maiores antea: Episcopos

Commune nihil habet cum Christiana suauitate stomachus.

Lutheri & Erasmi conuitiosa scripta.

Maiores prudentia & modestia.

non omnibus uitijs puros sciure : sacerdotes ex re qualibet lucra ligurire perspexere, grauiora & animi altitudine sapientiâq; digniora, à mentis humilitate remotiora, quàm Lutherus, proferre potuere. Satius illis tamen uisum est & cautius, ad hominum lapsus conuiure, omnibus indormire, quàm tot turbas mouere, quàm dentata charta & conuitijs istas hominum pestes exulcerare, quàm crabrones irritare : hoc unum rati illi quidem & gnari, flagitiosos à flagitio uerbis non abduci. Erasmus contra, quòd omnia impudenter audeat, quòd omnes lace scat, quòd stilum in omnes distingat, quòd in monachos inuehatur, quòd debacchetur, quòd Lucianum omnibus ridendis & pungendis impiè æmuletur, eo sanè nomine seriò triumphat, gaudio exultat, læticia desipit, eam sibi gloriam ut maximam uendicat, ea scribendi licentia, & literis & Reipublicæ non uulgariter inferuere se putat : qui eodem ore & impudentia non furiat, qui eadem infania non præceps sit, qui eadem non suscipiat, & obeat, qui mentis sanitate utatur, cui modestia placeat, & temperantia, malè operas collocare, nihil utilitatis adferre, inania conari iactitat, Vt nulli fuit de Erasmi sententia, rara illa & mirabilis Longolij eloquentia, quæ in rebus paulo solutionibus & à religione remotis omnino uersata est, qui à literis sacris abhorruit : ex qua non de puero Iesu concio, non Paraphrases, non Annotationes in epistolas Hieronymi, non locorum emendatio & restitutio

*Erasmus omnibus
ridendis Lucianum æmula-
tur.*

tutio in Ambrosium, non cola, & commata in libros Cypriani: non de facienda ecclesiæ cōcordia nugæ. MOR. Pluribus tecum non disceptabo, quid tuis quisq; commentationibus Christiano cultui religioniq; conferre possit: tecum iam, si ita uis, faciam, nec Longolio Erasmum laudabiliorē ob posita in sacris literis studia præfractius pugnabo: in tua iam arena uersor, elaboroq; ut, ob quā Longoliū tātopere effers & admiraris, eloquentia Erasmum non minus ornatum, non minus utilem, non minus quoq; acceptū, à te mox exprimā. Dictu mirum, quā Longolio apud laudant Itali quidam. Fateor, Longolij scripta laudant, sed Erasmum legunt. Bataui oratoris nēnias; quæ Colloquia uocantur, quanto plures terunt manibus, quā Longolij orationes, quālibet elaboratas, quālibet expolitas. Quid in causa? Quid? nisi quod illic res ipsa capit, moraturq; lectorem, qualicūq; sermone tractata. At hæc quoniā theatrica sunt, & uita carent, dormitat lector stertitq;. Vtilitas etiam commendat mediocrem eloquentiam. Quæ tantū adferunt uoluptatem, ea diu placere non possunt, præsertim ijs, qui literas in hoc discūt, non solū ut politius dicant, uerum etiam ut rectius uiuant. In summa qui iuuenem illum ad huius laudis ambitum inflammauerunt, non optimè meriti sunt uel de ipso, uel de re literaria. VILL. Non puto More, existimare te, assensatione me uelle labi, aut in alicuius uoluntatē ambiciosius loqui, Proximū tamen est, ut meum de Erasmo iud.

Latine linguae nihil quisquam adferre potest, ea tantum uti licet.

mo iudicium feram, & quid de Longolio sentiam, libere quoque dicam. Adducit me tua oratio, ut ad id celerius aggrediar. Principio utilem Erasmi sic nego, ut reliquis scriptoribus, extra antiquos, hanc laudem adimo. Latina lingua uti tantum possumus, illam uerbis augere, aut schematibus ditare non item. In quo alios quidem alijs longe praestare atque excellere conspicias. Quibus placet uerborum puritas & splendor, quibus displicet sordidum & inquinatum loquendi genus, quibus elegans uerborum delectus, quibus apta & quasi rotunda constructione crecta, quibus non soluta aut diffuēs, sed suis numeris astricta, grata est oratio, laudem facile adipiscuntur: reliqua passim scriptitantium colluies, nullo est neque numero, neque nomine. Atque si à nobis latine pureque scribentibus, fructus quicquam percipi certe possit, hoc erit fortasse, ut deteriora sequentem iuuentutē, & ad corruptiora propensam, exemplo nostro ad antiquorum imitationem inuitemus, antiquorum lectioni inhaerentes. Quid igitur de illo iudicemus, qui antiquos neglexit, & prouerbialem inconditamque loquendi formam est sequutus? M O R. Omnia audenda docuit, superstitiosum uerborum delectum non habendum ostendit. V I L L. Docuit profecto, quae omnem ingenij commendationem euertant, non cursum ad illustria aperuit: inani uerborum farragine contentus, sibi plus satis indulgit, inepte ad blanditus est, omnia & licere, & decere, sibi ipse persuasit, scopas dissolutas amauit,

Omnia audenda docuit Erasmus.

amauit, expeditum & inconditè currentem sermonē,
 ac profluentem quoquomodo stili celeritatem pro- *Erasmī stilius.*
 bavit: teretem & sonore numerosēq; cadentem ora-
 tionem respuit, uerbis non inops, sententijs etiam fre-
 quens & creber, sed languidioribus, & quæ probabi-
 lem utcunque scriptorem magis, quàm mirandum,
 aut magnopere laudandum præbeant. Præstitit, quæ
 facilius quisq; consequatur, quàm sequi aut imitari
 studiosius uelit. Supinus iacere maluit, quàm altius
 erigi aut extolli. Plebeiam nominis celebritatem præ-
 stantiorē duxit, quàm raram & stupendam apud
 eloquentes famam: cuti expoliendæ, quàm confir-
 mandis nervis diligētius incubuit: linguæ prompti-
 tudinem, & loquacitatem grauitati antetulit. In uul- *In uulgu probari*
 gus probari cupijt, doctis frigere, sua non ita magni *uoluit Erasmus.*
 interesse putauit: uoluminum struem, non scriptorū
 elegantiam à se posteritati relinquendam censuit.
 M O R. Legitur tamen, & illustri gratia ab omnibus
 excipitur, non è manibus dimittitur, illi arridetur, ap-
 plauditur. V I L L. Scurras etiam & moriones animi
 gratia audimus, sed continuo satietate defessi. Neque
 mediusfidius natura ita comparatū ignoro, ut rebus
 ludicris facietis'que capiamur. Sed quis plus semel *Nemo plus semel*
 Erasmī scripta legat, uel regustet uorata? MOR. Tūne *Erasmī scripta lea*
 adeo Erasmī cōmentationes aspernaris? V I L L. Age *git.*
 uerò, eas mihi ordine recenseto, ut, quæ mea sit de
 omnibus sententia, intelligas. M O R. Quantū illi lau-
 dis ob tot reſtitutos auctore ueterum locos, aut ob tot

annotationes tribuis. V I L L. Dicā ingenuè, More, & sine ulla mehercule ironia, Ego Erasmi eruditionē, industriam, tanti ipse facio, quantum doleo, ingenij tam multi uirum, ad eos fructus nō peruenisse, quos nobis indole spondebat. Quò processisset, conijcio, si totum se ad eloquentiā contulisset. Sed ad institutum redeo. Illius annotationes summopere probō, neque mediocriter laudo, nulla tamen eloquētia ornatas uideō. Libros de copia rerum & uerborū, tum ex Cicerone, tum ex Quintiliano cōpilatos, dubiū est nemini. M O. Militis christiani enchiridion pluris forte facies. V I L L. Opus charitatis plenū, & theologi personam affectantis. M O. Dialogū in barbaros, & Moriae encomiū laudant uehementer omnes, admirantur multi. V I L L. Narras, in quibus magis Erasmi dicacitatem agnoscas, quā uim dicendi ullam contemplare. Ridet, eludit, delicias facit, lacepsit, increpat, lædit, cachinnum etiā in Christum tollit. Cōmutabile argumentum & uulgare, & ex triuiali aliqua schola ductum. M O R. Apophthegmata, nisi fallor, laudabis. V I L L. Indignus sene labor, & grāmatico, quā uiro ad laudem insigni aptior: Laude enim caret, tria aut quatuor, plurimū, uerba ad inuentum appingere, & scholia istiusmodi aspergere. Scite dictum, urbanè, facetè, iracundè, superbè, iocosè. Cætera quid tibi non ignorātī referā. M O. Epistolas ab illo editas silentio pene transierā. V I L L. Iacturā nullam Erasmi laudis fecisses. Ad epistolam uix quadrat, concio, declam

*Libri de Copia,
uerborum.*

*Militis christiani
enchiridion.*

Morae encomiū.

*Apophthegmata
Erasmi.*

*Epistolarum far-
rago.*

declamatio, disputatio, quæ Erasmo perpertua sunt. Atque siquid extra hæc in epistolam coniicit, quid præter assentationes? gratulationes? laudationes? quid præter inepta pro alicuius salute & dignitate uota? quid præter leues rerum gestarum narrationes, aut uanas de religionis Christianæ statu diuinationes? MOR. Prætermisram, quod à primo propo-
ni oportuisse putabis. VILL. Quid istud est?

MOR. Querimoniam pacis non commemorauit, in qua uires omnes suas periclitatus est. VILL. Histo-

*Querimonia pa-
cis.*

riam belle contexuit, exempla pulchrè congecit atq; cumulauit. Nihil artificiosè disputat, nihil argumens-
tatur, nihil probat, nihil dissoluit: nihil expeditum, nihil ornatum, nihil flexibile, nihil liquidum aut li-
berè fluens, nihil usquam non adhærescens: nullæ concinnæ, nullæ exquisitæ, nullæ reconditæ senten-
tiæ: nihil suo loco positum, nihil docens, nihil obles-

cans, nihil mouens: dura omnia, insolentia, humilia. MOR. Mirum sanè fastidium, & haud scio an libe-

rum & ingenuum, an maleuolentia concitatum. VILL. Maleuolentia nulla commoueor, ut hæc uel fastidiosè uel morosè colligam: quod res habet, liber est hic dicendi locus, nec Erasmo quicquam de-
rogo, hasq; iudicandi partes mihi sic arrogo, ut eas quidem doctis & eloquentia ornatis communes esse uelim.

MOR. Cætera quæ illi uel stertenti uel somnianti exciderunt, quæq; nimia præcipitatione, ues-

luti medicamentis abegit, & fudit certè potius, quàm

Colloquia Erasmi.

exornauit aut conscripsit, numerare in præsentia non habeo : iacebunt apud te minutula , qui multis uigi-
 lijs elucubrata spernis. Colloquia uero quem apud
 te obtinent locum, auctori suo tam iucunda? VILL.
 Simiæ mihi in mentem uenit , quæ formæ elegancia
 & uenustate cæteris facile animantibus antecellere ca-
 tulos putat suos : sic nænias suas Erasmus , perinde
 ac reliquis omnium scriptis & ornatiores & præstan-
 tiores ultro laudat, atque admiratur. Quid censes, nisi
 id quod certum est, neminem , præter illum , leuia &
 ridicula tanto studio laudaturum? MOR. Comœ-
 diæ non dissimilia sunt : quæ mores perditos notat,
 quæ dolos explicat , quæ diuersa mortalium studia
 persequitur, quæ patrum indulgentiam uel asperita-
 tem, quæ adolescentium mollitiem & luxum , quæ
 meretricum astus & fraudes, quæ lenocinia, quæ ille-
 cebras ob oculos ponit, quæ hominum uitæ ad mul-
 ta conducit. VILL. Vtilia multa uitæ exempla
 suggerit comœdia : quæ quàm utilitatis plena est,
 tam inania sunt rerum, quæ prædicas Erasmi collo-
 quia. Quercum concionantem , Betam sapientem
 narrant: coquorum cōgressum , combibonum com-
 potationes , Monachorum imposturas loquuntur:
 pueros caput aperire, comiterq; salutare docent. En
 summa illa utilitatis commendatio, en fructus, en uos
 luptas, en commoda, quæ ex nænijs tam laudatis ca-
 pias. Præ Erasmi colloquijs, nulla neque Longolij,
 neque æqualium quorumuis nostrorum scripta uti-
 lia

*Quid in Collo-
 quijs Erasmus.*

Ironia.

lia, nulla fructuosa, expetenda nulla. Qui literas in hoc discunt, non solum ut politius dicant, uerum etiam ut rectius uiuant, actutum ad colloquia Erasmi concurrant, ea legant, ea discant, ea memoriæ mandent. Dicent politè, ut Erasmus: uiuent rectè, ut Erasmus: omnia denique, ut Erasmus. Prudens & fidele consilium. At perniciosa fuit eorum adhortatio, pessimeque de re literaria meriti sunt, qui Longolium ad uulgaris laudis ambitum inflammarunt. Tuam Bembe prudentiam, tuam Sadolete sapientiam accusari intelligo. Cruce & laqueo digni homines, aut in culcum iudicio legibusque insuendi, qui tam eximium adolescentis ingenium ad inepta traduxistis, qui ad inanem Ciceronis imitationem, non ad fructuosa & succulenta Erasmi Colloquia ediscenda, iuuenem uestra adhortatione excitastis. Iure uos iniuriarum postulet res literaria, cui, sic deprauato Longolij & animo, & ingenio, damnum tam graue intulistis. Iure uobis actionem intendat, iure dicam impingat, qui aptissimum rebus illius augendis adolescentem, ad aliud gloriæ studium reuocastis. MOR. Non tuo hoc sermone ab Erasmo alienabis, quos summa beneuolentia implicatos habet, ueterisque amicitia coniunctissimos. VILL. Alterum, scio, lenitas mansuetudoque, alterum comitas impediet, ne cum garrulo sene, & ad dicacitatem nato similitatem suscipiat, aut acceptam iniuriam ulciscatur. MOR. Amicos ad odium uocare, aut inter se committere desine, tuum de Longo

*Bembus & Sado
letus accusati ab
Erasmo.*

lio iudicium profer. VILL. Desino, & quæ mea sit de Longolio sententia, tuo iussu profero. MOR. Sed uide, ne illi minora tribuas, quàm tibi iam pridem suis epistolis ascripsit. VILL. Mihi quid tribuerit, memini: quare par pari referam. MOR. Sic mutuo muli scabunt. VILL. Referam ueritate perpulsus, quæ ille amore adductus, mihi ultro detulit. MOR. Gratum hominem & memorem. VILL. quid nunc sic sum planè natura factus, ut officia apud me posita interire non patiar, aut obliuione intermori. Longolium antepono Erasmo, qui me Erasmo anteponit. MOR. Grate factum & amice, sed minus fortasse uerè. VILL. Accedet hoc amplius. In una Longolij epistola plus eloquij, plus artis rhetoricæ, plus linguæ Latinæ splendoris elucet, plus acuminis est, plus inuentionis uiget, quàm in omnibus ad unam Erasmi commentationibus. Nempe Longolio non ad quæstum fuit, non Frobenij prælo incumbendum, non satisfaciendum. Id quod Erasmus coëgit, ut omnia præcipitaret atque proijceret, non matura ederet: ut abortiret, concepta suo tempore non pareret: ut magnos scribendi processus efficeret, ut euolaret, non excurreret: ut magis inops esset, quàm figuris abundans, ut magis horridus quàm nitens, ut magis squallidus, quàm politus & excultus, ut magis grauitatis fastidiosus, quàm cupidus. Longolio contrà ea una fuit studiorum proposita & expectata merces, ut nihil uel equalium uel posterorum iudicio indignum scribere

De Longolio iudicium.

Quæ Erasmo causa ut omnia præcipitaret.

scriberet: ut grauissimis acutissimisq; commentationibus sese acerrime exerceret, ut in inueniendis componendisq; rebus miram accuratationem præstaret, ut oratione amplius esset, ut non uerbis abiectus, ut non feruido & petulanti & furioso conuulsiuosoq; genere dicendi uteretur: ut non tanquam ignotus & repentinus in oratorum numerum ueniret, sed illustri antea fama celebris & spectatus, primas sine controuersia inter disertos ætatis nostræ teneret: ut non unus è multis, sed inter multos singularis esset: ut non incautus, dicam uel plus etiam quàm incautus: ut non hebes in causis, ut non socors negligensue, sed prudens solersq; uideretur. Assentatoris nota turpissimè inurar, uelim, nisi quæ illi tribuo, longe cumulatiora esse & uberiora, docti omnes cum fateantur, tum testificentur. MOR. Orationis copia, splendore, acumine Longolio primas nemo præripit, sed eruditioris doctrinæq; magnitudine & præstantia, ut orator philosopho, sic Erasmo non iniuria cedit. VILL. Occurrunt ad tempus, quæ de Longolio Paulo ante prædicasti, illum scilicet magnum alijs dotibus, etiam si Ciceronianus non fuisset: per omne autorum genus sese uoluerat, disciplinas liberales omnes diligenter edidicerat, ultra iuris peritiâ. Tua ipsius confessione teneris, repugnantia tibi non obijcies. Fuit ille magnus alijs, quàm artis oratoriæ insignibus, uiro eloquenti & diserto multa simul doctrina suppeditauit: plurimis literis, non ijs certe uulgaribus, sed in-

g terior

Qua re Longo-
lius Erasmo ce-
dit.

Erasmi & Lon-
golij collatio.
Erasmus.

Longolius.

terioribus & reconditis abundauit. Erasmo rara alios
qui eruditione ornato defuit eloquentiæ splendor,
& exquisita dicendi scribēdiq; facultas : cui si re ulla
cedet Longolius, scriptitationum congerie, & uolu-
minum turba cedit. Sed plus libro uno laudatur
Persius, quàm loquax ille poëta tota Amazonide.
Itaque uter utri præstet, cum parta gloria, tum fru-
ctu & utilitate adferenda, facile sic consequemur.
Perpetua est alteri stili exilitas, siccitas, ieiunitas, &
penè inopia. Verum eloquentiæ sanguinem libenter
deperdit, ut uitiosum colligat : sanitatem & integri-
tatem orationis negligit, insulsitatem & ineptias am-
plectitur. Fractum, attenuatum, aridum, strigosum,
minutum, corruptum, puerile, putidum dicendi ge-
nus probat : syncerus, purus, politus, acutus, concin-
nus, sui semper similis, grandis, mollis, mitis, matus-
rus, pellucens, non hiulcus, non asper, aut esse aut ui-
deri odit. Alter optimè institutus, & perfectè planēq;
literis eruditus, uerborum splendore elegans, compo-
sitione aptus, facultate copiosus, accuratius quoddā
& exquisitius dicendi genus sibi sequendum duxit.
Tractauit eleganter & scienter pro suo acri & uehe-
menti ingenio, quæ pleniora sunt & grandiora. Pu-
duit ad excelsa natum & aptum iuuenem, exiliter an-
gustēq; dicere : dixit humilia subtiliter, magna graui-
ter, mediocria temperatè. Digna subfellijs, digna ro-
stris, digna foro, digna multiplice & frequente coro-
na, digna totius Italiæ concursu, digna iudice erecto,
& attentè

& attentè audienti conatus est animosè, perfectèq;
 summa arte & prudentia. Sublatam iudiciorum ra-
 tionem, causasq; dicendi morem ingeniosè retulit:
 scripsit, quæ supra æqualium nostrorum vires esse fa-
 cile concedamus, feliciq; illi antiquorum oratorum
 ætati assignemus. Adeo, ab illis tempore tantum
 abest, non ullis eloquentiæ ornamentis, aut gloria:
 antiquos Romani eloquij principes propius subse-
 quitur, exprimit, repræsentat. Cuius tam amplæ &
 cumulatae laudis invidia semiustus Erasmus, dialo-
 gum Ciceronianum euomuit: finxit, sub cuius perso-
 na, Longolij studia rideret, conatus aspernaretur, glo-
 riam infringeret: maioris impatiens, Longolium lau-
 de maiorē, possessione laudis exturbare adnixus est.
 Laudes tamen aspersit detrahendo & maledicendo,
 odium ne suum plus satis patefaceret, omnibus nihi-
 lominus perspectum. Non aliud senem invidia fla-
 grantem ad vulgarem illam de imitatione Ciceroniae
 na disputationem conscribendam adduxit, quàm
 Longolio detrahendi studium. quod quoniam à me
 satis probatum est, hoc loco mihi ipse admoneri ui-
 deo, ut ad eam partem, quam de imitatione propos-
 fui, nunc tandem ueniam, & Erasmi dialogum per-
 curramus. MOR. Hoc à te fieri cupio, mallemq;
 iam factum, quàm Erasmo tam uehementer recla-
 matum. VILL. Erasmi laudibus tam ipse amicus
 sum, quàm qui maximè, sed nec popularis senis au-
 toritas, nec gratiosum apud multos nomen, me quis-

*Quid Erasmus
 impulit ut dialo-
 gum Ciceroniae
 num scripsit.*

dem terrebit, quin, quæ uera sunt, & uera esse mecum sciunt omnes, liberè atq; intrepidè dicam. De eruditione & doctrina Erasimum plurimū semper & amauī, & laudaui, morum candorem & animū beneuolum, modestiam constantiamq; in eo sæpe requisīui.

Cur Erasmus toties in Longolij memoriam incurrat.

Quò pertinet toties in maledicam Longolij mortui memoriam incurrere? toties de illius studijs mentionem facere? toties inanes (ut uocat) illius labores conatusq; miserari? toties quiescenti obgannire? Pascitur iniqua cōmemoratione, ægrotans ex inuidia animus; dolorē leniri, uel parte ex aliqua leuari posse sperat, quum de dolore cū amicis per literas cōmunicat. Hinc creber ille in epistolis florulētis de Lōgolio sermo, hinc ille aliquādo risus, hinc illa interdū obtestatio. MO. Lōgoliū causam, obtestor te, misā iam faciamus, & ad institutū sermonē ueniamus. VII. Lōgius mihi nihil erit, hoc mihi modò des, non tanquā unus aliquis ex indoctorū grege, sed ueluti existimator doctus & intelligēs, des hoc mihi inquam, Erasimū iuuenili quadā dicendi impunitate & licētia, scriptorū numero, tantūm apud rudes & barbaros magnū, nulla eloquētię laude Longolio proximū: simul hoc fatear,

Apud quos magna Erasmi auctoritas & multum nomen.

Longolius longe Erasmo præstantior.

re, & mihi, si libet, largiaris, Longoliū omni doctrinæ & artis dicēdi gloria non Erasmo secundū, sed illum longe plurimumq; anteire: hoc ipsum dum recte omniumq; assensione cōcedes, nō te rogabo, ut Erasmi libris utiliora scripta Lōgoliū, uel doctis gratiora & acceptiora esse mihi annuas. Istud quidē te etiā renuēte & neg

& negāte, uerū facile credet, qui id sciēt, bonā Erasmi operū partē, eo uiuo iam interijisse: quas nullæ postea literæ, nulla uox, nulla fama notas cuiquā faciet: iuueniles Lōgoli cōmentationes desiderari & expeti, orationes uirili & grauiore iudicio scriptas, summa uoluptate & admiratiōe à doctis omnibus legi & laudari. **M O.** Non temerè fit, Villanouane, officiū si solum sequamur, & amici existimationi inferuire cupiamus, ut arcem sæpe ex cloaca faciamus, uel ex musca elephantem. Ego uero Erasmo, si quis aliū, plurimum & faueo, & studeo, neque quenquam laude cumulationem arbitror. Veruntamen quā rectè uerèq; iudicem, docti ipsi uiderint, & scriptoris, tam luculenti laboribus saltem, & diligentiae industrièq; applaudent. **VILL.** Laborem laudant omnes, & admirantur: stili puritatem, elegantiam, grauitatemq; requirunt. Sed eodem relabimur, hoc iam satis disculimus. Nunc te audio: capita Ciceroniani dialogi persequere, at præcipua, & ab ineptijs uacua. **M O R.** Ciceroni qui studiosius operam dant, morbo grauissimo affectos fingit: quam interiorem luem, non phthisin, aut icterum, non malum in pulmone insidens, non febrem, sed nouum lepræ genus uocat, in uenis & corde grassantis, interius quiddam adurentis, ab intimis animi penetralibus, quæ in cerebro sunt, proficiscentis. Imò uerò dementiæ genus appellat, quod non totam mentem adimit, sed unam modo partem animi infuscat, uerūm insigniter: ueluti sunt,

g 3 qui

Bona Erasmi lucubrationū pars eo uiuo intercidit.

Ciceronis imitationem nouū lepræ genus Erasmus uocat.

qui sibi uidentur capite taurina gestare cornua, aut naso prælongo onusti, aut ingens idq; fictile portare caput, exili collo innixum, mox comminuendum, si se uel tantulum commoueāt. At non tanta est morbi acerbitas, quin medicinam se facturum speret, & polliceatur Erasmus. V I L L. Egregium certè medicum: medico tamen nihil opus est, ubi nullus neque morbus, neque uitium. Insani esse potius putem, animo sanis & beneualentibus medicinam uelle adhibere. Num extremæ dementiæ est, eloquentiæ studium interpretari insaniam? Quis in hunc modum insano medicinam faciat? Tanta insaniam si quis esset, quanta est Erasmus, isti insaniam medicum se offerret. Verum insaniam non herbis aut potionibus superamus, recto & prudenti consilio, sapientiæq; depellimus: quoniam Erasmus caret, quis eum in desperatis habendum mihi non assentiatur? Bella mehercule & pulchra translatio, insanos eos appellare, qui Cicero ni imitando incumbant. Istam insaniam consilio suo, & adhortatione concitauit Quintilianus, his nos uocibus ad insaniam rapuit. Ciceronem unum spectemus, hoc propositum nobis sit exemplum, ille se profecisse sciat, cui Cicero ualde placebit. An non constringendus Quintilianus? an non loris cædendus? qui iuuenum animos ad insaniam excitat? An non singularibus honoribus dignus Erasmus, qui ab insaniam nos reuocat, qui sanitatem restituit, qui Cicero nis imitationem fugiendam admonet, qui per omnia scripto-

Quintilianus imitationis Cicero-
nis suasor.

scriptorum genera peruagandum hortatur? Atqui pluribus fortè, quàm sanum deceat, cum insano agimus: reliqua expecto. M O R. Istiusmodi insanix morbo confectus nuper Longolius è uiuis excelsit. V I L L. Quaqua parte impetum in Longolium facit: quem ad extremum tantum perstringere decreuerat, statim à principio lædit. Iam qua insania ipsum illum sese in Ciceronis lectione exercuisse narrat, summatim, quæso, complectere. Inani sermone perstrepen- tem, & uerborum copia circumfluentem redundan- temq; Erasmus audire molestum est: paucis omnia comprehendito, scurræ dicacitatem præmittito. M O R. Faciam. Annos septem totos nihil attigit, præter libros Ciceronianos Longolius, à cæteris non minore religione temperans, quàm Carthusiani tem- perant à carnibus, nequid alicunde hæreret alienæ phraeos, ac ueluti labem aspergeret nitori Cicero- niani sermonis. Proinde, nequid peccaret impru- dens, quicquid est aliorum codicum, submouebat ab oculis, nec ulli prorsus erat locus in illius biblios- theca, præterquam uni Ciceroni. In Ciceronis scri- ptis euoluendis ac reuoluendis adeo erat assiduus, ut totum propemodum edisceret: nulla est in omni- bus diuini uiri libris uocula, quam non in lexicum alphabeticum digessisset. Annotarat iuxta literas- rum ordinem formulas loquendi M. Tullio pecu- liares. Congesserat in uolumen pedes omnes, quibus Cicero uel incipit, uel finit commota, cola, periodos,

*Longolij studiū
irridet Erasmus
in Ciceroniano
dialogo.*

quibusq; numeris horū media temperat, tum quibus
sententijs quam modulationem accōmodet: ut ne tan
tillum quidem posset subfugere. VIL L. Pulchrum
Longolij studium commemoras, quod licet Erasmus
rideat, rectè tamen constitutum atque apparatus
censeo: neque mehercule tam morosa fuit Longolij
in uerbis cura, uocem ut nullam nisi ex elencho Cice
ronianæ dictionis erutam, in scripta sua conijceret:
neque ea in compositionis ornatu, stiliq; forma solis
citudo, ut omnia ad Ciceronis lineamenta supersti
tiosius exigeret. Ridiculam uerborum calumniam fu
giebat, uocem nullam reformidabat, quæ uernacula
esset, & urbis Romæ propria, quæ uel autore aliquo
non pessimo defendi posset. Stili mora, aut religio
sa tarditate, nihil ausus est minus feliciter, nihil eam
ob rem lacerum, nihil ieiunum conatus est, aut scri
psit: sermonis ingenijq; libertatem impediri, animi
sui aciem, & generosos impetus, anxia inutiliq; cogi
tatione frangi aut retundi noluit. Ducem Ciceronem
in scribendo habuit, non in illius uerba sic iurauit, ut
nihil suo arbitratu tentaret. Demonstrat tamen, id
quod in præceptis oratoris primum est, cuius potissi
mum similis esse studuit, atque ita, ut quæ maxime in
eo excellant, ea quàm diligentissimè persequatur.

De imitatione. Itaque hîc non extrahendum, quin de imitatione uer
ba ipsi faciamus, sed quanta maxima fieri poterit bre
uitate, in Longolium perpetuò intuentes, ut nosca
mus, rectè ne ista artis oratoriæ parte usus sit. Artis
pars

pars magna (si Quintiliano fidem habemus) quin *Ex Quintiliano.*
 imitatione contineatur, dubitari non potest. Nam ut
 inuenire primum fuit, estq; præcipuum, sic ea, quæ
 bene inuenta sunt, uelle sequi. Atque omnis uitæ ras-
 tio sic constat, ut quæ probamus in alijs, facere ipsi
 uelimus. Sic literarum ductus, ut scribendi usus fiat,
 pueri sequuntur: sic musici uocem docentium, picto-
 res opera priorum, rustici probatam experimēto cul-
 turam in exemplum tuentur. Omnis deniq; discipli-
 næ initia ad propositum sibi præscriptum formari
 uidemus. Et hercule necesse est, aut similes bonis, aut
 dissimiles simus. Similem raro natura præstat, fre-
 quenter imitatio: quæ Periclem atq; Alcibiadem &
 eadem ætate Thucydidem, acutos, subtiles, breues,
 sententijs magis, quàm uerbis abundantes scripto-
 res, similes inter se effecit. Non potuisset enim (ut in-
 quit ille in oratore) accidere, ut fuisset unum omnium
 scribendi genus, nisi aliquē sibi proposuissent ad imi-
 tandum. Consequuti sunt hos Critias, Theramenes,
 Lysias, qui omnes illum Periclis succum retinuerūt,
 sed fuerūt paulo uberiore filo. Fuit semper aliquis, cu-
 ius se similes pleriq; esse uellēt. Sit igitur in arte dicen-
 di præcipuum, ut unius alicuius similitudinem imita-
 tione assequi contendamus: id quod tum exercita-
 tionibus crebris, tum magnis, tum maximè scriben-
 do adipiscimur. Imitationem uero tribus potissimū *Imitatio tribus*
 constare non ambigis, uerborum copia, sententiarū *constat.*
 uarietate, & componendi ratione. Copiam autem uer-
 h borum

Uerborum delectus.

Antiquum lingua latine tempus.

Ciceronis nomen, non hominis, sed eloquentiae nomen est.

borum sordere prorsus scimus, nisi in ea delectus habetur: cuius & ducem & principem esse Ciceronem non negaris. Etenim Liuium Andronicū, Appium Cæcum, Cornelium Cethegum, Ennium, Næuium, Plautum, Ceciliū, Pacuuium, Actium, C. Laeliū, P. Scipionem, Gracchos fratres ante perfectum illud Linguae latinae tempus, omnia antiquè, pleraque durè loquutos memoriae proditum est: quorum asperiores & horridiores sermonem, uerbisq; tritis auribus & eruditæ Romæ intolerabilia inuauit posterior ætas, duramq; & ieiunam sermonis formam sustulit, atq; unctiorem quandam & splendidiores loquendi consuetudinem induxit. Quæ felici ætate floruit ille disertorum & eloquentium uirorum cœtus, Hortensius, Cæsar, L. Domitius, M. Claudius, L. Torquatus, Brutus, Cælius, Seruius Sulpitius, P. Lentulus. At quis in tanta clarissimorum oratorum multitudine primas in eloquentia tenuisse dicitur? Ciceronem nemo ultro non respondet: in quo linguae Latinae lumen splendorq; eluxit, cuius nomen non hominis est, sed eloquentiae: in quo uerbum nullum asperum, nullum durum, nullum horridum, nullum insolens, nullum humile, nullum in longius ductū, nullum improprie translatum, nullum desitum, nullum obsoletum, nullum antiquatum. MOR. Quorsum hæc? VILL. Ut intelligas, primam imitationis partem, si splendida & pura uerborum copia atque ubertate constare putemus,

mus, non aliunde, quàm à Cicerone eam aut queren-
dam esse, aut comparandam: in quo nihil nouum,
nihil Romani sermonis principum iudicio non com-
probatum. Quòd, si qui Gallicè, Italicè, Hispanè ue-
scire cupit, cum ijs uersari necesse habet, qui Gallici,
Italici, Hispani ue sermonis rationem exactè tenent:
an Latinè loqui cupienti, unum Ciceronem legendū
non existimes, purissimum linguæ latinæ fontem,
flumen, oceanum? Fac aliquot esse uerba uel ad
rem rusticam, uel ad fabrorum arteis, uel ad suppel-
ctilem domesticam, uel ad Medicos, Chirurgos,
Astrologos, Pictores, Architectos, Cetarios, Lanios,
Pistores, Fartores, Coquos, Vnguētarios pertinētia:
an ita certè multa sunt, ut eorum partem tibi non
promat Cicero, partem aliunde uel sesquihora accer-
sere nequeas? At illam uerborum congeriem, qua
communis struitur fabricaturq; oratio, quis æque
puram, splendidam, ornatamq; ac Cicero suffi-
ciat? MOR. Confert igitur nihil reliquorum auto-
rum lectio. VILLAN. Confert planè nihil, quod
ad uerborum copiam ubertatemq; faciat: eruditio-
nem forte auget, & historia exemplisq; cumulat.
Latinè loquatur Liuius, Plinius uterque, Quīntilia-
nus, Gellius, Columella, Vegetius, Vitruuius, Se-
neca: non alijs tamen uerbis, atque Cicero, utuntur,
sed aliter compositis, hiulcè sæpe & uastè contextis,
nec ad numeros latinos, & germanam linguæ lati-
næ phrasim cadentibus. Quare qui latinè loqui

*Pura uerborum
copia non aliunde
de quàm à Cice-
rone petenda.*

*Latinè loqui cu-
pienti unus Cice-
ro legendus.*

hi 2 optet,

optet, unum ei Ciceronem imitandum cenſeo, nullo
lum præterea adiungendum aut ad ſermonis puri-
tatem, aut elegantiam. MOR. Sic nulla eſt exce-
ptio. Ciceronianus non erit, in cuius libris, uel una
dictiuncula reperiatur, quam non poſſit in Cicero-
nis lucubrationibus oſtendere, totamq; phraſim ſcrip-
toris, non aliter, quàm adulterinum numiſma, res
probam iudicas, in qua uel unum uerbum reſede-
rit, quod Ciceroniani characteris non habeat no-
tam: cui ſoli, uelut eloquentiæ principi, datum eſt à
ſuperis, Romani ſermonis monetam cudere. Iſta
lex ſeuerior eſt etiam Draconis legibus, ſi ob unam
dictiunculam parum Ciceronianam, totum uolus-
men damnatur, quanuis aliàs elegans & facundum.
Non ferenda eſt iſta moroſitas atque faſtidium, ut
ſcriptum alioqui doctum & elegans reiicias, & indi-
gnum lectu iudices, non ob aliud, niſi quòd ad Cice-
ronis imitationem non ſit elaboratū. VILL. Falfò
& ineptè colligis More. Cicerone uno, præterea
nullo, cum utendum moneo, ſic certè moneo, ut,
quæ apud Ciceronem reperiās, non aliunde accerſas,
quæ deſunt, à puro & bene Latino ſcriptore mutue-
ris: quanquàm uix mihi quiſquam perſuadeat,
Ciceronis libros ita uerborum inopes, ut ad rem
quàmlibet & ornatè & plenè tractandam, ſermo-
nis copiam non adminiſtrent. Obteſtor te, Cicero-
nianum nomē inuidia libera, pro Cicerone, penum
linguæ

linguæ Latinæ audi. An quæ in penu sunt integer
 rima & optima omnia, tibi non ului esse malis, quàm
 aliena, eaq; corrupta & inquinata, undique corroga
 re? an præposteris es usque adeò ingenij, ut fruge
 oblata, glande uesci in delicijs habeas, ut aliorum for
 des mireris, diuinitus à Cicerone acceptam, & nobis
 relictam linguæ Latinæ puritatem candoremq; ne
 gligas? Ne tu hoc loco nostram morositatem accu
 sa, quibus nihil quicquam probari quereris, quod
 Ciceronianum minimè sit. Quod Ciceronianum est, *Quod Ciceronia
 num est, Latinū
 esse.*
 Latinum illud uocari placet: nihil enim Ciceroni
 proprium, quod Latini quondam non probarint,
 quod non receperint, quo non usi sint, quod non ele
 gans, tersum, & uenustum putarint. Quid tuus Era
 smus? Prouerbiale suum forte loquendi genus ob
 seruari cuperet: Ciceronianum, quod Latinum in
 terpretor, odiosè uitari uellet atque explodi. Scripto
 res omnes Latinos diligenter uoluendos & accurate *Scriptores omnes
 legendi, sed nul
 lus imitandus præ
 ter Ciceronem.*
 studiosèq; legendos uerat doctus nemo: extra Cicero
 nem quenquam ullum imitandum nemo quoq; pau
 lo doctior suadet, à quo reliquis omnibus aliquid ac
 celsit, cui nihil à cæteris acceptum est, ad quem reliqui
 sese effinxere, qui nullius autoris Latini imitatione
 usus est, sua sponte omnibus numeris absolutus &
 perfectus, reliquis omnibus maior, nullo neque Græ
 co neque Latino inferior: ad cuius imitationem con
 tendere illustrius sit, quàm reliquorum eloquentiam
 superare præstantius. Certè si alijs operam dandam,

aut horas aliquot tribuendas adhorter, his nominibus abhortabor: Primum, ut quid à Cicerone, tum *Quare reliqui* uerborum, tum sententiarum, uel sumant, uel surripiant, uel mutuentur, deprehendamus, & ad illius imitationem alacriores efficiamur, à quo magni etiam *scriptores legēdi.* nominis scriptores multa sumere perspiciamus. De

Simile. inde, ut, quemadmodum qui de recta declinant, ubi in deuia aliquantum aberrarint, & per salebrosos minimeq̃ planos locos iter languentes fecerint, optatius in uiam redeunt, atque rectà attentius inambulant; sic per omnia autorum scripta satis prima ætate diuagati, errore tandem percepto, nos ad Ciceronem cupidius recipiamus, totosq̃ conferamus. Postremo, *Simile.* ut, sicut obtusum quotidiani cibi suauitate palatum, aceto aut acerbiori aliquo iure irritamus, gustatuq̃ consulimus, ita assidua Ciceronis lectione contrastum, si quod contrahi potest, fastidiū, autorum crudiorum acerbitate depellamus: aut, quasi oscitantes & obdormientes, incondito aliorum scriptorum strepitu & murmure excitemur, ac noua relictæ uoluptatis, id est, intermissæ Ciceronianæ lectionis cupiditate subfiliamus. Re alia ulla, quàm ista alacritatis renouatione scriptores omnes magis conferre aut prodesse non opinor. M O R. Qui fit tamen, ut qui à Ciceronis lineamentis non recedunt, ipsi ferè adeo Ciceroniani non sint, ut subinde destituantur grammaticæ subsidijs? V I L L. Niuem atram loqueris, remq̃ narras in omni memoria inauditam. Nouum est, & incre

incredibile, ut qui in tam alto & profundo flumine
natet, non se, quò uelit, impellat, ferat, rapiat, & aqua
rum gurgite ex animo non utatur, modo natandi pe
ritus sit, nec subere aut cortice indigeat, MOR. Aenis
gma. VILL. Breuibus explicabo. MOR. Age.
VILL. Incredibile, ut cui sit familiaris Cicero, illius
opes communes non habeat, modo antea doctrina
sit liberaliter institutus, & aliquo scribendi imbutus
usu, nec ingenio satis acri careat. MOR. Rem nihil
dum teneo. VILL. Aperte dicam. Simile ueri non
est, aut ulla ratione probabile, ut qui Ciceroni ope
ram det, & in illius lectione accurate uersetur, uerbo
rum elegantia, sententiarum gravitate, compositionis
lenitate, & aquabili fluxu, diues non sit & beatus.
Ne arbitrare in Ciceronianis à me numerari, qui col
lectas ex Cicerone aliquot loquendi formas, passim
& ubique inculcant, grammaticorum elementorum
interdum ignari. Ciceroniani nomen ei tribuam, qui
Ciceronem diligenter legerit, qui Ciceronem intus &
incute nouerit, qui Ciceronem una lectione (ut tuus
Erasmus librorum helluo) non uorarit aut absorbse
rit: sed sensim delibarit, degustarit, regustarit, exhaus
serit, beneq; cōcoxerit. Expectas quem tanta diligen
tia in Cicerone uersatum nomen? Longolium
profero. Ciceronianum agnoscis. An grammaticae
subsidijs destitutum? An ieiunum? an attenuatum?
Illum tu cum Erasmo committe, orationis argumen
tum utriq; dicta. Tremit iam metu, non senectute
h 4 Erasmus

*Qui Ciceroniani
nominandi.*

*Ciceronianus
Longolius.*

Julius Cæsar Scaliger orationem in Erasmus scripsit pro M. Tullio Cicerone.

Ad Scaligeri orationem Erasmus non respondit.

Que Erasmi uires & conatus.

Ironia.

Erasmus, terret senis canos adolescentis pubes : premit inter mortuos senis sensus , crescens adolescentis ingenium : uincit senis balbutiem elegans iuuenis sermo. Iulium Cæsarem Scaligerum tibi hic obijcerem, uirum Ciceronis lectioni multum deditum, in quo grammaticæ subsidia non desideres, dicendi facultatem laudes : sed quam Erasmo plagā infixit, Longo iam tempore obductā, sermone meo refricare nolim : hominē prudēs penē præterij, ne Erasmi dolor recrudesceret. Superat omnem sanē admirationē diuturnum istud senis garruli silentium. Mirum est, maledictis appetitum senem, balbutiendi garriendiq̃ ansum non arripuisse. Sed mirum ei non accidit, qui Erasmus nō ignoret, sciatq̃ uelites ab eo & tyrones audacter lacessi & urgeri : ueteranos & ualentes lanistas non temerē uel ostenso digito offendi. Stunicas, Sutores, Bædam, Hispanum Monachum, aliosq̃ leuiores impetus ferre quidem potuit, fregit loquacitate, impulit audacia : eloquentiæ præsidio munitioribus neque obnuitur, neque resistit : uictoria coactus cedit, manus dare non dubitat, uicti nomen his uocibus à se repellens. Furit Scaliger, maledictis certat : ignota pugna Erasmo, inuisum certamen Erasmo. Ratione, non conuitijs pugnat, stomacho nullo est, omnia modicē, omnia temperanter, omnia constanter. MOR. Non Scaligeri eloquentia, sed conuitia, Erasmus à respondendi sententiā abduxerunt. VIL.

Intelli

Intelligo: conuitiosus conuitiosum, ut canis mordax canem mordacem, timet: bene est, ego, unde mea digressa est oratio, iam reuertor. Verborum copiam ita à Cicerone comparandam monemus, ut desatur à nobis opera, ne integros uersus mutuemur, aut quasi centones quosdam ex Ciceronis uerbis consuamus, uel, quæ apud illum rariora sunt, potius imitemur, quàm quæ usitata & passim occurrentia. Præcipuum sit hoc quoque, ut illius uerba omnia tanquam in emblemate uermiculato exposita dispiciamus, animaduertamusque quid elegans, quid mundum, quid proprium, quid translatum, quid in alienum locum immigret, quid in suo consistat: quid uariè structum, quid diuersè: quid purum sit & simplex, quid collocatum, quid compositum & coniunctum: quid duplicatum quid exaggeratum, quid iteratum, quid commutatum, quid ornatus causa iniectum, quid officio fungens & necessarium, quid stridens, quid lene, quid fluens, quid adhærescens. Animaduersa sic proprietate atque significatione uerborum, tuto ad sententiâs progrediemur. Sententiarum uarietatem, uim, copiam, grauitatem administrat magis natura, quàm imitatio. Neque aliter pictoris labor in irritum cadat, qui ad singulos linearum ductus, penicillos paratos, coloresque in promptu non habeat, quàm qui orationi conficiendæ incumbens, sententias aliunde colligat, non eas ultro benignè que offerentem natura

Quomodo uerborum copia à Cicerone petenda.

Quid primum in Cicerone legendum attendendum.

Secunda imitationis pars.

Simile.

turam sequatur. Ciceronis tamen lectionem in hoc genere maxime necessariam arbitramur, ut uelut consopitam somno cogitationem nostram, uel eam ipsam oscitantem & dormitantem suscitet & exaucuat: animūque percutiat, eorum, quæ illustria, insignita, explicataque legimus, traducta in memoriam imago: ac quæ inchoata sunt & rudia tantum in animis nostris sensa, in uim maiorem deducat, faciatque, ut scribentibus nobis præsto sint ea & accincta. Recordamur multis sæpe locis, quid acutè, quid grauiter, quid remissè Cicero: quæ quanquam non ipsidem uerbis, aut non eodem orationis sono ad rem nostram transferamus, iuuant tamen & ad similitudinem inuitant, nihil minus quàm inuentis alienis similem: sicque unius uerbi imagine, totius sententiæ sæpe fit informatio. Aqua dum nobis interdum hæret, & cum perplexi in medio cursu sublisimus, obuiam prodit loci in eandem rationem à Cicerone tractati memoria, quæ nos dubitantes impellat, & excogitationi nostræ animos faciat, doceatque, quatenus aut pes in rem præsentem effe-

Simile. rendus sit, aut à propositio referendus. Atque licet uiam, qua nobis aliquod proficiscendum est, non ignoremus, & late semita pateat, tamen si, qui illac iter rectè fecit, eius uestigia appareant, tametsi pedem in eadem non imprimamus, dubitationem omnem sanè adimunt, &, ut sine erroris suspitione inambulemus, admonent. Sic, quanuis

comm

communis est sententiarum excogitatio atque uarietas, ijs tamen ut rectè commodèque utendum sit, uiam quasi indicat & ostendit Cicero sententijs omnium maximè creber & frequentatus. In quo imitando quid impedit, quin aurificum industriam atque artem æmulemur? an si à te braceam illi accipiant, non eam, si libet, sic immutent, ut nihil formæ primæ maneat? an non ex catello leonem, tum ex Leone catellum consent? Ita sententias ex Cicerone collectas sic inuertere arte nostra possumus, ut sua, si uiuat, Cicero non agnoscat, ut furti non agat, ut nihil iure repetat. Quapropter, quandoquidem sententiæ lumina sunt & gemmæ orationis, non ex stercore eas conquirendas eliciendâsque putem, sed ex ditissimo Ciceronis mundo, gemmis lectissimis & undique perluculentibus spectabili. Sententiarum uero uarietatem sic nullo negotio, Ciceronem legendo dignoscas & quæras, si omnia eodem semper modo oratori non dicenda intelligas, si, ut ipse, omnes locos ingeniose scrutere & peruestiges, ex quibus eruas argumenta, obseruésque ut ille uerecundis (quod fere fit) minimèque pugnacibus principijs, ut intensis, (quod raro faciendum) ut elatis, ut uel ad offensionem aduersarij, uel ad sui commendationem paratis, ut narrationibus explicatis & dilucidis utitur: ut tenue filum in docendo sequitur, ut callis

Simile.

dius & argutius interdum argumentatur : ut pro ratione temporis, & causæ natura, iudicium animos flectit, afficit, regit : ut quibusdam locis uim eloquentiæ totam expromit, ut sese totum numerosè & uolubiliter fundit, ut res auget & amplificat, ut neruosiùs, uehementius, concitatiùsque insurgit, ut leniter se remittit, ut lamentatione & plangore forum aliquando complet, ut omnia aptè, eleganter, peritè, prudenter, ingeniosè, artificiosèque agit. Ea ipsa qui animo percursa habebit, sententiarum non carebit uarietate aut copia.

Postrema imitationis pars.

Sed de his hactenus. Sequitur, ut, quod ad extremam hanc imitationis partem seruauimus, breuiter à nobis explicetur : dicamùsque de compositionis lenitate. Lenitatem compositionis efficiunt sonus ipse, & numerus, quibus stylum à stilo facile distinguas. Soluta autem quanuis sit oratio, ingredi tamen & procedere libere debet potius, quàm uel uagari, uel licenter errare. Circumscriptione & ambitu, tanquam in orbe inclusa currat, ac in quadrum numerumque redigatur. In quo, superbissimò aurium iudicio morigeramur : quæ perfectò completòque uerborum circuitu, & concinna coagmentatione gaudent, quæ curta sentiunt, quæ redundantia & lasciuia repudiāt, quæ morosè expectant, ut aptè uerbis colligata cadat sententia. Itaq; quod huc pertinet, quid in Cicerone diligētius obserues, quàm quæ

Numeri orationis.

que numerosa sunt, & sonora? Exercitatus, scio, stilus hanc compositionis suauitatem præstat, ubi nisi adsit naturæ felicitas, labore te infinito & pucrili confeceris, nihil effeceris. Conducit tamen apud Ciceronem numerosæ orationis studiosissimum, accuratè circumspicere, qua potissimum ratione uerba inter se collocet, numerosamque & aptam comprehensionem extruat. In primis habet quoddam delectationis aucupium, uerborum conglutinatio & circuitus, non contractus ille quidem & minutus, sed sine elaboratæ concinnitatis significatione molliter leniterque desinens. Collocari autem uerba ita à Cicerone cernimus, ut inter se quàm aptissime cohæreant. Vocalium concursus suo more uitat, ne orationis hiatum atque sonum asperum indecore efficiant: à literarum uasitate refugit, ne stridant horridius atque obscœnius: Antitheta crebro confert, quæ numerum oratorum ipsa necessitate gignunt, & sine industria conficiunt. Non, ut plerique, infracta & amputata loquitur, hinc & aptis lætatur, mauultque orationem pariter cum sententia excurrere, quàm inconditam claudicare, aut insistere. Sic tamen continuandi sunt & perpetuandi numeri in oratione, ut uersus sonum effugiamus. Permixa sit ita & temperata numeris, ut dissoluta tantum ne uideatur. Lateat quadranda orationis industria, sic misceantur, sic temperentur, sic præteruolent numeri, tantum ut non fluctuare, & uacillare orationem nostram sentiant, qui eam æquas

Vocalium concursus uitat Cicerone.

Quomodo continuandi numeri in oratione.

liter & constanter ingredi cupiunt, angustam concisamq; uerborum structuram odere. Nihil fiat extra modum: ne poëma componere existimemur, poëmatis similitudinem uitemus. Sic numeros obseruemus, ut non toti è numeris constare, sed ne numeros aspernari aut negligere: ut non ambitum illum nimium amplecti, sed ne abiicere ijs dicamur, qui neque agrestes, neque inhumanas, neque rusticas aures habent. Non quibuslibet generatim partibus numeri interserantur, numeris tantum terminetur sententia, numerosè solum cadat uniuerſa orationis species: non à numeris uacet, in quo aures acquiescunt, uerborum comprehensionis exitus. Cæterum, ne, quod oratorium numerum efficit, silentio tacitus præteream, ordinari hæc omnis laus tribuenda est: quo, ut par est, seruato, omnia numerosè atque iucundè fluunt, quo paulum commutato, ijsdem uerbis, eadem stante sententia, ad nihilum omnia recidunt, dilabunturq; perplexa & obscuritate infuscata. Quem cum Cicronis lectione cognitum atque animo comprehensum habebimus, tum illud non ignorabimus, quibus rebus locisq; conueniat numerosa oratio, quibus item orationis partibus proprius sit & congruus uel dactylus, uel anapestus, uel spondæus, uel trochæus, uel iambus, uel pæon, uel creticus, uel dochimus uel di choreus. Itaque, quod est pulchrè & oratoriè dicere, uerbis lectissimis loqui, sententijs optimis uti, orationem molliter æquabiliterq; struere, cum nos doceat Cicero

*Ordo numeros
oratorios efficit.*

*vsitati orationis
solutæ pedes.*

Cicero, quid aliorum nugas sordescere sectemur, quid expetamus? quid uel pili faciamus? Haec mihi uideor, de imitatione, quæ sentirem, potissimum dixisse: si quid præterea est, admoneri me abs te non poenitebit. MOR. Admonebo, si quid occurrerit, sed nunc id potius. Ciceronem unum ut imitandum fatear, non tamen quibuslibet ingenijs congruit Tulliana phrasis: sic malè cessura sit affectatio. Deinde si desint naturæ uires, ut inimitabilem dicendi felicitatem assequaris, quid stultius, quàm in eo discutiari, quod non potest contingere? VILL. Tullianam phrasin quibuslibet ingenijs non congruere prudenter colligis, Erasmo modo congruit nullo, Tullianæ dictionis fugitantiore: quibuslibet tamen conuenit Latinæ linguæ cupidis, quicquid in optatis & uotis habent, purè, splendide, ornate, copiose, grauiusque dicere. Cicerone oblectantur, nec unum è multis reperiunt alendis explendisque præclaris ingenijs aut aptiorem, aut accommodatiorem. Neque mediustudius quenquam mihi probaris, frustra Ciceronis imitationi deditum. Imitari Ciceronem, eundem semper, & sibi perpetuo constantem facilius multo queas, quàm scriptores alios stilo uario & dissipato. Neminem ullum ab assidua Ciceronis lectione, omni laude uacuum redire species: Refert alius uerborum elegantiam & copiam, alius compositionis suauitatem, alius orationis acumen, unus omnia eximie Longolius, MOR. Nec materiæ cuius, nec personis omni-

Nemo frustra Ciceronis lectioni deditus.

bus congruit, et, si congrueret, quædam negligere præstat, quàm nimio parare. Si M. Tullio tanti con-
 fuitisset sua faciendia, quanti nobis, aliqua ex parte ne-
 glexisset orationis ornamenta. Nimio uero paratur,
 quod tãto ætatis, ualeitudinis, ac uitæ etiã dispendio
 emitur: nimio paratur, cuius gratia disciplinas cog-
 ni tu magis necessarias negligimus. Deniq; nimio para-
 tur, quod pietatis iactura quæritur. Si ideo discitur
 eloquentia, ut delectemur ociosos, quid attinet rem
 scenicam tot uigilijs perdiscere? Sin ut persuadeamus
 quæ sunt honesta, efficacius dixit Phocion Athenien-
 sis, quàm Demosthenes: sapius persuasit, M. Cato
 Uticensis, quàm M. Tullius. Iam si in hoc paratur
 eloquentia, ut scripta nostra terantur manibus homi-
 num, et si citra studium contingeret Ciceronianæ di-
 ctionis similitudo, tamen arte uarietas esset affectan-
 da, quæ lectoris nauseantis stomacho mederetur.
 Tantam uim habet in rebus humanis uarietas ut nec
 optimis semper expediat uti. V I L L. Deum im-
 mortalem, quàm hic sui similis Erasmus, quàm bene
 dicendi insuetus, quàm ineptus. Eloquentiam simul
 cum eloquẽtiæ principe & contemnendam, & abijciẽ-
 dam monet, cum re scenica illam fastidiosè confert.
 Sed accipito ad singula. Non materiæ (inquis) cui
 uis nec personis omnibus conuenit Tulliana phras-
Simile. sis. Sanè ut ex ijsdem coloribus pictor uel Hercu-
 lem, uel Achillem, uel Stentorem, uel Thersitem, uel
 Helenam, uel Ceruum, uel Simiã, uel Gruem, uel
 Pigar

Pigargum, uel Muscam, uel Formicam, uel Colubrum, uel Montem, uel Cœlum pingere potest: ita Tulliana Phrasis, id est, linguæ Latinæ ubertas, splendor, puritas, ad res qualuis quadrare non possit. Quis istud quæso præter Erasmus? An ut Tulliana phrasi rectè aptèque utamur, Catilina, Verre, Vatinio teste, Pisone, Philippo, Sallustio, Clodio uno aliquo opus sit, in quos inuehamur, debacchemur, torrentem nostram eloquentiam deriuemus atque exauriamus? An Pompeius, Cæsar, Milo, Marcellus, Ligarius, Sextius, Balbus, Cecinna, Silla, Cluentius, Rabirius, Deiotarus reuiuifcat necesse est, ut in laudatione, defensione, infirmatione, disputatione, Tullianā phrasim referamus? An laus dignis uiris, an flagitiosis, an reis & fontibus nostra caret ætas, in quibus uel laudandis, uel defendendis, uel in fidem nostram recipiendis, uel criminandis, uel accusandis Tulliana phrasis iaceat? Clodij, Catilinæue personam depelle, an non eadem, quibus illi cooperti erant, manent flagitia? an non eadem scelera? Milonis nomen omitte. An qui eadē uirtute sint & animi fortitudine, nostra ætate nō reperias? an non in deliberationem nostro etiam tempore res uocantur, de quibus disceptare phrasi Tulliana integrum sit? In summa, Tulliano eloquio qui abundet, latum habet perpetuò campum, in quo Tullianam phrasim aptè commodèque & profundat & explicet. Quòd si res sacras tractet, des

k sintq̃

*Voces quasdam
à Græcis mutua-
tus est Cicero, cū
de philosophia
scriberet.*

Ironia.

sintq; apud Tullium nomina nostræ ætati nota, ea suo iudicio aliunde quærat, Ciceronis uim, neruos, prudentiam, acumenq; imitetur. Non ea nostra est Tulliani moris ignoratio, ut illum uoces quasdam, quæ linguæ Latinæ deerant, à Græcis mutuatum, cū de philosophia scriberet, nesciamus, scimus id etiam certò, Ciceronianam imitationem uerborum religione non contineri: dictionis puritate & splendore, sententiarum grauitate, suauis & numerosa oratione, illam quidem metimur atque æstimamus. Nimio uero paratur, quod tanto ætatis, uoletudinis, ac uitæ etiam dispendio emitur. Erasmmus audite, adolescentes clarissimi, Erasmo auscultate, Erasmi consilio subscribe. Heu miseros atque infelices: Ciceronianam imitationem ne affectate, Ciceronis lectioni ne operam date, Ciceronem abijcite. Aetatis, uoletudinis, uitæ etiam dispendium adfert, disciplinarum ignorationem inducit, pietatis studium extinguit. Pestem ingeniorum teterrimam, luem nefariam, perniciem inauditam. Ob nimium impuri monstri studium, ægra & infirma uoletudine fuit Longolius, spiritum misere duxit Longolius, occidit præproperè Longolius, disciplinas magis necessarias, Cicerone uno contentus, neglexit Longolius. His, nisi mea me fallit opinio, uocibus libens Erasmus odium suum diuturnum, quod in Longolium inueteratum habet, pasceret atque satiare, inuidiam suam ijs cupide uocibus saturaret:

ret: Sed inuidi animi crimen horret, maledici nomen uitat, nec opinantem clanculum ferire mauult. Luce tamen ista clarius inspicitur uersutum senis consilium, quorsum hæc, sentimus omnes atque prouidemus. Animo maleuolo obsequitur maleuolus, falsa de inimico prædicat. Nimirum quis Erasmo credat, Longolium Ciceronis imitatione extinctum, uel extinguí quenquam posse? quis Ciceronis Lectione ætatem minui, aut ualitudinem attentari, quis morbum contrahi, ut putet, ab Erasmo adducetur? an cum ad Ciceronem nos componimus, medicamenta, herbæ, potiones, aut alia, quæ ualitudinis integritati officiant, magis opus sunt, quàm assidua, eaque grata, & uoluptatis plena lectio, quam iucunditatis plena exercitatio? An iustum nobis alimentum subtrahendum? an parcè & duriter uiuendum? an sobrietate corpus attenuandum? an à cibo lautiori, uinocq; sapidiori abstinentium? an genio non indulgendum? an ioco & ludo non uacandum? an domi latendum? an perpetuò inuigilandum? laborandum? insudandum? an ea denique facienda, quæ corporis habitum deprauent? quæ macerent? quibus natura langueat? quibus uita abrumpatur? Nihil est, More, quare his nominibus inuidiam Ciceronianæ imitationi Erasmus facere, aut concitare conetur. Accuratè quidem & diligenter ad tam acuti & exacti oratoris lectionem incumb

Corpus bene curatum postulant literæ.

cumbendum est, ad uiuum exploranda atque inuestiganda omnia, sedulò consideranda, perpendenda, & ponderanda omnia, sed nihil tamen ita intenta cura, aut tam anxie atq; laboriosè, ut aliqua fiat ualitudinis offensio, aut ut morbo implicemur. Studiosum laborem, uel, si ita appellare libet, tristitiam hilaritate condire, remittere, intermittere, animos relaxare nouere docti. Corpus bene curatum, & liberius educatum postulant literæ, uictum paulo delictiorem & unctiorem amant, languidiorem corporis constitutionem non tolerant, opimiorum poscunt: tristem animum aut tædio affectum repudiant, angorem à se arcent. Sic Longolius & animo & corpore comparatus, diu Ciceroni studuit, neque eam ob rem in morbum incidit: naturæ persoluit, cum uitam uelut precariò datam reposcere uisa est, celerius fortasse, quàm debuit, sed non citius, quàm potuit. Poterat uel ad natalem diem uixdum spirantem è medio tollere, ea lege atque conditione natum, qua in hoc mortale diuersorium illabimur, unum aut item alterum fabulæ humanæ actum spectaturi, ac mox ad primum naturæ imperantis nutum è theatro cessuri, eoq; redituri, unde paulò ante clam huc adreperimus. Cesset igitur Erasmus Tullianæ imitationi fraudi importunè uertere, quod natura iubente accidit. Cesset iuuentutem ualitudinis & mortis denuntiatione à Cicero ne reuocare. Cesset iactitare in Cicerone imitando nobis

Ad naturæ nutum è uita excedimus.

bis per socordiam salutem, tempus, ætatem, ingenium defluere. Corporis habitui nihil obest Cicero-
nis lectio, animo & ingenio prodest; ualitudinem nõ
offendit, uoluptatem adfert. Commoda sexcenta in-
uehit, damnum nullum, dispendium nullum neque
ingenij, neque ætatis importat: nomen illustrat, glo-
riam conciliat, facundiam addit: cuius facultas plu-
ris Ciceroni constitit, quàm reputat Erasmus. Negle-
cto uitæ discrimine, prætermissa patriæ charitate, post
habita negotiorum ac rei familiaris ratione, Athenas
profectus est: illic se diu excoluit, suam illic eloquen-
tiam auxit, stili ubertatem & lasciuiam multa diligen-
tia & labore depauit: Molonem & Philonem pluri-
bus annis audiuit, nihil non expertus est, nihil non
subijt, nihil non pertulit, ut ad summam eloquentiæ
laudem adspiraret. Eam nunc illi uel stertenti obue-
nisse, eam nunc illi nullo labore aut diligentia, nulla
exercitatione constitisse clamet Erasmus. Constitit,
quanti constare potest, neque, si sciuisset alia esse ora-
tionis ornamenta, quam quibus totus splendet, la-
bori aut ualitudini pepercisset, ut præstanti illa laude
esset cumulator. Comparatam immensis laboribus,
& acerrimis exercitationibus, tum summa industria
absolutam & perfectam, nobis per manus tradidit,
nobis reliquit: quam studiose sequamur, quam tota
mente atque omni animo intueamur, quam, si fieri
ullo modo potest, quod nullo planè potest, animosè
æmulemur. At nimio paratur, cuius gratia disciplinas

*Quantum Cice-
roni studium et
labor in eloquen-
tia comparanda.*

cognitu magis necessarias negligimus. Quid ad huius uocis insolentiam atque indignitatem addi potest? quem impedijt Ciceronis imitatio, dialecticorū scientiam ne disceret, aut omnes philosophiæ locos ne nosse uellet? Physicis ne delectaretur? Geometriæ ne operam daret: Ius ciuile ne teneret? rerum gestarum & memoriæ ueteris ordinem, imperioforum populorum & regum illustrium bella audire ne expeteret? Quis hæc dicendi facultati uicina atque finitima à Cicerone uocari, quis ad ea discēda nos à Cicerone cōmoneri nescit? Id Cicero facit scilicet, id eius lectio suadet, hanc nobis dat mentem eius imitatio, ut loquaces tantum haberi uelimus, nō disciplinarum omnium cognitione instrui cupiamus: ut inanem uerborum strepitum amemus, rerum scientiam negligamus. Enimuero theologi apud Ciceronē nihil: facile assensior. Pietatis igitur nihil: nego. Pietatis colendæ præceptis institutisque uix careat, qui tanto Philosophiam studio amorisque complexus est. Christum non loquitur: Ignotum loqui non potuit, à Christi lege non omnino aliena aut remota pluribus locis scribit. Suis ad philosophiam colendam adhortationibus, plus religionis, plus uitæ candoris integritatisque ille nobis instillat, quàm theologia sua garrulitate Erasmus. Nullum nobis theologiæ institutum deest, Christo si credimus, & fidem habemus. Quid attinet rem tot superuacaneis scriptis suadere, quam amplecti, nisi auctore & suatore Christo, nemo possit? in qua nec confirmam

Christū sibi ignotum loqui nō potuit Cicero, sed à Christi lege nō aliena scripsit.

firmamur, quam nec ritè nec ordine colimus, nec retinemus, stimulum nisi insistentibus Christus admoveat? dubitantes nisi impellat atque incitet? Iam desinat Erasmus theologiæ studium sibi in gloria ambitiosius ponere, suas in theologiam operas laboresq; uenditare putidiusculum arbitretur, inanes eos prorsus, & fructu omni carentes. Respondeat hîc potius, qua insania atque amentia, ideo disci eloquentiam scribit, ut ociosos tantû oblectemus. Planè de suo omnes ingenio pendit. Otiosis tantum mulierculis, & plebi inconditæ, quia suis scriptis & nugis risum mouere atque satisfacere semper laborauit, quia scurram agere tantum nouit, eloquentiam sic factam putat, ut otiosis solum gratificetur & inseruiat. Sin, inquit, in hoc discitur, ut persuadeamus quæ sunt honesta, effusius dixit Phocion Atheniensis, quàm Demosthenes: sæpius persuasit Cato Uticensis, quàm M. Tullius. Quibus in causis, More, tanta fuit Phocionis, Catonis'ue in persuadendo felicitas? an in Milonis, an in Ligarij, an in Marcelli, an in Syllæ defensione? an in Verris accusatione? an in rei alicuius capite tuendo, aut in salute cuiusquam seruanda? Persuasit uterque sæpe, sed res, quæ adhortatione potius, quàm persuasione indigrent, Reipublice commodis per se quidem utiles, populares, gratiosæ. Sed quos iudiciorum laqueis irretitos, toties expedierunt: quos toties de reis exemerunt? quibus toties salutarem litteram procurarunt? quos toties suo patrocinio abso-

lutos fordidatae clientum affiniumque cohorti, quos gementi uxori, quos plangentibus & supplicibus liberis obtulerunt: quorum toties dignitatem atque existimationem, salutemque sua eloquentia tutati sunt:

Oratio pro Ligario quam efficax fuit.

An pro ligario causam dixit Cato: an illi in Caesaris odium iramque suppetias tulit: an illum in desperatis & perditis habitum erexit: an Caesarem perniciose & atrociter de illo cogitantem mitigauit: an leniuit: an placauit: an Caesaris stomachum & indignationem in mansuetudinem misericordiamque conuertit: an codicillos abijcere coegit: Quanta haec persuasione exempla: quam illustria documenta: quam eximiae egregiaeque significationes: an hoc fastidi dubitabit Erasmus. MOR. Fatebitur fortasse, ut ne de re leuiori pertinacius digladietur, sed quod proximè dixi, actutum obijciat. VILL. Quid istud rei est: è memoria mihi effluxit: iterare meo rogatu potes. MOR. Iterabo bona aurium & uenia & pace, quae hoc iam semel à me hauserunt, sed tibi morem geri libet. VILL. Dic modo. MOR. Tantam uim habet in rebus humanis uarietas, ut nec optimis semper expediat uti, nec alio nomine magis commendatur Homerus & Horatius, quam quòd rerum, ac figurarum admirabili uarietate, non sinunt oboriri tedium lectionis. Ad hanc nos natura quodammodo finxit, suum cuique tribuens ingenium, ut uix duos reperiās, qui eadem uel possint uel ament, iam cum nihil sit humano stomacho delicatius, aut fastidio

fastidiosius, tum ad eruditionem parandam tantum uoluminum nobis sit deuorandum, quis posset in perpetua lectione perdurare, si cunctorum esset idem stilus, ac similis dictio? Præstat igitur ut in epulis, ita & in scriptis esse quædam deteriora, quàm per omnia similia. Qualis autem esset ille conuiuator, qui cum plurimos acciperet, inter quos uix duo palati iudicio consentirent, cibos apponeret omnes eodem more conditos, etiam si delicias Appicianas apponeret? Nunc dum alius alio dicendi genere capitur, sit ut nihil non legatur. Vt ne repetam ipsam quoque naturam repugnare isti affectationi, quæ uoluit orationem esse speculum animi. Porro cum tanta sit ingeniorum dissimilitudo, quanta uix est formarum aut uocum, mendax erit speculum, nisi natiuam referat mentis imaginem: & hoc ipsum est, quod imprimis delectat lectorem, ex oratione scriptoris affectus, in dolem, sensum, ingeniũque cognoscere, nihilominus quàm si complures annos cum illo consuetudinem egeris. Et hinc diuersorum tam diuersa erga librorum scriptores studia, prout quenque genius cognatus aut alienus, uel conciliat, uel abducit: haud aliter, quàm in formis corporum alia species alium delectat, offendit'ue. Dicam quid mihi contigerit. Adolescens adamabam poëtas omnes, uerum simulatque sum Horatio factus familiarior, præ hoc omnes cæteri putere cœperunt, alioqui per se miserabiles. Quid existimas in causa fuisse? nisi genio-

I rum

rum arcanam quandam affinitatem, quæ in mutis illis literis agnoscitur. Hoc genuinum ac natium non spirat in oratione, nihil nisi Ciceronem exprimentium. Quid quod probi uiri, quanquam parum felici forma nati sunt, nolint tamen apposita persona, formosissimi cuiuspiam mentiri speciem, ac ne pingi quidem alia forma sustineant, quàm dedit natura, quod turpe sit mentita facie imponere cuiquam, & ridicula res sit mendax speculum, aut absentatrix imago. VILLAN. Doleo tantum esse in Erasmo garrulitatis studium, ut inepta quouis loco fundat, & absurda impudenter loquatur, sed hoc me magis excruciat, tui te & instituti & promissitambreui oblitum, ut, quod te minimè facturum, modò receperas, inanem Erasmi sermonem inculces, & hanc nobis molestiam exhibere nihil prorsus uerearis. Quid in dicendo aut in scribendo uarietatem tantopere laudari attinet? Num quando uariè dicta & scripta ex omnibus maximè delectare & placere quisquam mortalium dubitauit? Insigni uarietatis laude commendentur & Homerus & Horatius, ea uoluptate lectores capiant, ea iucunditate ad se alliciant, an minor in Ciceronis libris uarietas? an productior rerum omnium similitudo? ad quem si te componas, in quo si totus sis, cui si hæreas, quid uetabit, quominus pictorum more, qui ex eodem colorum apparatu eandem propositam formam, uariè pro sua quisque arte & uoluntate reddunt, tu uerborum

borum proprietatem & elegantiam ab illo sumas, ac ita uariè rem ipsam distinguas & tractes, ut tuo, non aliunde assumpto uti uidearis? Nunquid minus uariam naturam esse dicas, quòd in humano corpore effingendo, uno semper loco labra, nasum, oculos brachia, stomachum, manus, & omnia separatim membra constituat? an quòd unum & idem perpetuò os homini atque foeminæ injiciat, minutis uaria censeatur? Varia est & diuersa, quanquam eadem semper forma humanum corpus quadret, sed notis quibusdam distinctum atque uariatum, aliud quidem breuiori statura, aliud proceriori, aliud Labris promissioribus, contractionibus aliud, aliud habitu strigosiori, gracilioréque, aliud magis læto & curatiore. Non secus, qui in Cicerone uersatur, eadem semper uerba usurpet necesse est, sed ad rem susceptam ita diuersè accommodata, ut simul Latine, purè, eleganter, propriè, aptè, ornatè, copiosè, denique Tullianè loquatur, & uariè, ut nihil res petitum, aut plus semel dictum iudices. M. Antonium, Crassum, Catulum, Cæsarem, Ciceronem, Hortensium, fac in uiuis esse, & illos pro reo aliquo defensionem efflagita, eamq; officiosè suscipiant, & sordidato reo atque ad pedes prouoluto patrociniū præstare uelint, nunquid Latine loqui uolentibus, alia, quàm quæ in linguæ Latinæ usu sunt, quaerenda erunt uerba, schemata, tropi? an nīdem

1 : uocib

uocibus, similiq; omnes dictione non utentur? Simili prorsus, sed eadem uerborum puritate & elegantia contextam suam quisque orationem pro ingenij & excogitationis uarietate immutabit atque uariabit, sic mehercule, ut illos splendide, ornatèque, & uariè diuersèque omnes dixisse intelligas. Tersè & uenustè scripsit Cicero, ad illam se uenustatem composuit Longolius. Tersus igitur uterque & uenustus, laudabilis uterque & magnus: quis tamen alterum ab altero diuersum & uarium neget? quis in utroque eisdem stili ductus ac lineamenta agnoscat? Eadem uia, qua Longolius, qui Ciceronem imsequetur, uarietatem cumulatè præstabit, nec accidet, ut Erasmi suasu ad deteriora deflectat, ne per omnia similis sit. Nimium continuatæ similitudinis uitium effugiet facilè, qui eo quo Tullius modo, uarius esse studebit, Nihil minus fiet, quàm ut conuiuatorem imitetur, qui, cum plures accipiat palati iudicio discrepantes, cibos apponit omnes eodem modo conditos. Rem insulsam, & à solertis prudentisq; hominis arte remotam. Coci potius periti exemplo utetur, qui ex armo ueruecino plura edulia, & diuersas mensas conficit, aut tam uario iure uirulinam, bouillamue condit, ut uel ferinæ, uel pulpamenti, uel carnis fartæ gustum saporèmq; referat. Sic enim se res habet: qui Ciceronem accuratè legerit, & illum exactè imitari conetur, non operosum est, ut scriptori uarietatis laude nobili deditus,

deditus, uaria oratione lectorem oblectet atque retineat. Quicopia capiuntur, his ubertate satisfaciet: quos breuitas iuuat, pressa & contracta dicendi, si uolet, specie delectabit: qui altum & sublime orationis genus amant, elato & grandi stilo, ab illis gratiam inibit, famamque oratoris non uulgaris consequetur. Naturam uarietatis studiosam nullo sane pacto mihi quisquam probaret, nisi nos eiusdem cupidos, & de re qualibet uariè scribendi facultate præditos procreasset. Velit ipsa illa orationem esse speculum animi: an natiuam mentis imaginem oratione, uerborum Ciceronianorum splendore culta atque ornata referre non licebit. Aufert ne liberam, quæ sentimus, & animo agitamus, dicendi atque scribendi facultatem diuinus ille Romanæ eloquentiæ parens: cum nos uerborum copia, schematum cumulo, sententiarum grauitate, numerorum oratoriorum suauitate instruit: cum nos sanctis philosophiæ institutis excolit: Putas ne ualentem Lanistam, ense expolito impediri, ne corpus in omnes partes ad arbitrium suum uerset, & solita uolubilitate circumfiliat? Ita ne quoque Ciceronis imitatione mentis aciem perstringi existimas, aut in certam sententiarum regionem compelli, ut ex ea egredi uetitum sit & nefas? Non grauatim dabo, prout quenque genius cognatus, aut alienus, uel conciliat, uel abducit, ita nostra esse erga librorum scriptores studia: sed cuius genius Latini eloquij dignitati splendorique amicus sit, qua potius, quam Ci-

ceronis imitatione oblectetur Latinæ facundiæ longè omnium principis? Haud aliter quàm in formis corporum alia species, alium delectat, offendit'ue, in scriptorum etiam lucubrationibus plures sese offerunt stili formæ, quibus uariè afficiamur: quis tamen tam negligēs & locors formarum spectator, aut tam ignarus iudex, ut pluribus uenusta forma, & liberali uultu adductis uirginibus, pulchrioris uenustiorisq; amore non incendatur, neglectis statæ formæ cæteris? Non cognitos habet Erasimus generosorum animorum conatus, & laudabiles cupiditates. Quis excelso & elato animo, Tersitis aut Stentoris res gestas, sibi potius sequendas proponat, quàm præclara Achillis aut Hectoris facinora? quis uelites nescio quos ignobiles & obscuros imitari malit, quàm ad Scipionis, Pompeij Cæsarisq; gloriâ contendere? quis proinde plebeiorum & triuialium scriptorū nugas æquare pulchrius præstantius'ue arbitretur, quàm ad Ciceronis umbrā uel longo interuallo accedere? quam inter Ciceronianos reponi? At uero probis, inquit, uiris graue est & religiosum, piaculumq; uidetur, quanquam parum felici forma natis, appositâ persona speciem, formosissimam cuiuspiam mentiri ac ne pingi quidem alia forma sustinent, quàm dedit natura. Incredibilem & inauditam Erasmi simplicitatem: candidos planè & eximios mores. Iuuat hic Aesopici apologi obiter meminisse, quo uulpem fingit prædam aspernantem, quam assequi non poterat, Eo Erasmus modo

modo, uir bonus & uerè simplex (hoc si fateantur, qui eum dolis confutum clamant) qua decorari orna-
riq; nunquam illi concessum est, personam Cicero-
nianam turpem & parum decentem putat, camq;
probris uiris non conuenire scribit. Verum non sine
crimine, & uitio damnat, quod tametsi non assequu-
tus est, iure tamen ab eo laudari, & ad id iuuentutem
inflammari debuisse docti omnes arbitrantur. M O-
R V S. Esto istud, ut uis. An ab eruditis merito non
ridentur improbi quidam, qui uiros alioqui doctos
& eloquentes, ac nominis immortalitate dignos,
non alio nomine reijciunt, ac è bibliothecis submo-
uent, nisi quòd se ipsos stilo maluerint exprimere,
quàm Ciceronem, cum imposturæ genus sit teipsum
non exprimere, sed alienæ formæ præstigium oculis
hominū obijcere? Et haud scio, an multos inuenturi
simus, qui totam corporis sui speciem uelint cum ali-
na commutare: multo pauciores puto esse, qui men-
tem & ingeniū totum cum alterius ingenio sint per-
mutaturi. Primum quòd nemo uelit alius esse, quam
est, deinde, quòd suis quisq; dotibus sic temperatus
est naturæ prouidentia, ut etiam si quid adsit uitij,
uirtutibus adiunctis paria faciat. Habet animus fa-
ciem quandam suam in oratione uelut in spèculo re-
lucentem, quam à natua specie in diuersum refinge-
re, quid aliud est, quàm in publicum uenire personæ
tum? V I L L. Bona certè uerba, & mirè expedita:
sed quid uerū aut grauis habent, aut homine sapiente
l 4 digni

digni: Principio si quis eloquentiæ laude minus forte floreat, uirtute tamen alia, aut recondita aliqua disciplina atque eruditione clarus sit, cuius præstantia & celebritate immortalitatem mereatur, inuentus adhuc nemo est tanta amentia aut impudētia, qui quem uirtutis nomine eternū nouit, posterorum memoria indignum censeat, aut ea tantum causa à bibliothecis submoueat, quòd scribendo Ciceronem non referat. Sic Plinium utrunque, sic T. Liuium, sic Quintilianum, sic Q. Curtium, sic Columellam, sic Iustinum, sic Vitruuium, sic Vegetium, ac reliquam præclarorum scriptorum turbam & colimus, & obseruamus, tametsi Ciceroniana uel puritate uel elegantia non omnino præstabilem. Deerat Erasmo garriendi argumentum hoc nisi ad cæteras nugas adiecisset, improbos esse quosdam, qui uiros alioqui doctos è bibliothecis submouerēt, quòd seipsos stilo exprimere maluissent, quàm Ciceronem. Vel alio, quantum ego iudicare possum, astu calliditatēq; in hunc locum incurrit, ut quos sibi non satis æquos sentit, isto risu, uelut telo feriat, terreatq;, ne Erasmi nomē minus aut suspiciat, aut admirētur, quòd totus à Tulliana phrasi abhorreat, blateretq; ridiculè potius, quàm Latine linguæ candore & Ciceronis grauitate utatur. Putauit enim homo multi consilij, & pij animi, imposturæ genus esse, seipsum non exprimere, alienæ formæ præstigium obijcere: quasi uero, qui Ciceroni imitando studeat, non seipsum, ut ante diximus, liberè quidem expri

Ironia.

exprimat, aut ingenium, quod Erasmus insulse & absurdè scribit, mentemq; suam totam, cum alterius ingenio permutet. Proinde cuius est hæc, nisi demens & insipientis, sententia? alium esse, quàm est, uelle neminem. Repugnat tam ineptè uoci, sapientum prudentia, qui consilium ad tempus subinde mutant, & quod è re sua atque existimatione est, aliunde petere non dubitant. At in publicum personatum uenire non reprehensione aut uitio caret. Quam personam gestat More, qui sana mente & integro animo, Tulliana eloquētia ornatus in publicum prodit? eum ne quisquam subsannet? eum ne quisquam rideat? Nemo ita comptum, personatum existimat, sed, qui prudentissimo cuiq; & uirtutis studiosissimo proprius est, eo ornatu expolitum recognoscit. Hic uero de te sciscitari non ineptum sit aut alienum: quoniam scriptorum imitationem, laruam personamque appellat Erasmus, qua persona ornatus in publicum uenit? Duplici ea quidem, & utraque deformi atque horrida, neq; inter doctos satis tolerabili. Verborum personam (da nos ita loqui posse, licet asperè & nouè) Horatij Hemistichijs, Apulei impuris uocibus, Beroaldi adagijs, sibi ipse confecit, tandem post inanes labores in eum modum stilo inquinatus, quo leprosi facies, maculis tum marcentibus, tum pallentibus & sanie immunda plenis, turpiter misereq; foedata. Sententiarum Laruam (hic etiam uerbi ueniam à te peto) unde nisi à Luciano assumpsit, autore omnium mas
m ximè

ximè dicaci & conuitiolo, religionis experti, dei ignaro, & ad omnia tum sacra, tum profana ridenda profecto. Falleris uerò, hic si à me expectas, ut, qui potissimum loci, Erasmus dicacitatis, editiꝫ liberius & insolentius in multa risus arguunt, ex eius scriptis nominatim eliciam, atque in apertum proferam. Leuiorì hominis iudicio dum in hoc genere aduersor, & opinionem infirmo, commissum à me nolim, ut huius existimationem acerbius oppugnare, impotentius ue labefactare uidear: solum id probare suaderèꝫ adnitor, qui alijs turpe esse scribit, Ciceronianè personatum in publicum uenire, eum ipsum turpius obscœniusꝫ personatū in scœnam iam diu prodijisse. At me diutius ne teneto, quid in summa Erasmus de imitatione sentiat, breuibus explica. MOR. Amplectitur imitationem, sed quæ adiuuet naturam, non uiolet: quæ corrigat illius dotes, non obruat: probat imitationē, sed ad exemplum ingenio imitatoris congruens, aut certè non repugnans, ne uideamur cum Gigantibus *δομεαχῶν*. Rursus imitationem probat non uni addictam præscripto, à cuius literis non ausis discedere, sed ex omnibus autoribus, aut certè præstantissimis, quid in quoꝫ præcellit maximè, tuoꝫ congruit ingenio, decerpentē, nec statim attexentem orationi, quicquid occurrit bellum, sed in ipsum animū uelut in stomachum trajicientem, ut transfusum in uenas ex ingenio tuo natum, non aliunde emendicatum esse uideatur, ac mentis naturæꝫ tuæ uigor
rem &

rem & indolem spiret, ut qui legit, non agnoscat emblema Ciceroni detractum, sed factum è tuo natum cerebro, quemadmodum aiunt Palladem è cerebro Iouis, uiuam parentis imaginem referentem: nec oratio tua centò quispiam sit, aut opus musaicum, sed spirans imago tui pectoris, aut amnis è fonte cordis tui promanans. Sit autem prima præcipuaq; cura penitus cognoscendæ rei, quam tractandam suscipias. Ea tibi suppeditabit orationis copiam, suppeditabit affectus ueros & natiuos. Ita demum fiet, ut tua uiuat, spiret, agat, moueat & rapiat oratio, totq; totum exprimat. VILL. Desperaram tanto in Longolium odio suffusum senem, & inuidia insanum, recti quicquam tandem eloqui posse, quem hoc loco resipiscere gaudeo, & non absurdam omnino de imitatione sententiam ferre ipse uideo. Doctè monet & probè, quos ita ad imitationem hortatur, ut non quicquid arridet, orationi continuò attexant, sed quæ ad imitationem à scriptoribus sumunt, in stomachum traiciant, & bene concoquant, ut transmissum in uænas, uelut nostrum renascatur, non uideatur aliunde corrogatum. Placent quæ in eam rationem eruditè disputat: displicet hoc tamen, & recti iudicij opinionem, quam ille mihi commouerat, plurimum certè fallit. Displicet meherculè quod imperitè suadet, ex omnibus generatim autoribus comparandam imitationē. Omnes summo studio & diligentia legendos, ex ijs, quæ splendidiora sunt, colligenda non repugno.

unum Ciceronem imitandum assero, nisi nobis illud accidere uelimus, quod ijs, ut uidere est, frequenter accidit, qui, cum uitam partim Romæ, partim Lutiæ Parisiorum, partim Londini, Partim Friburgi egerint, neque Romanæ tandem, neque Gallicæ, neque Britannicæ, neque Germanicæ, exactè aut purè sciunt, ineptè omnia loquuntur & balbutiunt. M O. Tu'ne tamen istorum superstitionem, dicam an amen tiam? in Cicerone imitando laudas, qui ne peruulgatis quidem dictionibus utantur, nisi consulto codice, què sibi ex peculiaribus Ciceronis locutionibus conscribunt? qui nec grāmaticis præceptionibus fidunt, nec Terentij, aut æquè probati autoris uerba recipiunt, qui non hyberna nocte unicam epistolę per iodum absoluunt, quibus prima cautio est, ne cui Latine loquantur: qui uerba nunquam sine longa præmeditatione faciunt, qui ex Cicerone excerptas & concinnatas formulas sermonis habent, aut ad salutandum, aut ad resalutandum, aut ad gratulandum longinqua ex peregrinatione reduci, siue ex graui egrotatione rediuiuo, aut ad agendas gratias ei, qui beneficium contulit, aut ad bene precandum ei, qui nuper uxorem duxit, aut ad eius, cui uxor interiit, deplorandum casum paratas, quas prætergredi nefarium & scelestum ducant? V I L L. Ista ab Erasmo maleuolè collecta non ignoro, ut Ciceronianorum rideret diligentiam, & gloriam minueret. Qui tam angusta & superstitiosa scribendi loquendiue sollicitudine
illig

illigetur, nemo Ciceronianum iudicat, neque etiam, qui Ciceronis lectione oblectetur, & tam diuini scriptoris uim ubertatemque perceperit, illis ineptiis ridiculum se præbet, rerum copia, & sententiarum uarietate abundantissimus, ipsaque uerborum compositio ne non impolitus, & æquabili in scribendo lenitate profluens. Terentij uerbum repudiandum prorsus nullum moneo, quod magis ad orationis solutæ libertatē, quàm ad carminis seruitutē accedat, quod potius in compositionis seriem & ordinem cum lenitate illabatur, quàm stridens cum strepitu præcipitet, atque quod cum alijs suo loco eleganter uenustèque consistat, & penè lateat, non uelut nouum, aut ut ab extranea aliqua colonia emigrans, inter alia notari deprehendiue possit. Reliquorum autorum uocibus uti, nulla uiro docto religio est, in ciuitatem certè Romanam admissis, non peregrinis, & nimia uetustate, sicuti uino, non fugientibus, aut acescentibus: quis enim delicato palato insipida non fastidiat? quis acerbæ non respuat? quis putrida non oderit? similia qui fugiet, exactum & rectum Ciceronis iudicium in uerborum delectu imitari existimabo: recepta & usu comprobata uulgataque qui morosè negliget, eam, quam maxime excellit Cicero, uerborum copiam & fecunditatem ridiculè aspernari prædicabo. Promptam uero & expeditam loquendi facultatem tam uehementer laudo, quàm qui uehementissimè, sed ea præditos paucos admodum noui: neque certè ulla aut naturè

Terentij uerba
non fugienda sunt
modo orationi so-
lute conueniant.

De prompta lo-
quendi facultate.

felicitate, aut studiij uehementia, aut ingenij & memorie magnitudine, aut ulla exercitatione & usu fieri intelligas, ut tam doctè & eleganter ex tempore loquamur, quàm quicti & ociosi post multam excogitationem scribimus. Pleniora sunt & uberiora quæ chartis reponimus, quàm quæ inter nos confabulamur: stilum cogitatio alit & auget, formaturq; meditatione oratio, & ad habitum uenustioremem adolefcit. Quare qui sibi ne uel uerbum quidem, aut non satis proprium, aut malè collocatū & asperius cadens, aut rudius prolatum excidat, & metuūt & cauent, amantq; perpetuam stili æquabilitatem & inoffensum orationis cursum, non ita libenter, neque nisi necessario lingua Latina utuntur, uitantq; odiosè illius ostentationis suspicionem, in quam iure incidunt, qui, ne parum familiarem & domesticum habere Latinum sermonem censeantur, canes etiam & bruta Latine alloquuntur, seruos & fœminas linguæ Latinæ rudes, Latine compellant, omnia denique Latine effutunt. Quam dampnandam & ridiculam consuetudinem nō abs re execrantur eloquentiæ studiosi, quodq; præmeditatum & longa cogitatione accuratum sit, Demosthenis exemplo eloqui malunt, quàm inconsulto & imprudenter Latinum sermonē ad omnia proijcere. Hoc Budæum Galliæ lumen, uirumq; omni laude maiorem factitare audimus, quod Erasmo ignotum credimus, cuius stomacho oneri est & nausæ, uerborum sententiærumq; pondus & grauitas; omnia

euomit

Budæus.

Erasmus.

euomit cruditate coactus, nihil decoquit frigiditate concretus & exanguis. Attulit hoc profecto Germanis uitium nimia illa Latine loquendi cupiditas, & quotidianus usus, ut doctius multo tersiusque uerba faciant & loquantur, quam scribant, nec discriminis quicquam inter eam, quæ scriptis ac lucubrationibus eloquentium inesse debet, grauitatem, & familiare colloquium constituent. Caue autem putes, quanti apud me est, cui utrunque & promptè loquendi, & disertè scribendi munus à natura contigit, tanti esse quensquam. Tanta laude illustres, tanta gloria claros, tanta uirtute cumulos, pro eo, quod reliquis excellunt, admiror, sed nec illos quidem pro nihilo confestim duco, aut minus etiam laudo, qui extemporanea eloquentia defecti, raram quandam & admirabilem scribendo facundiam præstant, ac minutulum illud nature, non hominis uitium maiore uirtute redimunt.

MOR. Vera ista quidem & recta. At de Longolio, & imitationis partibus satis iam superque disputatum sit. Nunc, cui posteriorè anteuertimus, primam dialogi Erasmi partem, quanquam serius, referemus. Non Longolij gloriam minui, non illius laudes deprimi audies. Marcum illum tuum Ciceronem Arpinatem Oratorem, quem tantopere suspicis, & omnibus uirtutibus spectabilem narras, infantia accusari, ac plurimum insimulari coarguique uitiorum intelliges, illius nomen ita mox obtritum spectabis, ut nec pedes nec caput illius eloquentia famam non solum eleuabo, sed uis

tam etiam hominis moresq; discutiam, uiasq; omnes persequar, ut, quem unum imitandum mones, fugiendum abiiciendumq; probem: tu uide ut his uorandis molestijs constantem te præbeas, Ciceroniani nominis tam studiosus, & uindex defensorq; acerrimus. VILL. Constantem facile me præbebo, & animi grauitatem retinebo, qui ad triuialia Erasmi conuitia callum iam pridem obduxi, atque obdurui. Non me clam est tantam esse Erasmi impudentiam, tantumq; maledicendi studium, ut quo ore Longolium spoliare contendit, eodem Tullij nomen attentet, nec non contaminare conetur: sed insani & furentis uerba refer. MOR. Ego certe id libens. VILL. Audiam haud dubiè libentius, non uoluptatem ex tam acerbis maledictis percepturus ullam, sed Ciceronis existimationem pro uirili defensurus, & Erasmi insolentiam uerbis, quo ad eius fieri poterit, repressurus: tu nisi pro tua in Erasmus beneuolentia & studio, illos dialogi locos memoria complexus es, memoriterq; pronuntiare potes, de scripto recita. MOR. Faciam. Etenim tametsi inaudita & incredibili amicitia Erasmus prosequor, non tanta est tamen nostra, quanta est Ciceronianorum tuorum diligentia atque sedulitas, qui una Ciceronis lectione non contenti, uniuersos illius locos æquè atque unguis cognitos habent, & memoriæ curiosè mandant. Mihi cōtra auctoris cuiusuis libros semel uorasse satis est, aut inscriptionem tantum interdum legisse, VILL. Nihil mirum

rum, si tam fraternè & tu & Erasmus inuicem amatis, morum similitudine congruentes. Non maiori puto diligentia libros quosuis ab Erasmo, quàm à te legi. Eadem suos leuitate proijcit, qua percurrit alios nos. Sed ad rem ueniendum: Longius, quàm licet, digredimur. M O R. Venio. In hac igitur es sententia, nullam in alijs oratoribus esse uirtutem imitatu dignam, quæ non eximia sit in M. Tullio. V I L L. Ita prorsus, ut antea differui. M O R. Nec ullum in hoc esse nguuum, qui non maior sit in cæteris. V I L L. Sententiã nihil muto, neque hoc concedo, in Cicerone ullum esse nœuum. M O R. Non hîc proferam M. Brutum qui totum hoc dicendi genus, quod Ciceroni uisum est optimum, improbauit: cumq; statutus ac diuisionis propositiones, uelut causæ totius columnæ, præcipua sit orationis pars, in oratione pro Milone, quam adeo suspiciunt omnes, Brutus non probauit primarium ac secundarium causæ statum adhibitum à M. Tullio, sed eandem causam aliter tractauit. Non obijciam Pomponium Atticum, cuius unguiculos ac miniatulas cæulas à se metui scribit Cicero, quibus ille notare solitus est, quæ in M. Tullij scriptis offendeabant. Non M. Catonem, qui Ciceronem, cum sibi maximè festiuus uideretur, ridiculum appellauit. Hactenus & uiros graues, & amicos Ciceronis recëfui. Hîc si adijciam Gallum, Lartium, Licinium, Cestium, Caluum, Asinium: si Cælium, ac Senecam, si complures alios, qui cum de Cicero

n

nis ing

nis ingenio non magnificè senserunt, tum orationis genus damnarunt, alijs illum appellantibus aridum, ieiunum, exuccum, exanguem, elumbem, ac dissolutum, mollem, ac parum uirum: rursus alijs tumidum, asiaticum, ac superfluis redundantem: respondebis hæc esse uel inimicorum, uel inuidorum iudicia, qui iam triumuirali proscriptione deiectioni, famam etiam moliti sunt, si minus extinguere, certe obscurare. VILLAN. Inuidorum & inimicorum esse iudicia quid ni respondeā? Verum alios ab alijs fecernamus, & singulorum de Cicerone opiniones separatim expendamus. Improbauit genus dicendi Brutus, quod optimum Ciceroni uisum est. An uel duos uno dicendi genere oblectari uideas? Suum secutus est Brutus, Ciceronem non ita magni fecit, Quid? uniusne Bruti iudicio stabimus? illiusne sententia Ciceronem improbabimus? reperit in oratione pro Milone, quæ reprehenderet, magis adeo forte, ne parum acutus & subtilis uideretur, quàm iusta & probabili ad reprehendendum causa adductus. Purius est posterorum iudicium, Brutum igitur depellamus, & in diuina illa oratione accurate omnia à nobis ponderentur: quid non exactum & absolutum occurreret? Sentio, quod obmurmuraturus sit Erasmus: Posterorum iudicium purius esse utique fatebitur: tam exactum, quàm antiquorum fuit præcisè negabit, hocq; addet, nos tam longo intervallo à perfectio linguæ Latinæ tempore sciuntos,

ctos, uix rectè de linguæ Latinæ præstantia & arte rhetorica iudicare posse, Brutum rectius iudicasse. Sanè, si æmulatio atque inuidia, quæ facile inter eiusdem laudis cupidos serpit, ut par erat, abfuiſſet. Iudicare rectè etiam possumus, facilius multo, quàm rem iudicatam assequi, aut tanta esse eloquentiæ magnitudine, quanta antiquos claruisse, memoriæ proditum est. Primarium ac secundarium causæ statum adhibuerit Cicero, quid tamen diuersum à propositione diuisionis notes? quid non consentaneum & quadrans? quid alienum, aut extra ordinem excurrentes? An Bruto maleuolè iudicanti fidem, quàm Ciceroni diuinè & supra omnem admirationem atque laudem dicenti, honorem habere malimus? an quod ille leuiter reprehendit, animaduertere quilibet quam in Cicerone possit? Ciceronianæ laudi detraxere, Bruti reprehensione ridiculè Erasmus conatur, frustra simul & absurdè Pomponij Attici unguculos & ceras miniatulas obijcit, eas Ciceroni me tui fuisse, ineptè scribit. Attici iudicium neque timuit Cicero, neque necessario subiit. Tantum Attico tribuit, ut se illius castigationi libenter submitteret, ut multa, quæ dubia haberet, neque satis usitata uideret, cum illo communicata uellet: ut illo denique suorum scriptorum uelut canone atque Aristarcho uteretur. Quæ si limatulo uiri tam docti iudicio perpoliri cupiit, aut agrestes sumus planè nisi

n : singul

singularem Ciceronis prudentiam consiliūque laudemus, aut stupidorum & inertium nomen non effugiamus, atque communium literarum & politioris humanitatis expertes uideamur, nisi ab auctore tam eleganti elucubrata, & iudice tam eximio eliminata magis magisque amplexemur, atque omni ex parte absoluta perfectaque existimemus. Cognosce autem quā insanierint, quantoque maiorem suae leuitatis, quā sapientiae declarandae causam quaesierint, qui, cum de Ciceronis ingenio non satis magnifice sentirent, illum aridum, ieiunum, exuccum: exanguem, elumbem, ac dissolutum, mollem ac parum uirum: rursus tumidum, & superfluis redundantem uocarunt. Tuum hic iudicium Cæsar, tuum illud diuinum iudicium hinc appello. Elumbis'ne atque exanguis fuit tum Tullius, cum te Ligario atrociter minitantem, ardenti sua ille oratione, uelut fulmen de caelo, tetigit: cum te totum calefecit: cum te ad lenitatem tardum, suis ille aculeis subito pupugit: cum te celeriter comouit: cum te iracundia & furore uallatum derrepente expugnauit: Tuam hinc quoque conscientiam appello Verres: mollem'ne Ciceronem ac parum uirum sensisti, cum te contra mirabilem illam atque præstantem Hortensij facundiam; & reum peregit, & damnandum multandumque iudicibus persuasit: Rem ut est, explica, &, quod uiri boni

boni nomen semper neglexisse uisus es, hîc nunc am-
bi atque affecta. Elumbem ne Ciceronem expertus
es, cum tibi impetu tanto instaret? cum te uerbis for-
deret? cum te passim uulneraret, cum te uix respirare
pateretur? Tua hoc etiam loco M. Antoni mihi im-
ploranda est fides atque testimonium. Frâge odium,
& te ipsum supera: accepti à Cicerone uulneris me-
moriâ depone, ueritati, quàm simultati inferuire:
constantîæ & grauitati, quàm dolori & animi ægritu-
dini obsequi malis. Aridus ne & exuccus Tullius,
cùm exuperâti illius in te eloquij flumine senatus res-
dundaret? cùm te suæ facundiæ incremento obrues-
ret? cum te uerborum suorum uortice gurgiteq; des-
primeret? cùm te ab imo conuelleret conuulsumq;
demergeret? Paulo nimium sim longus, si reorum
suffragia recitem, qui Ciceronem omnium copiosissî-
simum, uberrimum, efficacissimum, & in causis dicen-
dis potentissimum clamant, illius patrociniô & defen-
sione absoluti. Infusurât deinceps mihi in aurem Phi-
losophia, ut, qui Ciceronem aridum uocant, eos ad se
allegem, ut quàm fusè & amplè à Cicerone tractata
literis Latinis fuerit, hoc ipsum nescientes, certiores fa-
ciat: atque hoc certe officio gratiam Ciceroni referat,
qui illi in Græcia tantum diuersanti, domesticas sedes
apud Latinos parauit, deditq; ornatum Græco non
fordidiorē aut abiectiorē. Ex hac ubertatis & fœ-
cunditatis laude, obtrectandi causam aucupantur alij,
ac Ciceronem ut superfluis redundantem & profus-

fiorem incrépant. Magna est illius oratoris uirtus, quæ tot ad inuidiam obtrectionemq; incendit, nulli certè rei, quàm gloriæ & laudi, tam insidiantem. Nihilo tamen secius à doctis repelluntur, & ridentur, qui Ciceronem nimix ubertatis accusant, quàm qui illum aridum & exanguē uocant. Copia & ubertate omnes longe superat, breuitate & pressio contra ctoq; dicendi genere, cum res postulat, nemini prorsus cedit. MOR. Tribuantur sanè hæc iudicia uel odio uel liuori. Certe fateberis, opinor, cum eruditis omnibus, facetiam seu risum partem esse artis rethorice. VILL. Fateor. MOR. Nemo negat Ciceronem in iocando fuisse multum, alij nimium prædicant, tum intempestiuum, & scurrilitati proximum. Atq; modum illi defuisse, quemadmodū Demostheni facultatem, doctorum ferè consensus fuit: nec ad modum repugnat Quintilianus culpam in Tironem conferens, qui nimium indulserit numero dictorum, ac plus in congerendis studiis, quàm in eligendis iudiciis adhibuerit. Verum hæc Tironis accusatio in patronum recidit. Sed hæc utcunq; habent, quis unquā in hoc genere laudis primas tribuit M. Tullio? Lacedemoniorum peculiaris hæc erat laus, & secūdum hos, Atticorum. Adeo ut cūm poëma bucolicum & comœdia lepore facetiâq; potissimum commēdetur, ad hanc uenerem Latini ne aspirarint quidem. Est igitur aliqua uirtus oratoris, quæ rectius petatur ab alijs, quàm à Cicerone. Audebimus ne Ciceronis

iocos

iocos cum C. Cæsaris, aut cum Octauij dictis conferre? Itaque si res festiuitatem desideret, aliquod potius ex Octauij, quàm ex Ciceronis dictis effingā. VII. Est plane oratoris mouere risum, sed quanta sunt uenustate aspersi suo loco sales, tam diligenter uideat orator, quatenus à se ridicula tractanda sint, ne scurrilibus potius iocis & mimicis abundet, quàm faceret dictis animos iudicum apte commodèq; exhilaret. Tenuissimum ingenij fructum, risum esse nouit Cicero: quamobrem dicacitatis moderatione & temperantia, & raritate dictorum, distinguere à scurra in causis uoluit. Præstitit idem, dum diceret, grauitatem & seueritatē suam iocos risumq; nimium uitando: inter amicos & familiares urbanior & dicacior fortè fuit, sed apud quos omnia licent, nec ea causa satis recte ab obrectatoribus scurrilitatis insimulatus est. Ridicula dicendo miscebat, si beneuolentiam eo sibi modo conciliandam, si aduersarium ioco frangendum, si urbanitate impediendum, si eleuandum, si deterrendum, si refutandum: si tristitiam ac seueritatē iudicum mitigandam & relaxandam, si odiosas res, quas argumentis diluere non poterat risu sibi dissoluendas uidebat: sic tamen omnia, ut in scurrile uitium nunquam dilaberetur, ut politus & urbanus, non ineptè dicax uideretur: ut uerborum turpitudinem & rerum obscœritatem uitaret, non ingenuitatem ac ruborem suum prostitueret. Denique ut laudabile & honestum, & liberale, ut uenustum, lepidum, elegans, bellum, & li-

teratum : ut acutum & ingeniosum iocandi genus, ut
dignum foro, ut iudicum grauisimorum auribus di-
gnum sequeretur : quod sæpe admirationem magis,
quàm risum moueret. Lacedemonios longe omni-
bus lepore præstitisse; C. Cæsaris & Octauj ingenia
urbanis salisq; sermonibus accommodata fuisse, nō
tanta est mea rerum antiquarum, & historiarum Ro-
manarum ignoratio, ut quidem nesciam, hoc scio tas-
men certò, & confirmare cum doctis audeo, quod ad
hanc artis oratoriæ partem, beneq; dicendi laudem
pertinet, nihil Ciceroni neque à natura denegatum,
neque à doctrina non delatum fuisse, omnia abunde
suppeditasse. M O R. Aliud abs te quæro, Num sen-
tentijs ponas inter ornamenta dictionis. V I L L. Or-
natum maximum orationis esse puto. M O R. Per-
literas, & tuum tam acutum iudicium, an in hoc gene-
re laudis Cicero omnibus antecellit? V I L L. Nemo
antecellere dubitat : qui ita creber est rerum frequen-
tia ut uerbis non amplior sit, quàm sententiarum nu-
mero. M O R. Attamen Publium mimographum
in hac laude omnibus præfert Seneca. V I L L. Qui
ipse frigidis & triualibus sententijs immodicus est,
sententijs ambitiose indulgentem laudat, sed apud
eloquentes & doctos fide autor nulla. Nec medijs
fidijs Philosophiæ præcepta tradenti conuenit, tan-
tum abest ut oratori, sermo sententijs perpetuis con-
textus. Orationē illustrare debent, non totam tegere
& obducere sentētijs, M. O. Agedum, Nōne res interdum

dum exigit breuitatem? VILL. Non incredibile.
 MOR. Huius exemplū utrum rectius petes à Sallu-
 stio Brutóue, an à Cicerone? VILL. Bruti quid con-
 stat, quo illius uel breuitatem uel ubertatem cognos-
 scas? Sallustius historiam scripsit, cui ut genus oratio-
 nis fufum atque tractum non omnino negatum sit,
 propria tamen magis est breuitas, ne ad ordinem tem-
 porum, regionum descriptionem, consiliorum, actus
 rum, euentuum, rerum denique gestarum narratio-
 nem, lectorem arrectum & animaduertentem pos-
 tius, quàm orationis filum spectantem, nimia uerbo-
 rum copia oneremus, & longa auidius persequentis
 alacritatem retardemus. Extra hæc. Demendi maior
 est & promptior, quàm addendi facultas: quòd si
 ubertatem oderis, & sermonis lasciuia non ames,
 ex Ciceroniani eloquij luxurie, quæ magis arri-
 debunt, carpito. MOR. In Demosthene laudatur
 uis orationis, & neruosum quiddam ac naturale, ab
 utro hoc rectius petemus? VILL. Sua cuiq; linguæ
 phrasis est, sed omnium linguarum communis rheto-
 rica: cuius partem ullam à Demosthene aut ingenio-
 sius, aut acutius laudabiliusue, quàm à Cicerone
 tractatam, eruditi nullius testificatur neq; opinio, ne-
 que sententia. MOR. Rursum res interdum postulat
 seueritatem: huius exemplum rectius ne petemus à
 Cicerone, an à Bruto & Pollione? VILL. Fac Bruti
 & Pollionis scripta ut extent, tum, an ab illis, an à Ci-
 cerone petenda sit seueritas, dispiciemus. Interea ita

*Quare historie
 aptus sit pressus
 stilus et breuitas.*

mihi persuasum arbitrare, nulla Brutum, aut Pollionem laude præstitisse, quæ in Cicerone maior non fuerit. MOR. Vbi negotium inuolutum, partitionibus explicandum est, utrum à Cicerone petemus, an ab Hortensio, aut si quis sit Hortensio similis? VILL. Illustres fuere & latè patentes Hortensij partitiones: Ciceronis non ita sese produnt aut exponunt, quam non minus explicatæ & faciles: nisi Ciceronem hoc minus eleganter usum partitionibus dicas, quod, ut Hortensius, causam in partitiones distribuendo, digitis non micaret, quod manum non efferret, & causæ capita, ungues singulatim premendo, non enumeraret. Illo tantum saltatriculæ & histrionis gestu, uel ratiocinatorum more, Ciceronem in partitionibus Hortensius superauit. Quid aliud, quo Ciceroni detrahas, in promptu habes? MOR. Nemo non fateretur fidem in oratore præcipuam esse. Eam conciliat probitatis & grauitatis opinio, eleuat artis aut intemperantiæ suspicio. Habeatur sanè uir bonus Cicero, quod uix illi Fabius, licet impendio fauens, audet tribuere: quod dissimulari non potest, artem magis ostentat, de se plura gloriose commemorat, licentius in alios inuehitur, quàm Cato, Brutus, aut Cælius, cui sanctitatem tribuit Quintilianus. Harum itaque rerum exemplum non ne rectius petemus ab Aristide, Phocione, Catone, Bruto, quàm à Cicerone? VILL. Breui dicam quod sentio. Quanquam in oratore, sicuti in alijs, fidem omnium maximè laudo, &

uitæ integritatem, cuius opinio beneuolentiam oratori conciliat, studiosissimè amplector, nihil tamen uitæ innocentiam, probitatemq; morum, aut ad artem dicendi, aut ad disciplinæ cuiusuis cognitionem adferre iudico: nec mihi placet ficta illa oratoris diffinitio, ut uir bonus sit, præscribens. Non fides eloquentem, non mores facundum, non uitæ integritas, disertum quenquam aut doctum efficit. Tribuit eloquentiæ facultatem & disciplinarum peritiā, tum ingenij felicitas, tum immensus labor, atq; uehemens exercitatio: qua si in arcem eloquentiæ inuadas, & compilatis rhetoricæ adytis, omnia tibi obuiam prodeāt, acute & cito reperiēs, distinctè & ordine disponēs, grauiter & uenustè pronuntiabis, firme & perpetuo memineris, ornate & suauiter eloqueris: neque, si omni scelere scateas, & omnium teterrimus atque flagitiosissimus sis, ideo oratoris nomen tibi auferri possit. Oratorē uirum bonum antiqui eam ob rem diffinire, ut ei auctoritatem adderent, quòd conciliarum animos dignitate hominis, rebus gestis, uitæ existimatione scirent, non quòd eloquentiam probitate, aut morum integritate uel iuuari, uel constare existimarent. Enituit ne illa semper in Demosthene fides: eluxit ne morum candor atque uitæ probitas: indignus igitur oratoris nomine, quòd anginam simulauit: dignior Phocion, quòd iustitia celebris, quòd probitate insignis fuit. Sed Phocionem cum Demosthene confer, eandem uterq; causam defensionemq;

*Quare antiqui
oratorem uirum
bonum diffinire.*

rei alicuius suscipiat: uter fulmina in dicendo præstabit: uter ingeniosius sibi animos auditorum conciliabit: uter plenius docebit: uter acrius concitabit: uter acutius disputabit: uter uniuersos causæ susceptæ locos doctius facundiusq; persequetur: friget hîc tua probitatis prædicatio, friget fidei gloria: ualet uigétque, uel cum scelere & nequitia, eloquentiæ magnitudo atque facultas, quæ in quouis & perditio & flagitioso efflorescere potest, probitate neque comparatur, neque alitur, neque augetur. Cicero nem omnium nequissimum, omnium inconstantissimum facias: Catonem Brutum, aut Scipionem Nasicam omni probitatis, uirtutis, grauitatisq; laude cumules, bene moratos & uiros bonos, institutis & factis commendatissimosingas: cui tamen primas in eloquentia tribues: quis famam oratoris celebrioris & laudatoris referet: Non hæc à me idcirco dicuntur, ut fidem, probitatemq; in oratore minimè esse debere suadeam, esse enim debet si quid aliud: sed ut illud potius ostendā, ultimam solere fieri in oratore, sicuti in conficiendis nuptijs, de moribus quæstionē. Spectatur in uirgine forma, de diuitijs inquiritur, omnia deniq; diligenter præter mores discutiuntur. Ita in oratore ingeniū primum expetimus, tum mundā & splendidam uerborum copiam, rerum prudentiā & scientiam, exercitationē, laterum bonitatem & firmitudinē, uocis lenitatem, gestum moderatum, & decentem, uenustumq; corporis motū inesse cupimus: prohibet

probitatis ornamentum si ad has laudes accedat, maior certè est oratoris existimatio, si desit, nihilo quidem minor aut leuior uidebitur. Valeat multum ad uincendum, eorum probari mores qui causas agunt; concilientur quam maximè ad beneuolentiam, eorum animi, apud quos agitur, si oratorem iustum, integrum & religiosum putent: effingat mores oratoris oratio: an, nisi sit plane hebes, genus illud & uerbis, & sententiarum adhibere, an eam actionis lenitatem facilitatemq̃, an eam uultus suauitatem alsimulare, an eam pudoris significationem præbere nō possit? qua probitatis, pietatis, grati animi, non appetentis, non auidi, non scelerati aut uitiosi, sibi existimationem colligat? qua mentes iudicum permoueat: ut accusatorem oderint, & reo faueant, ut delatoribus inuideant, ut reum saluum uelint, ut misereantur, ut se ad lenitatem dent, ut à seueritate refugiant? Ac me, ne diu quidem cogitantem ratio ipsa in hanc potissimum opinionem ducit, quare ueteres probitatē cum eloquentia iunctam uoluisse arbitrer, ne scilicet eloquentia commodorum & incommodorum plena instructus orator, probitatem & iustitiam nisi sequeretur, odio, aut ultionis cupiditate, aut ambitione incensus in eam potius partem propendēret, qua Rei publicæ obesset, quam suam dicendi uim ad omnium utilitatem conferret. Qua in re si quis animo colligat, quantam operam Cicero dederit, ut Reipublicæ prodesset semper, obesset certè nunquam, an illum

Quare ueteres probitatē cum eloquentia iunctam uoluerint.

eloquentia armatum ad oppugnanda , non propugnanda patriæ commoda fuisse putabit? an in illo fidem,quam ab eo abfuisse narras, probitatemq; desiderabit? an in illo constantiam requireret? Qui si nefarios Catilinæ conatus repressit, si patriam à proditione, à cede, ab incendio, à direptione, à uastitate seruauit, qui si enses & sicas, coniuratorumq; uim à ciuium suorum iugulo & capite repulit, qui si Rempublicam à perditis impulsam & corruentem sustentauit, si influentes in Rempublicam parricidas consilio & sapientia contriuit, compulit, domuit: si magnis populi Romani luctibus funeribusq; subuenit, si eidem omni semper prudentia, studio, diligentia, labore, uigilijs consuluit: si suas utilitates publicis commodis posthabuit: si Reipublice causa, graues contentiones, simultates, odia, inimicitias, suscipere non dubitauit, si illius nomine nullum periculum aut uitæ discrimen reformidauit: cur illi tot laborum, tot sudorum, tot periculorum, hunc saltem fructum capere non liceat, ut de suis in Rempublicam studijs aliquando gloriatur? ut, quæ pro Republica susceperit & egerit, frequentius commemoret? Illa non Ciceroni gloriæ ac cufationem factitant, sed à uiro Reipublicæ commodis dedito, in hoc toties prædicata suspicor, ut ad eadem capeffenda iuuentutem excitaret, ut malè de Republica cogitantes frangeret, dum turpem & calamitosum exitum scelestorum audirent. Veruntamen, quando hoc te uelle uideo, uolo etiam Ciceronis in
Rempu

Rempulicam beneficia crebrius ab illo commemorata, in suspitionem animi glorię appetentis incidere : ideo ne parum ornatè dixit : an idcirco minorem sui eloqui] admirabilitatem apud æquales fecit : An quod uita impudica & flagitiosa fuit Sallustius, an quod gancarum lustris oblectaretur, an quod nequam : infelicius ideo historiam scripsit : an quod rerum nouarum, seditionum cupidi & insolētes Gracchi, ideo eloquentiæ laude caruerunt : Inconstans sit, leuis & duplex (ut à suis appellatur) Erasmus : aliud scribat, aliud sentiat : Christianæ simplicitatis studiosum se esse fingat, & Lutheri commentationibus terriora sceleratioraq; cogitet : de seruo arbitrio libros edat, & arbitrium in libertatem asserendum omnium maximè putet : Luthero publicè inclamet, & priuatim Luthero omnia assentiatur : conuitia amet, rixas, turbas, dissidia, altercationes gratas habeat : adules-
tur, parasitum agat, & Scurras sua dicacitate imitetur : assentationis uitio laboret, nummos à quouis impudenter emulgeat : episcopos epistola aliqua (id quod perpetuò facit) aut librorū suorum inscriptione, auro argentoq; emungat : Nihilominus, si qua eloquentiæ laude clarus sit, aut si qua doctrina disciplinaq; excellat, illius & eloquentiam, & doctrinam disciplinamq; laudabimus, atque eandem posteritas mirabitur, & prædicabit, non ignara laudem doctrinæ, & scientiæ præstantiam de moribus pendimini me debere, usuq; fere uenire, ut in dissoluto & libe-

*Erasmus publicè
Luthero inclamat,
priuatim oia
Luthero assentitur.*

> Falsu

rius uiuenti acrius uiuaciusq; efflorescat ingenium, & disciplinæ extet altior cumulus, quàm in morosè religioſeq; degente: qui uel literis tingi, uel diligentius expoliri, nefarium, ~~ut putet~~, putet, & à pietate religioneq; alienum sentiat. M O R. Non dubito, quin te damnaturi sint multi, qui doctrinam sine probitate & morum candore commendes. V I L L. Nihil moror ridiculè religioſorum iudicium: ego literas non cultu probitatis quæri, nec probitatis studio quenquam impediri, quin literas diſcat, & in omni doctrinæ genere excellat, aſſerere non uerebor. Sed de his nimia. Tu, quod geſtis facere Ciceronem infectari ne omitte. M O R. Tibi pareo, & ad inſtitutum redeo meum. V I L L. Bono animo es, & uires collige animoſe obtrectator. M O R. Quid nobis infelicius, aut magis ridiculum, ſi tot noſtris laboribus, nihil aliud quàm inanem ac fallacem Ciceronis umbram aſſequi contingat? Quis unquam ueterum ſic admiratus eſt Ciceronem, ut ab uno petenda putarit omnia diſtionis ornamenta? Cui mortalium hætenus, ſic indulſit natura, uel in una quapiam diſciplina, ut unus in ſingulis eius partibus excelleret omnes, ut nō aliquid reliquerit in eo deſiderandum, aut ita dederit, ut non ab alijs ſuperaretur? quanto id incredibilius in dicendi facultate, quæ diſciplinis propemodum omnibus conſtat, quæ tot alias res deſiderat, quas nemo præceptis tradere poſſit? Fingamus hodie Ciceronem uiuere, & eſſe quendam Trachalo ſimillimum, utrum malles

malles à Cicerone uocis moderationem petere, an à Trachalo? Opinor ab eo, qui hac parte præfertur omnibus. Pudoris ac modestiæ specimen utrum malles à Crasso, si uiueret, petere, quàm à Cicerone? Et ne de singulis commemorē, non ne à singulis, in quo cæteris attestarent? Itaque mihi probatur Zeusidis exemplum, quod secutus etiam Quintilianus, imitatori præcipit, nec unum esse legendum, nec omnes, nec quoslibet, sed ex præcipuis deligendos aliquot eximios, inter quos Ciceroni primas tribuit, non solitudinem. Summum enim esse uult inter proceres, non solitarium, exclusis cæteris. VIL L. Erasmmum omnium sapientissimum prudentissimumq; iudica, nisi hîc deliret & repuerascet. Naturam cuiquã mortalium sic indulgisse negat, ut in quapiam disciplina, unus singulis eius partibus omnes anteeat. Recordare, More, & Erasmo signifi- *Naturã non magis uarietate oblectari, quàm uno aliquo perfecto opere nõnunquã superbire.* ca, naturã non magis uarietate oblectari, quàm uno aliquo perfecto que absoluto opere non nunquam superbire, suasq; omnes simul interdum uires generoso conatu ostentare. Formas egregias, quas nonnullis elargita est, te cum primum reputa. An Narcissi, an Endimionis tibi non in mentem uenit, tanta formæ elegantia atq; uenustate, ut Lunam amore sollicitasse dictus sit? An Helenam, Ledam, & omnes Iouis pellices non in memoriam redigis? quas efficitur à Ioue adamas, quid, rogo te, fingimus, nisi diuinam quandam formam, qua uel summũ deorum mouere possent, illis
p à nat

à natura tributam significantes. Ad ueriora me reuoco, Apellem pingendi arte omnibus præstare uoluit. Phidiam tanta sculpendi peritia instruxit, ut nulli prorsus cederet. Poëticorum numinum turbâ non recensebo, quibus ob hoc tantum diuinitatem docta antiquitas tribuit, quod unius alicuius artis disciplinaeque præstantia omnibus admirationem excitarent, & de cælo in terram deducti, non in terra geniti uiderentur. Quid Homerum, Pindarum, Platonem, Aristotelem, Demosthenem tam feliciter natos, & tanta disciplinarum artiumque omnium cognitione præstantes in aliud à natura editos putemus, nisi ut, quas communiter in cæteris ingenijs formandis uires suas quasi fastidiosè exercet, in his separatim animosius alacriusque periclitaretur, totasque studiose effunderet, uulgarium exemplorum tædio affecta, & rarorum aliquorum operum cōflandorum cupida? Eadem erga Latinos, qua in Græcos, beneuolentia, Ciceronem, Vergiliūque Romæ nasci uoluit, omnibus numeris, quod ad ingenij uehementiam, & eximiam eloquentiæ laudem spectat, post hominum memoriā longè absolutissimos atque præstantissimos. Erras uero, si me ita insanire putas, ut Geometriam, Dialecticam, & reliquas artes, quarum partem oratoriae facultati necessariam tradunt, à Cicerone aut petendam, aut peti posse dicam: quis enim hoc, nisi insanus dicat? Quicquid est in bene laudateque dicendi arte positum, in Cicerone constare censeo: quæ
uiam

uiam ad dicendi facultatem & sternunt, & muniunt, ab alijs assumi exploratum est. Nam nec artifex, cui discipulus erudiendus cōmittitur, instrumenta, quibus ad artem opus est, sufficit, artem tantum explicat: ita oratori, quæ ex Geometria, Dialectica, & ex illo disciplinarum circulo accersenda sunt, ex geometris & dialecticis quærat. Romani eloquij facultatem, à Cicerone petat, eamq; aliarū disciplinarum cognitione ex alijs scriptoribus illas præcipuè persequentibus comparata, si uidebitur, fulciat atque exaggeret. Quæ præceptis tradi non possunt, nobis cum innascuntur, & multa sensim exercitatione elucescent, seseq; dicturo non quæsita offerunt: ut uocis moderatio & lenitas, gestus, uultus ad rem accommodatus: quæ licet arte non deprauentur, magis tamen naturæ indulgentia, & profuso fauore, iudicioq; nostro constant, quàm industria aut labore conciliantur. Quid à Trachalo potius, quàm à Cicerone, si uterq; uiueret, petendam uocis moderationem mones? Emittatur ab inferis huc uterque, & aliquis cum illis eandem orationem pronuntiandam in senatu habeat, an, quæ in Cicerone corpore gracili uox gracilis commendabatur, eadem alij corpore robustiori conueniet? Qua corporis habitudine sis & proceritate, ad eam dirigenda est uox, sed semper pro re decorè flexa & immutata. Nunc ad Zeusidis exemplum: quod Quintilianus imitandū proponit. Ille cum Helenæ pingere simulacrum uellet, muliebris formæ

pulchritudine excellens, ut non putauit, omnia, quæ quæreret ad uenustatem, uno in corpore se reperire posse, quare plures uirgines pulchritudine spectabili unum in locum conduxit, ut certius & elegantius lineas duceret: eo quidem modo, si elegātem aliquam uelimus eloquentiæ speciem effingere, non unum aliquem autorem nobis proponamus, cuius omnes partes, quocumq; sint in genere, exprimendas nobis necessario arbitremur. Tuam sententiam non antea sequar, quàm hoc dissolueris. Si post exactum illud, & ad tot elegātes formas effictum Zeusidis opus, aliud quisquam muliebri simulacrum pingere uoluisset, an collectū Zeusidis iudicium ex tot uirginum pulchritudine, in lineis ducendis & imitandis sequi tutò non potuisset: an de integro conducendæ fuissent formæ æque præstanti uirgines: an non facile, qua quiduis parte in corpore muliebri pulchrum & uenustum sit, in Zeusidis exemplo non perspexisset: an omnia diligenter à Zeuside obseruata & comprehensa, non etiam obseruasset: Ita in Cicerone, qui ex Græcis oratoribus quicquid ad ornate dicendum pertinet, sedulò & accuratè collegit, an omnia artis oratoriæ lineamenta contemplari, obseruare, notare, deligere, & quasi manu tractare comprehendereq; difficile sit, aut operosum: Vilius est & abiectius Zeusidis exemplum, qui unam tantum mulieris formam expressit. Amplior Cicero ad imitationem & copiosior, qui nullum dicendi genus, nullam causæ speciem omisit, qua

fit,qua ingeniosè & penè diuinè non sit usus. Quam obrem non eum solum legendum, sed solum in, dicendo imitandum monebo, solum ad uim eloquentiæ exprimendam, & pueris & natu grandioribus proponam, id modo meminerint, uarietati studendum, sicq; tegendam & artis & uerborum imitationem, ut nequaquam appareat, sed nobis occulto uiam eleganter scribendi, & sapienter dicendi ostendat. Nempe non ferendus sit Zeusidis imitator, qui Pirrham picturus, eos in senilem uultum colores immittat, qui ad iuuenilem Helenæ faciem sint appositi, tantum uideat, ne quid tortum, ne quid mancum, ne quid mutilum efferat, ne quid à communi membrorum compositione & ordine discrepans, ne quid ridiculum faciat, nec sic Zeusidem imitetur, ut in uitium imitatio dilabatur, non imitantem iuuet. Linearum ductus in Helenæ simulachro sic obseruet, ut in Pirrha pingenda non eos sine mutatione referat, sed ita ad rem suam componat, ut nihil deforme sit, & minus decens. Ciceronem itidem qui sequatur, diligenter caueat, ne, quæ Cicero suo loco amplificat, preposterè extenuet, aut prescius explicet: quæ deprimat, ne attollat, & lastius in similibus diuagetur, ac uim suæ eloquentiæ fundat: denique id semel sit monitus, ne quid ineptè, ne quid insulsè, ne quid absurdè, aut scribat, aut dicat, omnia summo iudicio exequatur. MOR. In te hoc rectè iam possim torquere, frangas potius quàm corrigas. Nulla te disputatio immutabit, aut à sen-

tentia deducet, in qua manere perpetuò decreuisti. Interim tamen illud mecum cogites uelim, quanta pars Ciceronianorum uoluminum intercidit, & in his, diuinum illud opus de Republica, cuius fragmentum nescio quo fato seruatum, nihil aliud, quàm desiderio reliquorum uoluminum discrutiat animos nostros, quæ cuiusmodi fuerint, hinc licet æstimare Leonem, ut aiunt, ex unguibus. Ne quid etiam commorem de tot epistolarum libris, de tot orationibus iniuria temporum interceptis, de tribus uoluminibus, quibus Tiro libertus iocos & scitè dicta Ciceronis complexus esse legitur, deq; cæterorum huius uiri scriptorum naufragio. Quis potest igitur absolute esse Ciceronianus, qui tam multa illius non legerit? Præterea Cicero non tractauit omnes materias, de quibus si forte dicendum fuerit, unde tandem petemus orationis suppellectilem? an proficiscemur in campos elysios ab ipso percunctaturi, quibus uerbis illa talia fuerit dicturus? Quæso illud bona fide mihi respondendas, totum Ciceronem exprimendum censes, an mutilum? Quod si totum quantus est, & solum: quis totum, qui se totum non expressit? Rursus ea parte, qua se nobis conspicuum fecit, mutilus est ac uix dimidiatus. Accedit, quod in his etiam ipsis quæ extant, aliquando sibi ipse non satisfecit. Siquidem de inuentione libros, substituto oratore, ueluti damnauit, & orationem pro Deiotaro munus leuidentem uocat. Ad hæc in his quæ scripsit tantum non etiam res
cogno

cognouit, ipse Cicero non est Ciceronianus, cuiusmo-
di sunt libri de legibus, præterea multa. Quî fiet igitur,
ut totum, quantus est, æmulemur, quem & mu-
tilum habemus, & truncum, & in nonnullis indola-
tum, ac sui dissimilem? Nisi forte probaturus es illū,
qui inchoatas Apellis tabulas, aut rudes Lysippi sta-
tuas imitans, speret se alterum Apellem aut Lysip-
pum euasurum. Iam si quis sibi proponat insignem
Lysippi statuam effingendam, cui rubigo uitiarit mē-
tum & os, aut ei parti non imposuerit artifex sum-
mam manum, an grauetur eius partis exemplum
ab alio quouis artifice sumere, ne recedat ab exem-
plo, cui se addixit? an potius habeat illud, ut est cor-
ruptum & imperfectum, æmulari, quàm ex alterius
artificis signo, quod deest, supplere? VILL. Ista nos
loquacitate non obtunderet Erasmus, neque garruli-
tatis causam aucuparetur, si cum doctis nosset, Cice-
ronis imitationem, ut ante diximus, non tam uerbis,
constare, quàm artis expressione diffiniri, neque Cice-
ronianum uideri, qui anxie magis uerba Ciceronis
emendicet, quàm reliquas illius uirtutes in dicendo
sequatur. Itaque si de ijs sit nobis forte dicendum aut
scribendum, quæ Cicero ne cogitarit quidem, aut ad
quæ Cicero dictionis suppellectilem nō suggerat, ideo
non minus Ciceronem imitabimur, si bene Latinis
uerbis ea efferamus, et usitatam Ciceronis elegātiā,
facilitatem, stili lenitatem, ordinem, acumen retinea-
mus, dignitatemq; eloquentiæ non deformemus, ad

cuius uim ostendendam & explicandam satis multa Dei beneficio extant M. Tullij scripta. Etenim ita eloquentiæ studiosis prospexit & consuluit summa illa Dei prouidentia, ut, in quibus neruos omnes intendisset, & suam omnem eloquentiam exhaustisset diuinus orator, ea modo habeant & legant. Plagam, scio, grauisissimam accepit res literaria, interceptis de Republica, de gloria, de luctu minuendo, & multis epistolarum Ciceronis libris. Præstantiora tamen & grauiora, quæ ille scripserat ad nos peruenerunt, quibus si operam demus, quæ si diligenter imitemur, totum, ut nunc est, Cicronem (quod fieri non posse putat Erasmus, imitationem in uerbis tantum constituens) præclare exprimemus: uerborum scilicet Latinorum puritatem non ab eo solum discemus, sed eleganter omnia, ornate, splendide, acutè, grauius sapienterque eloquemur. Senis uero tui sententia, ne illa quidem, quæ pauca Ciceronis habemus, uel digna lectione, uel imitatione sunt, impolita ea certe & indolata. De inuentione libros substituto, inquit, oratore damnauit: in ijs quæ scripsit tantum, non etiam recognouit, ipse Cicero Ciceronianus non est. Senem delirantem per facile mehercule ferrem, risuque libentius exciperem, quàm tam absurdam sententiam pluribus oppugnarem: at æqualibus meis consulam, ne ridiculo isto iudicio debilitati & fracti iuuenes alacritatem abijciant, qua ad Cicronem imitandum continent, & quantulum Ciceronis, dij immortales à barbarorum

rorum immanitate crudelitateq; seruauit, ea ut malè
 culta impolitacq; fastidiant, uel oscitatè legāt. Quàm
 delirat & balbutit senex? Libros, inquit, de inuentio-
 ne damnauit scripto postea oratore. Non sic protis-
 nus opinantur eruditi, quibus persuasum est, quan-
 quam libros de inuentione antea edidit, quàm ora-
 torem scripsit, tamen eos ipsos oratori sic accommo-
 dados & necessarios, ut interpretationis loco haberi
 planè possint. In oratore dum L. Crassus, Catulus, *Orator Cicero-*
 M. Antonius, Cæsar, Cottaq; colloquuntur, maio- *nis.*
 rem uim eloquentiæ promit, & illam propè foren-
 sem dicendi grauitatem retinet, uiros grauißimos fa-
 cundissimosq; grauißimè facundissimèq; disputan-
 tes inducens: ac eorum personis dum decorum &
 proprium disputationis genus tribuit, stili ubertati,
 & rerum ponderi indulgit, atque Aristotelem in ea re
 non imitari, sed superare conatus est. Libros autem *Quid in libris de*
 de inuentione ita scriptos uoluit, ut nihil præter nuda *inuentione Cicero.*
 artis rhetoricæ præcepta, nihil præter orationis par-
 tium diffinitiones & explicationes haberent. Inuētio *Inuentio.*
 quid sit, pluribus designant, & in ea causæ constitu-
 tionem ponunt: mox de cōstitutione controuersiam
 pendere declarant, eamq; multiplicem & uariam fa-
 ciunt, siue facti, siue nominis, siue generis disceptatio-
 nem desideres. Causarum simul exordia proponūt, *Causarū exordia.*
 eorumq; uitia persequuntur: uulgare, commune,
 commutabile, longum, separatum, translatum fu-
 giendum admonent: quando insinuatione utendum
 q sit, ost

Narrationes. sit, ostendunt. *Narrationes* deinceps, & *narratio* num genera complectuntur, eas breues, apertas, probabiles præcipiunt. Tum *partitioni* breuitatem, *absolutionem*, paucitatem præscribunt. *Confirmatio* nem argumentatione, ratiocinatione, inductione, complexione, enumeratione, signo, exemplorum collatione constare prædicant. *Conclusio* ni enumerationem, indignationem, conquestionem assignant. Quæ omnia licet uenustius, ut omnia elegatissimè, tangat in oratore Cicero, neque quicquam, quod ad artem dicendi aptum sit, prætermittat, faciles tamen & uulgatiores rhetoricæ præceptiones non ita digerit, neque ita singulatim, & quasi orationis partes alias alijs necesse do, percurrit. Quid postea in oratore suo, quod in alijs rhetoricæ libris præcepisset, uelut imperitè & indoctè traditum, correxit; quid à se scriptum emendauit; quid immutauit. Tu ne quòd pluribus locis eadem sæpe repetat, idcirco ante dicta negligi debere suadeas; an quòd ille non dissimilia in officiorum libris, quàm quæ de finibus, scripsit, ideo libros de finibus, tanquàm inutiles & superuacaneos, dānari uelis? Tam ridiculum est, quod Erasmi uerbis pronūciasti; Ciceronē in ijs, quæ tantum scripsit, nō recognouit, sui esse dissimilem, uixque Ciceronianū uideri, cuius modi sunt libri de legibus. Mirum: hominem ætate exacta, longo rerum usu, diu in literis uersatum, tanta ingenij celebritate & fama, omni ad extremum iudicio carere, & mentis sanitate esse nulla, Dialogos de legibus

legibus humili & tenui stilo scripserit Tullius: non uerbis & sententijs, ut in causis intumescat: an ideo sui dissimilis? an non Ciceronianus Cicero? Ciceronianè dialogos scribit, quemadmodum causas dicit Ciceronianè, neq; sui dissimilis est, qui humilia humiliter & exiliter, elata & grauià elatè & grauiter tractat, eadem semper uerborum lenitate & puritate, uariato tantum pro rei uarietate stilo, & accommodato ad rem præsentem, quæq; in manibus est, scribendi genere. Non me iniuria irrideas, More, si, qua quisquam politiori grauioriq; oratione ad dicendum uti possit, hîc nos dum animi gratia colloquimur, & de re non grauißima disputamus, eam ambitiosè affectem, & uerborum splendorem, longiores sententijs, aut numerosius cadentem orationem aucuper. Itis dem risus causam, & repræhensionis argumentum præbuisse, nec Ciceronianus fuisset tum demum Cicero, si, qua iudices commouebat, & in quam uolebat partem, rapiebat impellebatq; audientem coronam, eandem eloquentiæ uehementiam in dialogis præstitisset. Tum ineptè artem ostentasset suam, cuius nimiam ostentationem proximè illi obijcietas: tum illum Asiaticum & redundantem iure obrectatores appellassent, tum hebetè, & iudicijs rationisq; expertem uocassent, qui, quod conabatur, non nossent, nec rerum decorum calleret: tum non paruo nostro commodo illum abiiciendum negligèdumq; admonuisses, scriptorè communi sensu uacuum. Sed

tamen quid illius, inquit, omnia tantopere admiramur, qui sua interdum ut abiecta & ieiuna spernit? Orationem pro Deiotaro, munus leuidēse uocauit, igitur quicquā illi deesse senserat. Quid Erasmo fingi potest stultius? Quod Cicero prae alijs suis diuinis scriptis paruum fortasse duxit, nec uehementer laudauit, minus hoc absolutum Erasmus iudicat: hinc Ciceronis opera despicit, hinc ad imitationem non satis esse scribit: hinc, qui Ciceronem sequitur, cum eo confert, qui cum insignē Lysippi statuā sibi effingendam proposuisset, cui rubigo uitiaisset mentum & os, aut ei parti non imposuisset artifex summam manum, grauabatur eius partis exemplū ab alio quopiam artifice sumere. Hic Erasmo lasciue garrienti, ita quiuis respondeat. Scriptorum elegantiam nulla neque uetustate, neque annorum serie, ut signum rubigine, uitari. Mansit eadem in Ciceronis scriptis usque à Cicerone uenustas, qua ab illo & composita, & relicta sunt, nec ulla illis labes maculaue obrepfit: quæ qui sibi imitanda proponit, quid aliena mutetur, cum his nulla parte conferenda? At suis Cicero summam manū non imposuit. Ita esse fac, si libet. An minus notam Ciceroni, quàm Erasmo linguam latinam dices? qui, cum sua omnia præcipitet, qui, cum omnia proijciat, qui, cum nihil elimet, quicquid tamen à se proficiscitur, sine ulla uel calumnia, uel reprehensionis metu exire non solum posse, sed laude efferrī debere arbitratur. An sua Cicero uel
cogit

cogitatione tantum informata, uel utcunque reposita, non tutius, non cum maiori laudis expectatione euulgare poterat? Eruditionis iudicijque plenior fuit illius negligentia, quam omnis Erasmi, uel Erasmi similis blateronis diligentia: quanquam tam diligentem & uigilantem non scriptorem solum, sed consulem & patriæ defensorem quis negligentiae accusare audeat? MOR. Omnia ut Ciceronem diuine scripsisse assentiar, illum tamen habemus non modo truncum ac lacerum, uerum etiam ita deprauatum, ut, si reuiuisceret, ipse, opinor, nec agnoscere sua scripta, nec restituere posset, quæ librariorum ac semidoctorum audacia, incuria, incitiisque corrupta sunt. Ut ne commemorem interim supposititia, falsoque titulo Ciceronem autorem mentientia. Quo de genere sunt libri rhetorici quatuor ad Herennium, hominis haudquaquam indocti. Sunt & inter orationes, quæ non à Cicerone scriptæ, sed ab alio quopiam erudito excendæ dictionis gratia confictæ uidentur. Adiecta est nuper oratio pro M. Valerio, quæ solæcismis scætet, tantum abest, ut Ciceroniana dici possit. Nec desunt, qui Portij Latronis declamationem in Catilinam, pro Ciceroniana legant oratione. Proinde si deuotis animis nos unius Ciceronis imitationi dediderimus, citra delectum expressuri, quicquid apud illum compererimus, nonne nosmet in summum coniecimus discrimen, ne cum diu multumque nos ipsos torserimus, tandem Gotthicas uoces pro Ciceronianis flosculis

amplectamur æmulemurqꝫ? VILL. Mancum Ciceronem paucis locis habemus, nec parua ista locorum aliquot iactura impedit, quin nos ad dicendi facultatem satis & abundanter instruat. Deprauatum uero antea, & librariorum incuria incitiatqꝫ corruptum, sic restituit uirorum doctissimorum tum Gal-lorum, tum Itatorum diligentia, & assiduus in literis labor, ut omnia in illo nitescant atque splendeant, ut in illo nihil iam offendi, nihil displicere, nihil animaduerti possit, aut, ut mendosum, notari. Incubuit in eam curam ante omnes Gellius, quem sequuti Val-la, Politianus, & ex nostratibus aliquot, Budæus, Longolius, eum ita expurgarunt, ut, si reuiuiscat, illis gratiam relaturus sit, nihil in suis scriptis mutaturus. Supposititia, & Ciceronem ementiētia, quis pro Germanis Ciceronis scriptis recipiat, qui illius lectione aures habeat paulum tritas? Quo de genere an sint quatuor ad Herennium libri, non grammatici quidem, sed insigniter docti plurimi certāt, & adhuc sub iudice lis est. Inclinat tamen in hanc sententiam prope eloquentiū pars, ut ne diutius, tanquam spurā, illi à patris sedibus amendantur, & inter Tullij lucubrationes numerētur. Adiectam nuper Ciceronianis orationē pro M. Valerio solocisimis scatenentem, inter Ciceronianas doctus nemo constituit, solocisimis solis commonefactus, eam à Cicerone esse alienā. Portij etiam declamationem tametsi acutam & elegantem nemo pro Ciceroniana legit, Quamobrem non periculum

culum sit, ne cum diu multumque nos ipsos torserimus, tandem Gotthicas uoces pro Ciceronianis æmulumur. Non tanta sagacitate canes feram subodorantur & excitatam persequuntur: neque tanta naturæ prudentia flores internoscunt apes, & suauioribus insidunt, quanta peritia & solertia Ciceronianas uoces à barbaris secernunt, qui Ciceronem uel semel legerrint, & uerborum mundiciem suauitatemque studiose in eo animaduuerint. Ecquam putas Cæsari fuisse stili Ciceroniani notam, qui tanto iudicio, qui tam scilicet & perite Ciceronis scripta diiudicabat, & ab alijs secernebat? Nota ea erat perpetua, ut, quæ uerbis mundis, puris, proprijs, significantibus, splendidis, ornatis, rotunda & æquabili structura composita esset oratio, eam Ciceronianam putaret, eam à Cicerone profectā crederet: cuius iudicium si sequamur, quis nobis in Ciceronis scriptis aut uocibus cognoscendis imponet? an sollicitissimos pro Ciceroniana elegantia amplectemur? M O R. Aliud est, quod te forte magis commoueat. Quid quod eruditi non negant in Ciceronis scriptis inueniri sollicitissimos inexcusabiles, quales & olim exciderunt, & excidunt hodie uiris multum doctis, dum in uarias res distracta cogitatione, magis sententiæ præcedentis meminerint, quàm uerborum, eoque fit, ut periodi clausula prioribus non respondeat. Quod genus sit. Diutius commorans Athenis, quoniam uenti negabant soluendi facultatem, erat animus ad te scribere: initio

Que Cæsari nota in stilo Ciceronis cognoscendo.

uersabatur in animo, uolebam, aut statueram, post magis arrisit, in animo erat: quæ uoces eundem efficiunt sensum, sed parum congruunt ijs, quæ præcesserant. Quin Aulus Gellius libro 6. cap. 15. profert locum ex secundo libro Ciceronis de gloria, in quo manifestò lapsus est, uersus aliquot Homericos ex Iliados. H. tribuens Aiaci, cum ibi dicantur ab Hectore.

VILL. Vulgare est, cuique esse linguæ multas loquendi formas, quæ duriores uideantur, & omnibus grammaticorum regulis normisq; solutæ, quas si legibus & præceptionibus astringas, linguæ illius dignitatem uiolens, & uim libertati adferas. Eo loquendi genere si Romanè, ut Romani, usus est modicè Tullius, id ne ut uitiosum animaduertendum duces? An multa Romanos domi inter loquendum usurpasse dubitas, quæ scriptis elata, posterì ab illa ætate remotiores, asperiora iudicarunt: quorum nulla constet ratio, sed in usu tantum & loquendi consuetudine fuere posita. Romanè itaq; scribens Tullius uerbum prioris sententiæ non addidit: Erat animus ad te scribere dixit. Piaculum hoc putat ~~deus~~ publicis supplicationibus expiandum. Aequè dirum ac tetrum facinus Cicero admittit, cum uersus Homericos Hectori tributos, Aiaci assignat. Quis hæc ab ~~deus~~ sicco collecta iudicet? Ob hæc ne Ciceronem abiiciendum suadebit? ob hæc ne negligentius imitandum probabit? In ea, inquit, uitia necessario incurrendum est, si totum Ciceronem exprimamus. Exprimemus certè

totum

totum, & his, si libet, abstinēbimus, quandoquidem non raris istis loquendi modis, sed uerborum elegantia, & sententiarum grauitate referenda exponitur. MOR. Obseruatum tamen est, & memoriæ proditum, Ciceronem dixisse quædam, quæ nemo doctus putauit imitanda: ueluti cum ait, in potestatem esse, pro in potestate esse. Rursus in edicto M. Antonij M. Tullius ueluti Barbaram & Latinis inauditam uocem proscindit, pijsimus à pio, cum ea apud probatissimos linguæ Latine scriptores reperiatur. Idem ut Iolcecon in eo reprehēdit, quod scripisset, facere contumeliam, quemadmodum Latinè dicimus, facere iniuriam, cum apud Terentium optimum, ni fallor, elegantiæ Romanæ autorē ita loquatur Thais: Nam si ego digna hac contumelia sim maximè, at tu indignus, qui faceres tamen: opinor enim tacitè repeti contumeliam. Idem ab his uocibus nouissimè & nouissimus, ceu male Latinis abstīnuīt, cum eis non ueriti sint uti M. Cato, & Sallustius. Qua religione M. Tullium A. Gellius testatur usum, & in alijs multis dictionibus, quibus autores bene Latini, & ante illum, & post illum frequēter usi sunt. Fertur & geminum, sī, scripisse, quoties antecedebat longa uocalis, uelut in cāssa, uisse, remissi, pro causa, uise, remisi. Num igitur totum Ciceronem imitantes abstinēbimus ab his, quæ contra doctissimorum hominum sententiam uni Cicroni non placuerunt? aut ea sequemur, quæ nulli docti uoluerunt imitari,

ac ne excusare potuerunt: VILL. Libenter, unde aliquis inuidiæ flatus ostenditur, uela dat Erasmus, classem in Ciceronem instruit, atq; idoneam nactus tempestatem, & prora & puppi totum se ad obtrectationem rapit, Tullij nauem, ueluti ad barbarici scopulum allisam, ridet, Dixit Cicero (inquit) multa, quæ nemo doctus putat imitanda, ueluti cum ait in potestatem esse. Tam uino madebant, More, qui potestatem pro potestate descripserunt, quàm ridiculus est Erasmus, qui hæc minutula consectatur, librarium negligentia orta, non à Cicerone profecta. At in M. Antonij edicto, pijsimus à pio tanquam barbaram uocem non satis rectè notat, apud probatissimos linguæ Latinæ scriptores frequentem. Idem hunc loquendi modum improbe reprehendit, facere contumeliam: qua locutione uti non ueritus est Terentius: nouissimè quoq; & nouissimus nimium religiose fugit. Pijsimus, facere contumeliam, nouissimè, nouissimus, si ueluti partim barbara, partim ut noua & dura uitauit Cicero, non hoc certe temere. Neq; mehercule mihi persuasero, ut, quæ tolerabilia nouisset, ea in senatu coram linguæ Latinæ principibus, tanquã barbara & Latinis hominibus ignota reprehendisset. Quis Ciceronis ingenium usque adeo ignorarit, ut, quorum reprehensione, in reprehensionis periculum uenisset, ea illum reprehendere uoluisset arbitretur. Sequitur, ut quare à nouissimè & nouissimus abstinuerit, paucis ipse audias, & illum uerborum

rum delectu sapiēter usum, non religione uitiose abusus cognoscas. In Italia, in Gallia, in Britannia, in Hispania, uel in quauis etiā urbe, peruagata multa uerba, multosq; loquendi modos esse sæpe intelligas, quos elegantiae cupidiore, aut ut duros & male proprios, aut ut recēter natos, aut ut insulsos & uenustate carentes negligūt. Sic prorsus multas quondā Romae percrebuisse uoces nō ambigo, plebi & rudi multitudinī gratas, oratoribus & exactiori auriū iudicio uiris non continuò arridentes: quas, si Catonem obsoletae dictionis peramantē, aut si Sallustium audacē uerborum architectū opificemq; imitemur, non reijciemus: si Tullium locutionis mundae & purae obseruantissimū & undiq; splendentem sequemur, ueluti fecē, aut ex lacuna aliqua erutas sordes respuemus. Cætera quę illi exprobras, ne nauci quidem facio. Feratur causam, uisse, remissi, duplici, si, uel septēplici, scripisse. Nihil hæc neq; ad eloquentiæ facultatem, neq; ad actionis lenitatem: nostram Ciceronis imitationem neglecta non minuent. MOR. Age, si totus erit exprimendus, an illius exemplo, Musis & Apolline nullo scribemus uersus? VILL. Orator fuit, nō poëta Cicero, neq; carmina reliquit, quæ imitari possis. MO. Næ tu bonam eruditionis partem Ciceroni adimis, artem poëticam cū illi adimis. Cæterū quid uetat, quominus utamur hac laudis diminutione, in his etiā uirtutibus, in quibus ab alijs superatur, quę admodū in toto genere multis est inferior, ne dicam

omnibus; quàm multos uersus admiscet scriptis suis ex Homero, Sophocle, & Euripide parū feliciter uersos, præter Græcorum exemplum in iambicis eam usurpans libertatem, quam sibi Latini comœdiarum scriptores permiserūt. Tu si quid simile uoles facere, num uereberis ea felicius, si possis, ac minore licentia uertere, ne sis parum Ciceroni similis? An non uitiat orationē solutam, qui uersiculos, quos uertēdo facit suos, parum reliquæ dictioni congruentes admiscet? Tum quoniam identidem ille suis libris ~~asp~~ spargit uersus Ennianos, Næuianos, Pacuuianos, & Lucillianos, horridam illam & inconditam antiquitatem resipientes: tibi religio erit similes, imò dissimiles uersus ex Vergilio, Horatio, Ouidio, Lucano, Persio uel proferre: quorū lucubrationes, ut minus horroris, ita plus habent, tum elegantiae tum eruditionis. An hîc metues uideri M. Tullio dissimilis? VILL. Ciceronis laudī nihil magis detraho, eum cum poëtam nego, quàm Vergiliū nā uolo, illi cum aufero nomen oratoris. Sua uterq; laude floruit: alter in foro celebris, alter musis recōditionibus clarus. Nec illud adhuc suæ potentiæ exemplū natura edidit, ut unus utroq; munere æquabiliter excelleret, & summa artis oratoriæ facultate, & uersus scribendi facilitate. Ciceronem artis poëticæ laude spolia, illum uersu componendo omnibus inferiorem clama, facile istam laudem concedit multis, sed, quod est oratoris propriū, aptè, distinctè, ornatè & copiosè dicere, quoniā in eo studio

Ciceronis uerba
hic de industria
traducta.

studio ætatem cōsumpsit, si illud sibi assumit, uidetur id suo iure quodāmodo uēdicare. Versus autē, quos scriptis suis uel ex Homero, uel ex Sophocle, uel ex Euripide adspersit, si parū feliciter uertit, quid illum eam ob rem agitas? Id ne Ciceroni fuisse negotij putas, ut studium, laborem uē suum in uersibus poëtarum tam exacte uertendis poneret? Versuum auctoritate & sententia utebatur, eos utcunque uertens, sed aptè, & eleganter ad rem suam transferens. Stertenti quidem ~~illud~~ hoc ipsum excidit, Ciceronis orationem, uersiculis, quos admiscet, parum reliquę dictioni congruentibus deformari. Effluxit ex eodem insanix fonte maledictum, quo illum perstringit, quod Ennianos, Nęuianos, Pacuuianos, Lucillianosq; uersus, horridam illam & inconditam antiquitatem resipientes libris suis identidem inserat. Quos, quæso, præter illos, citare sua ætate poterat? An eos, quorum lucubrationes ut minus horroris, ita plus elegantix & eruditionis habere ~~possunt~~ prædicat? Suauitatis plus fortè habent, eruditione & doctrina antiquos non superant. Ipsorum tamen & antiquorum poëtarum uersus scriptis nostris si à nobis aspergentur, à Tulliano more non recedemus, & illum expressius imitabimur. M O R. At quid est necesse semper ac modis omnibus esse similem, cū sæpe potius sit esse parem, & interdum facilius superare, quàm equare, hoc est meliora scribere quàm similia? V I L L. Tantam esse ~~est~~ insolentiam facile profecto cre-

dam, ut Ciceronem à se superari, aut antiquorum poetarum uersibus elegantiora scribi posse, sibi ipse suadeat : sed qui illorum elegantiam uenustatemq; ab eo æquatam, non dicam superatam, putet, nisi qui de mentis potestate exierit, non reperiēs. MOR. Ea est tamen multorum opinio, sed illud ipsi pugnent, hoc de te modo quæro, si quis usque adeo deditus sit, & addictus Ciceroni, an non periculum sit, ne cæcus amore, uel pro uirtutibus miretur uitia, uel sciens ipsa quoque uitia effingat? VILL. Nulla sunt in Cicerone uitia. MOR. Nulla; nisi forte solœcismus uitium est apud alios, apud Ciceronem non est. At solœcismos, ut diximus, eruditi commonstrant in libris M. Tullij. Nisi labi memoria uitium non est, & hoc commonstratum est à doctis. Si uitium non est immoderata mentione propriarum laudum etiam illum grauari, cui patrocinaris, quod in Milonis defensione factum testatur Asconius Pedianus, & uix usquā non submolestus est hoc affectu Cicero, non sine causa, ut eleganter inquit Seneca, sed sine fine glorians. Et haud scio utra re sit intemperantior, de se glorians, an alios insectando. quocunque colore defenderis hæc, illud inficiari non poteris, hac duntaxat in parte, rectius exemplum ab alijs peti posse. Ego uero lubens missum facerem sermonem de moribus; nisi rhetores ipsi contenderēt, bonum oratorem esse non posse, qui non sit idem uir bonus. VILL. Solœcismum nullum in Ciceroneprehendimus, omni uitio ca

tio ea parte caret. In potestatem esse, unde solocissimum notas, scriptum est ab indoctis aut dormitantibus librarijs, non à Cicerone, elegantiae studiosissimo dictum. Nec memoria lapsus est, cum superiorem periodum uerbo claudicare uoluit. Nusquam se immoderatus aut magnificentius iactat. Res à se pro Re publica gestas non sine argumento narrat: nusquam, nisi commodè atque per necessariò, commemorat. Neutra re intemperans est, aut de se gloriando, aut alios insectando. Summa omnium uoluntate & gratulatione, de fractis & repressis perditorum conatibus, de extincto coniurationis Catilinæ incendio, de seruata Republica & publicè & priuatim gloriatur. Libentissimis omnibus Verrem, Clodium, Antoniumq; insectatur: neminem probum offendit aut lædit, bonos laudat, & dictis perhonorificis ornat. Sed immoderatè gloriatur, sese intemperanter iactet, omnium insectator sit acerrimus (à quibus uitijs longissime abest) uir sit minimè bonus, & omnium mortaliū pessimus, nequissimus, teterrimus: ea ne, deum immortalem, obstabunt, ne à mortui elegantissimis doctissimisq; scriptis, copiam, uenustatem, grauitatemq; haurire abunde possimus? ea ne gloria studio nos incendit? ea ne iactantiores nos efficiunt? ea ne uitio aliquo, aut flagitio nos imbuunt? Mores sibi quisque aut perditos, aut probos effingit, non ex scriptorum lectione induit. Nil spirant, nil instillant Ciceronis libri, quod aut nos nequitia tingat, atque infu-

r 4 ciat,

ciat, aut mentem animumq; cuiusquam à recto honestoq; reuocet. MOR. Animosum patronum, & suæ existimationis defensorem eximiè ad omnia infirmanda paratum habet Cicero. Verum age, num tibi uidetur esse uitiosa compositio, si dictio sequens incipiat ab iisdem syllabis, in quas desijt præcedens, uelut echûs imaginem ludicram referens? Quod genus erit, si dicas, ne mihi dona donata, ne uoces referas feras, ne per imperitos scribas basso. Ineptam & absurdam compositionem non negabis. Atqui talem proferunt ex amasio tuo Cicerone. O fortunatam natam me consule Romam. VILL. Nullo maiore conatu elabar, si culpam in librarios conijciam, & uersum istum ita à Cicerone relictum dicam. O fortunatam Romam me consule natam. Sed id à me dictum nolim, hoc uelim potius confirmatû, istum aut similem syllabarum concursum uitio, non uenustate carere: ut illud aliud, Africa terribili tremit horrida terra tumultu. Quod Vergilius in hoc hemistichio non uitauit, Casus Cassandra canebat. Occurrunt hæc scribentibus, naturæ felicitate, uel à nobis prudenter quærentur, ut rem cum emphasi exprimamus, & subiiciamus oculis. Scilicet tanto erat Cicero stupore, tanta ingenij rusticitate, tam agresti iudicio, ut non citius, quàm nos, uersus asperitatem sensisset; tanta erat ille uerborum inopia & paupertate, ut elegantiozem & suauiozem uersum uel saltâdo fundere non potuisset; tam dissoluto erat ille & existimationis

nis

Dorica castra;

nis negligenti animo, ut, quem nouisset ridiculum, & indignum sua musa uisum iri, incudi reddere nō maluisset, quā impolitum exire. MOR. Non repugno, Sed nondum elapsus es. En tibi nihilo meliorē compositionem ex oratione soluta refert Quintilianus: Res mihi inuisæ uisæ sunt Brute. Ne quid calumnier interim de duobus molossis in clausula. Quid hīc memorem de uocalium crebra collisione, quæ reddit hiulcam & inamœnam orationem? an nō hoc quoq; notatū est à doctis in Cicerone? VILL. Huius etiam præposterī uerborum ordinis culpam in Librarios consero, sicq; Ciceronem scripsisse credo: Inuisæ mihi res uisæ sunt Brute. Ita nec compositionis lenitatem desyderabis, nec duos in clausula molossos calumniabere. Numerorum tamen rationem ubiq; constare non necesse est, modò numerosè cadat periodus. De uocaliū collisione Ciceronē ita in Oratore scribentem audi. Habet (inquit) ille tanquā hiatus *Cicero.* concursu uocalium, molle quiddam, & quod indicet non ingratam negligentiam, hominis de re magis, quā de uerbis laborātis. Si quando igitur Tullius uocalium concursu & hiatu non uastius residere, sed paulum subsidere uideatur, aut infra, quā solet, diductus sit, facit hoc consultò, non uitio aliquo, aut orationis eleganter struendæ ignorance. Cum cæteris illius laudibus hanc esse uel maximam declarabant, qui cum eo causarum capita partiti, perorationem semper illi relinquebāt, in qua lenissimo uers

s borum

borum fluxu , & quadrata orationis structura ad commouendos & concitandos affectus peropus est. MOR. Neglexit, inquis, consultò uocalium collisio nem Tullius, non anxie uitauit interdum orationis hiatum: nihil reclamo, modò fateamur quiddam esse apud alios, quod apud Ciceronem nō sit, & sit apud alios melius. Deinde ex te quæro, ecquem nouisti scriptorem tam uigilantem, tamq̃ felicem, ut non alicubi dormitarit? Vtrum igitur putes esse cōsultius, imitari dormitantem Tullium, an uigilantem Sallustium, aut Brutum, aut Cæsarem? An non sic Homerum imitatus est Vergilius, ut multa correxerit, non pauca reliquerit? non ne sic Hesiodum, ut nusquā non uicerit? Non ne sic Horatius est Lyricos Græcos æmulatus, ut ex unoquoq̃ decerpēs quod esset bellissimum, omnes post se reliquerit? An non sic imitatus est Lucilius, ut quædam in illo sciens prætermiserit, ab alijs sumpturus, quod imitatione dignius esset? Quid alios commemorem? Num ipse M. Tullius tam admirabilem eloquentiam ex uno quopiam contraxit? an potius exculsis Græcorum pariter ac Latinorū philosophis, historicis, rhetoribus, comicis, tragicis, lyricis: demum ex omni scriptorū omnium genere suam illā diuinam phrasim collegit, contexuit, absoluit? Si modis omnibus libet imitari Ciceronē, & hoc illius exemplum imitemur. VILL. Quò mirandum est magis, quoq̃ rarius accidere scimus, tam uigilantem esse scriptorem quenquā, ut nunq̃ dormitet, eo admirationē nostram

nostram plus plusq; auget incredibilis Ciceronis uirtus, qui nusquā non uigil est, nusquam non in uerbis expergefactus, diligens, nusquā non in sententijs lynceus, acer, acutus, nusquā non ad omnia summo conatu perficienda, & eximio ornatu excolenda promptus atq; excitatus, neq; est, quare illum dormitasse calumniaris, & uigilantē Sallustium, aut Brutum, aut Cæsarem imitari malis. Cæsarem dormitantē non desprehēdes, Sallustium pro uerbis peregrinis & extraneis in urbem Romanā asciscendis laborantem forte reperies, cuius inanem circa hæc laborem & anxiam solitudinē aspernamur, reliqua eius ornamenta non reijcimus. Cæsarem undiq; candidum & nitidum amplexamur. Ciceronem omnibus longē splendidiorē illustriorēq; sequimur atq; imitamur à Vergilij more & exēplo non dissidentes, qui ex Homero, quibus se iuuari posse nouerat, in rem suā tectè occultoq; cōuertebat: quæ sibi nulli essent usui, relinquebat, multa immutabat & uariabat. Hesiodum Homero inferiorē sic sequebatur, ut sequēdi satietate aliquādo defatigatus, longius excurreret atq; anteiret. Id quod si in Cicerone efficiemus, quis celeritatē nostram, quis strenuitatem non commēdet? quis conatus nostros, quis uirium magnitudinē non admiretur? quis ingenij alacritatem non prober? Horatium præterea non fugiemus, ex unoquoq; Lyrico poëta decerpentem, quod est bellissimum. Sic Tullius admirabilē suam eloquentiam non ex uno quopiam contraxit, sed ex

Philosophis, Historicis, Rhetoribus, Comicis, Tragicis collegit. Nihil tamen minus, quàm Philosophos, Historicos, Comicos, Tragicos, dicēdo imitatur: nō omneis, quod præcipit Erasmus, sequitur, nō omneis æque exprimit: suo utitur, non alieno loquēdi genere. Omneis diligenter legerat, Demosthenem præcipue rebus omnibus refert. Omneis etiam ut euoluamus & legamus, monent oratorum præcepta, sed ut unum imitemur, iubent, cui hæreamus toti, cuius imagine & similitudine insignes ab eloquentibus digno scamur & colamur. MOR. Quid? an nō hoc potius docuit ipse Cicero, caput esse artis, artem dissimulare? Friget enim & fide caret, ac uelut insidiosa timetur oratio, quæ significationē artis dedit. Quis enim ab eo non metuat, qui fucum & uim parat animis nostris? Itaque si feliciter Ciceronem imitari uolumus, dissimulanda imprimis est ipsa Ciccronis imitatio. Atqui nusquam dilcedit ab illius lineamentis, qui uerba, qui figuras, numeros, ex illo concinnat, quædam imitans etiam non imitanda: ueluti quidam Platonis discipuli, adductis humeris præceptorem referebant: Aristotelis auditores subbalbum quiddam in loquendo, quod in eo fuisse legitur, reddebant: & quoniam manifestò præ se fert imitandi studium imitator, cui uidebitur ex animo loqui, aut quid denique laudis assequetur? Nimirum id quod assequuntur ij, qui scribunt centones. Delectant forsaisis, sed paulisper, sed otiosos solum: cæterum
nec

nec docent, nec mouent, nec persuadent. VIL L.
Vt egregiè stultus est Erasmus, aut eximius calumnia
tor. Eandem esse debere scribit diligentiam & cautio
nem artis dissimulandæ in oratione, & imitationis te
gendæ, cum aliquem æmulamur. Artis caput est in
causis, artem ipsam dissimulare, ne insidias sibi strui
existiment iudices, si ulla artis significationem præ
beamus. Imitationis summa laus est & commenda
tio, tanquam penicillo exprimere, cuius imitatione
oblecteris. Ac si hinc laudari cupimus, quòd Cicero
nem imitemur, quis nos laude optata illustret, nisi il
lum à nobis referri & exprimi perspiciat? quis te
Apuleio minus quàm Ciceroni, aut alij probato scri
ptori deditum iudicari, nisi Ciceroni, quàm Apuleio
similior uidearis? At qui Ciceroni uacant, nihil lau
dis assequuntur, centones tantum scribunt, delectant
otiosos duntaxat, cæterum nec docent, nec mouent,
nec suadent. Indignor, More, quam prius ridebam,
Erasmi importunitatē. Quem uult, plus puer aut ins
fans senex, nobis ad imitandū proponi? cui uult nos
studere? an nullus præcipuè sequēdus? an per omnes
generatim uolitandum & uagandum? Quis hoc tam
pernitiosum consilium, nisi insipiens dabit? quis, nisi
demens, exequetur? quis, nisi plane hebes, alij quàm
Ciceroni hæreat? quis alium, quàm Ciceronem imi
tetur? ornamentis omnibus longè lateq; splenden
tem, quibus alij uix interluceant, qui tanta nos elo
quentia breui ditat, & cumulat? M O R. Rectè loque

ris, si facundiam ostentationi paramus, non usui. Verum plurimum interest inter histrionem & oratorem. Illi delectasse satis est, hic etiam prodesse studet, si modo uir bonus est: quod si non est, nec oratoris nomen tueri poterit. Iam demonstrauius, opinor, in Cicerone quædam esse uitanda, quædam in eo desiderari, quædam sic adesse, ut in his, ab alijs hac parte felicioribus superetur. sed donemus nullum esse uirtutum aut ornamentorum genus, in quo non sit ceteris uel par, uel superior: certe in alijs, alia magis eminent, ob raritatem, quæ in M. Tullio ornamentorum densitate uelut obscurantur: perinde quasi si certas stellas notare uelis, facilius id non facies, si rarè luceant, quàm si tota cœli pars pariter insignibus obsita sit. Itidem si uestem conspicias totam gemmis obiectam, minus te capient singulæ. VILL. Balbutit, ut antea Erasmus, nugatorijs oblectatur, & suam garrendi cupiditatem nullo loco continet. Recte, inquit, in Ciceronis imitatione ponitur à nobis opera, si facundiam ostentationi paramus, non usui. Huc subinde reuoluitur, his nos uocibus enecat. Ergo quæ ex Cicerone eloquentia discitur, ostentationi paratur: quæ ex reliquis scriptoribus colligitur, ad utilitatem quaeritur. Non nos oratores efficit Ciceronis imitatio, histriones ut uideamur, facit. Ciceroniana facundia ornati, oblectare possumus, nihil cuiquam profusimus. Vbi illa, Erasme, eloquentia? à quo discitur? à quo comparatur? qua oratoris nomen assequimur, histrio

histrionis famam fugimus? qua prodesse possumus, non solum oblectamus? tam fructuosæ eloquentiæ fontes digito ostende. Magno mortales beneficio tibi deuincies, magnis nos meritis tibi astringes atque obligabis: quam uoles mercedem, pro hoc officio despolce, offeretur, proponetur, dabitur. Senem si pretio inuitemus, medius ex hypocausto fortasse existet, *Risu plena in Erasmus.* & pudoris immemor, his nos uocibus, unde illam eloquentiam hauriamus, admonebit. Mea in Catonem scholia perlegite, mea in Laurentium Vallam epitomata perdiscite, meam de puero Iesu concionem expendite, Querimoniam pacis, quam ætate florens, & in medio studiorum meorum, cursu, conscripsi, examine atque ponderate. Vobis illa, illa diuina scripta, uobis illa, non frigida Ciceronis opera, eloquentiæ facultatem suggerent, qua oratorum famam, non histrionum nomen consequamini, qua omnibus sitis utiles. Quid aliud ista adhortatione suaderet, quàm suo dialogo nobis suadere nititur? nempe ut Ciceronem abijciamus, & suas nugas sequamur? Demonstrat, ut opinatur, in Cicerone quædam esse uitanda, quædam in eo desiderari, quædam sic adesse, ut in his, ab alijs hac parte felicioribus superetur. Quid demonstrat calumniator? in potestatem esse, pro in potestate esse: periodum uerbo claudicantem. Versum asperiores. Minutulis his maculis, & liberiorum incuria aspersis deformatus Cicero, ne lectione quidem nostra dignus est, imitatione prorsus indig-

gnus. Exactum hoc istud est Erasmi iudicium, hæc ea est Erasmi de Cicerone sententia, hoc ipsum est Erasmi de Ciceronis imitatione consilium. Quousque senem in hunc modum & garrientem & delirantem sustinebimus? Quousque istam de eloquentiæ principe ita conuitiöse iudicandi audaciam probabimus? Quousque nobis imperabimus? quin suum quisque stomachum in eum erumpat, quin suos quisque aculeos excutiat? quin eū stilo cōfodiat? Hoc mihi ignoscas, More, grauius si commouear, aut ardentius quicquam loquar. Bilem mihi concitat, non intemperantia, aut ingenij leuitas, sed insolētiæ Erasmi magnitudo, qui tanta impudētia & insania Ciceronē uexat, qui illius existimationē tāto furore atterit. Sed hoc facundiores ulciscantur: ego obtrectatoris maledicta persequor. Donat (perinde quasi id obscurū sit, aut dubium cuiquam) nullum esse uirtutum aut ornamentorum genus, in quo non sit cæteris uel par, uel superior Cicero: certē in alijs alia magis eminent ob rarietatem, quæ in illo, densitate ornamentorum obscurantur. Ornamentorum omnium densitas est in Tulio, at ita aptè & uariè disposita, ut aliud alijs lumen sit, & ad splendorem adiumentum, non sibi proxima obscuret. Tum in tanta uelut smaragdorum densitate, cū nullus sit uilis aut abiectus, an non maioris felicitatis est, & minoris præterea negotij, quoquo te uertas, quicquid libet, pulchrum & splendidum capere atque auferre posse, quàm in alio scriptore istiusmodi
ornamen

ornamentorum inope, die toto exerceri, & uix unum tandem aliquem smaragdum colligere. Aliud ita calumniatur obrectator. Si certas stellas notare uelis, facilius id facies, si rare luceant, quàm si tota cœli pars pariter insignibus obsita sit. Non stellarum raritas facit, ut quas uelis, facilius notare possis, nec earundem frequentia ingens uè numerus impedit, quin aliam ab alia facile distinguas, si qua cœli parte, aut ad primam uigiliam, aut ad conticinium & noctem intempestam, aut ad matutinū crepusculum stellæ uoluantur, teneas, aut si qua hora uel oriantur, uel præcipitent, intelligas. Iouem, Saturnum, Martem, Venere, uel undiq; cœlo ardenti & micanti notes, si Iouis sedem, uel Saturni, Martis, Venerisq; locum animo bene dimensum habeas. Itidem in tanto ornamentorum omnium splendore, quibus fulget Cicero, facile tropum à tropo secernas, si schematum locos sedesq; noueris. Non nos ille similitum satietate defatigat, sed diuersorum uarietate recreat: ingenerat maiorem inspiciendi cupiditatem, fitq; ut quemadmodum uisco obliti si in plumis uoluentur, toti plumis cooperti exurgant, sic nobis in Ciceronianorum ornamentorum copia cumuloq; uolutatis, ornamenta ipsa uelut inuiscata hæreant, totiq; ornamentis colluceamus. Rogo te, More, ueritatem nimia altercatione amittamus. Eximiam orationum aut epistolarum formam si quis nosse uel assequi desideret, ad quem se ille, nisi ad Ciceronem, conferet; quem, nisi Cicero

t nem,

nem, legat: quem, nisi Ciceronē, imitetur: An, quod
quæret, uel Varro, uel Sallustiū, uel Cæsar, uel Ti-
tus Liuius, uel Cornelius Tacitus, uel Plinius, uel
Vegetius, uel Vitruuius, uel Columella, uel Quinti-
lianus sufficiet: An hi orationes reliquere, in quibus
artis dicendi lumina conspicias: an epistolas scripse-
re, in quibus tantam stili felicitatem, facilitatem, pu-
ritatem, iucunditatemq̃, quanta in Cicerone est, elu-
cere uideas: M O R. Sit ita, & colluceant ornamentis
toti, qui in Ciceronis lectione uolutātur. Feremus ne
tamen perpetuam uocis contentionem: feremus io-
corum intemperantiā: feremus indecoram parumq̃
uirilem in initio dicendi trepidationem: Feremus
mentum læua demulceri: & si qua sunt alia, in quib-
us M. Tullius uel sibi, uel alijs displicuit: Feremus
quidem forte, modò, qui Ciceronis uitia expriment,
simul illa exprimant, quibus ista uel texit, uel pensa-
uit, V I L L. Non necesse est, qui Ciceronem totum
exprimere laborat, Ciceronis ut uitia exprimat. Nec
ea uitia in Cicerone fuerunt, quæ uitia interpretaris.
Decuit Ciceronem uocis contentio: Decuit in initio
dicendi, trepidatio. Decuit mentum læua mulcere:
quæ in Cicerone nemo ante Erasmum, ut uitiosa no-
tauit. Indicat uocis contentio, eodem oratorem stu-
dio affectum, quo iudices inflammare contendit: ar-
gumento est oratorem non absq̃ animi motu loqui.
Aperit trepidatio mentis simplicitatem, & beneuolen-
tiam oratori conciliat, eosq̃ pudoris opinione nobis
adiung

adiungit, quos abalienare solet, audaciæ animicq; ef-
 frenati significatio. Ciceroni pulchrum fuit, mentum
 læua mulcere, ut suum cuiq; decorum gestum des-
 centemq; natura tribuit. Hæc tamen exprimere non
 conabimur, & Ciceronem totum uel exprimemus,
 uel æquabimus. Aequari enim quin possit, uel quin
 iam æquatus à multis esset, non dubito, si remansis-
 set antiqua illa eloquentiæ propagatio, causarum in
 senatu dicendarum consuetudo atque facultas. Si no-
 stro hoc tempore, natis tot præclaris & felicibus, nuls-
 lacq; re antiquorum ætati cedentibus ingenijs, ea esset
 ad eloquentiæ studium inuitatio, quæ apud antiquos
 fuit: si ij essent propositi & decreti eloquentiæ hono-
 res, quibus olim & Athenis & Romæ floruit. Exercis-
 tatione crescunt, & adulescunt omnia, qua si in altio-
 rem gradum extulit eloquentiam Tullius, an illam
 iam labantem & inclinantem aut sustentare, aut al-
 tius extollere nequeamus? Sed quò hac ætate *In mores et tem-*
 progrediatur quis eloquentiæ studio incendatur? *pore nostra,*
 quis se eloquentiæ dedat? Quam non risui solum
 haberi uideas, sed quam tibi fraudi sæpe esse,
 qua inuidiam tibi & uitæ periculum creari sentias.
 Qua instructos, non laudibus, ut antiqui efferunt,
 non obseruant, non suspiciunt, non admirantur, aut
 diuites, aut nobiles, aut sacerdotijs distenti quidam
 uentres, popinionesq; natigulæ atque abdomini.
 Qua ornatos uulgus conuittioso, ut arbitratur, no-
 mine grammaticos appellat, & cocis agafonibusq;
 t 2 uilior

uiliores atque abiectiores ducit, Quæ per deum immortalẽ in tanta contemptione efflorescant studia; quæ artes certatim colantur; quæ ingeniorum inuitatio; ut antiquos & imitari, & æquare adnitantur; quis tandem honos aut quæ merces proposita, cuius expectatione, si quando labore frangamur, ad priores

Non magis effecta est modo natura, quàm quondam fuit in frædis ingenijs.

rem, alacritatem redeamus? Non nunc magis est, quàm quondam, effecta natura, nec minus acutis & planè diuinis ingenijs ferendis potens. Sed qui nascuntur, mente & ingenio felices, alij spe honorum exclusi studia negligunt, alij contemptu retardati, in quo literas, & eloquentiam falsim esse uident, literas eloquentiamq; auersantur: alij periculo territi, quod eloquentiæ & literarum humaniorum nomine conflatur, à literis, ut à ueneno abstinent, nec rem inuidia scatentem, & periculis redundantem sequuntur. Quibus tamen ipsa uirtus merces est, quiq; suspi-

Suspiciosa & turbulenta nostra tempora.

ciosa ista & turbulenta tempora non diuturna fore norunt, tranquillioraq; & literarum studijs æquiora atq; amiciora appropinquare coniectura augurantur, literas cupidius amplexantur, & conatibus non diffidunt, specq; sunt optima, omnes antiquorum uirtutes & exprimi, & æquari posse: Itaque quod liberior & longius à proposita disputatione digrediens, intermisi, hoc constanter pugno, paulo supra nostram ætatem fuisse, qui omnia Ciceronis lineamenta, quoad res suscepta & argumentum permisit, eleganter exprelsit, & æquauit, neque multos nostra

fra ætate deesse, qui, nisi ingenij felicitate abutantur, & operam studiumq; suum in uoluptatibus, & rebus uirtuti aduersis collocent, Cicronem propius imitaturi, & non infeliciter expressuri uel æquaturi sint.

MOR. Sed ò Musæ, quantulam Ciceronis portionem nobis referunt isti Ciceronis simij, qui uoculis, formulis, tropis, & clausulis aliquot, hinc atque hinc corrogatis summam modò cutem, uel bracteam potius Ciceronis nobis exhibent. Sic olim Atticum dicendi genus quidam æmulabatur, cum interim essent aridi, ieiuni, frigidiq;, semper, ut ait ille, manum intra pallium habentes, nec subtilitatem, nec sanitatem, nec gratiam Atticorum ulla ex parte possent assequi.

Optimo iure Quintilianus irridet quosdã, qui se germanos Ciceronis imitatores haberi uolebãt, quòd aliquoties his uocibus absoluerent clausulã, esse uideat, quòd ea semel atque iterum Ciceroni forsitan excidit: si periodum longiore ambitu circunduxissent, quòd in initijs præsertim nonnunquam fecit ille. Nec hodie parum multi sunt istorũ similes, qui sese ualde mirantur, & alteros, ut aiunt, Cicrones esse credunt, si prima uox orationis sit, quãquam, aut, etsi, aut animaduerti, aut, cum, aut, si, quòd officiorũ libros sic ordiatur M. Tullius: Quanquam te M. Fili, periodum uix nono uersu absoluēs. Et pro lege Manilia: Quãquam mihi semper. Laudatissimam illam pro Milone orationem sic auspicatus est: Et si uereor iudices. Rursum Philippicarum duodecimam: Etsi minime

decere uidetur. Itē pro C. Rabirio: Et si Quirites. Et in epistolis aliquod simile est initiū. Et haud scio, an isti li-
bros ad Herennium ob id tribuant Ciceroni, quòd
ab etsi capiant exordium: Porro de finibus bono-
rum librum quintum sic incipit: Cū audissem An-
tiochum Brute, Tusculanas quæstiones sic auspicas-
tur: Cū defensionum laboribus. Et eiusdem operis
librum quartum: Cū multis in locis nostrorum
hominum ingenia. Pro L. Flacco: Cū in maximis
periculis. Item pro domo sua ad pontifices, Cū mul-
ta diuinitus. Iterum pro Plantio: Cum propter egres-
siam. Ad hæc librum de natura deorum primum:
Cū multæ res in philosophia. Et Scipionis somniū:
Cū multæ res in Africa. Pro Rabirio dicens, sic or-
ditur: Animaduerti iudices. Rursus ad Brutum de pa-
radoxo Stoicorum: Animaduerti Brute. Pro L. Cor-
nelio Balbo sic orditur: Si autoritas patronorum. Pro
P. Sestio: Si quis antea iudices. Pro Cecinna: Si quan-
tum in agro. Pro Archia poëta: Si quid est in me inge-
nij. In Vatinius testem: Si tua tantummodo Vatis-
ni. Ad equites iturus in exilium: Si quando inimico-
rum. Ad senatum post reditum: Si Patres Cōscripti,
pro uestris. Pro M. Cælio: Si quis iudices. De pro-
uincijs consularibus: Si quis uestrum P. C. Quid au-
tem magis ridiculū, ac Ciceroni dissimilius esse pos-
sit, quàm nihil habere Ciceronis præter tales uoculas
in orationis exordio: de quibus si quis percōtetur Ci-
cронem quur ab ijs uocibus sit orsus, respondebit,
opinor

opinor, quod in insulis fortunatis Luciano respondit
Homerus, roganti, cur primam Iliadis dictionem uo-
luit esse *μῆνιν*, nam hæc quæstio multis seculis torse-
rat grammaticos, illud, inquit, tum forte uenit in men-
tem. Consimilis impudentiæ sunt, qui sibi plusquam
Ciceroniani uidentur, quod aliquoties infulciant etiã
atque etiam, pro uehemẽter, & maiorem in modum,
pro ualde, identidem, pro subinde, cum & tum, quo-
ties inæqualis momentĩ sunt, quæ connectimus: cum
& tum, quoties æqualis: tuorum in me meritorum.
Quid quæris, pro in summa, aut breuiter. Non solum
peto, uerum etiam oro contendoq;. Antehac dilexisse
tantum, nunc etiam amare mihi uideor. Valetudinẽ
tuam cura, & me, ut facis, ama. Non ille quidem uir
malus, sed parum diligẽs: qua locutionis formula sic
M. Tullius uidetur delectatus, ut in eadẽ pagina cre-
bro repetitum inuenias. Simile est, cum per illud, pro
nomen indicat non quod præcessit, sed quod mox
sequitur. Et in epistolis semel atque iterum dixit, co-
gitabam in Tusculanum. Itaque Ciceronianus sibi
uidetur, qui subinde dixerit, Romam cogitabam, pro
eo, quod erat, in animo habebam, siue statuerã prosi-
cisci Romam. M. Tullius anni numerum non adscri-
bit epistolis, sed tantum mensis diem: & Ciceronias
nus non erit, si quis à Christi natali annum adscripse-
rit, quod sæpe necessarium est, semper utile? Eadem
non ferunt si quis honoris gratia nomẽ eius ad quem
scribat, suo præferat, quod genus sit: Carolo Cæsari

Codrus Vrceus salutem. Par flagitium existimant, si quid dignitatis, aut laudis addas proprio nomini, uelut, inelyto Pannoniæ Boæmiæq; regi Ferdinando Velius s. D. Nec Plinio iuniori possunt ignoscere, quod suum appellat, si quando scribit amico, cum eius facti nullum apud Ciceronem extet exemplum. Vt parum Tullianus rejicitur, qui, quod à principum officijs mutuati docti quidam nuper usurpare cœperunt, summam eius epistolæ, cui respondere parat, in initio proponat, quod id nusquam factum sit à M. Tullio. Noui quosdam notatos ut soloccos, quod in salutatione pro s. D. posuerint s. P. D. quod negarent hoc apud Ciceronem inueniri. Nonnulli uero putant & illud Tullianum esse, salutationem non in fronte, sed in tergo literarum ponere, quod his uerbis admonetur lator, quas quibus deberet reddere, non sine salutationis officio. Quantula res facit, ut ab hac palma decidamus? Multo uero minus erit Ciceronianus, qui salutarit hac formula: Hilarius Bertulphus, Leuino Panagatho totius hominis salutem, aut salutem perpetuam. Verum hic quoque longius aberit à Ciceroniano, qui sic orsus fuerit epistolam: Gratia & pax & misericordia à Deo patre, & domino Iesu Christo. Item qui pro cura ut recte ualeas, ita claudat epistolam: Sospitet te dominus Iesus, aut incolumem te seruet dominus totius salutis autor. Quos cachinnos hîc tollent Ciceroniani? Quid autem admissum est piaculi? An non
uerba

uerba Latina sunt: munda, sonantia, atq; etiam splendida. Iam si sensum introspicias, quanto plus est hîc, quàm in, salutem dicit, & bene uale. Quid uulgarius, quàm dicere salutem? Præstat hoc officium herus seruo, inimicus inimico. Quis autē crederet esse Latinum, Dicit illi salutem, & iubet illū saluere, nisi nobis sermonē hunc ueterum consuetudo commendaret. Hoc in aditu. In digressu, uale dicimus, & his quibus malè precamur. Quanto melior emphasis in formulis Christianorum, si modo uerè & ex animo simus Christiani. Gratia declarat gratuitam condonationem admissorum, pax quietem & gaudium conscientiae, quòd deum pro irato habemus propitium: misericordia dotes uarias & corporis & animi, quibus suos locupletat, arcani spiritus benignitas, &, ut magis speremus nobis hæc fore perpetua, additur, à deo patre & domino nostro Iesu Christo. Cum patrem audis, ponis seruilem trepidationem, ascitus in affectum filij: cum dominum audis, confirmaris aduersus uires satanæ. Non deseret ille, quod tam care redemit, & unus potentior est uniuersis satanæ cohortibus. Quid suauius his uerbis ei, qui iam hæc apud se sentit: quid utilius hac admonitione ei, qui nondum in hunc affectum transijt. Verbis itaque non uincimur, imò uincimus potius: sententia longe superamus. Restat illud decorū & aptum, quod ubique cumprimis spectandum est. At hæc quanto magis conueniunt homini Christiano, quàm illa, salu-

u tem dic

tem dicit, & cura ut ualeas. Tantum faceſſat illa puerilis imaginatio, nō ſic locutus eſt Cicero. Quid miri, ſi non locutus eſt, cum rem ignoraret. Quot milia ſunt rerum, de quibus nobis frequenter dicendum eſt, de quibus M. Tullius ne ſomniauit quidem. At ſi uiueret, nobiſcum eadem loqueretur. An non igitur frigidi uidentur imitatores, qui tantum rerum obſeruatiunculis referunt M. Tullium, ac diſſimulatis tot diuini uiri uirtutibus, numeris, tropis, formulis, ac dictiunculis, ea imitantur, quæ M. Tullio uel placuerunt, uel crebrius exciderunt. VLL. Iſta Eraſmi loquacitate nihil nobis opus erat. Eſt id quidem non ignotum, qui uulgaria illa & uſitata aut in orationibus, aut in epiſtolis principia ſtudio maiore referunt, partem Ciceronis referre nullam, ex Ciceronianorum coetu ab omnibus exhibitari atq; explodi. Quis tamē, ut riſum Bataui ſcurrę uitet, ab illis uocibus religioſē abſtineat. Quis, ſi eæ nobis, ut Ciceroni, inter ſcribendum excidūt, affectatē nos Ciceronem in re leui imitari, in grauioribus à Cicerone remotos, inſolenter, ut Eraſmus, clamet. Quis Latinē loqui uolēs, his uocibus uel coactus non utatur. Venuſtus eſt non immodicus earum uſus. At uerò non hac ſolum affectatione (inquit) ridiculi ſunt Ciceroniani: uitant nimia religione & anxietate receptas à doctis multas ſcribendi formas. Flagitium exiſtimant, ſi quid dignitatis aut laudis addas proprio nomini. Dic, quæſo, More, utrum uitioſius & reprehentione dignius putas, aut

Salutatio Cicero-
niana.Salutatio Erasa-
mica.

tas, aut sic Tullianè loqui, Christophorus Longo-
lius, Francisco Valesio regi Gallia Sal. Aut sic Eras-
micè: Inclyto, uirtutibus omnibus illustrissimo, ul-
teriorisq; inñinitis clarissimo, atq; omnium potentissi-
mo Ferdinando Boccomi regi, seruus humilimus, &
uermiculus terræ, pauperculus monachus Erasmus,
reiecto post tergum cucullo reuerenter & cum omni
humilitate salutem plurimam dicit. In altero dignam
uiro literato grauitatē & animi celsitudinē recognos-
cis: in altero hominis assentatoris, blandientis, mu-
nera inhiantis, & istis titulis potentes inescare uolen-
tis ingenium perspicitur. Sic rem meretrices faciunt;
sic nos laudibus falsis cumulant, sic bene nummatis
insidiantur. Assentatorium illud salutandi genus, ut
animo assentatorio est, probat Batautis assentator, &
antiquo salutem dicēdi modo præfert. Ciceronianos
ridet, quod grauius loqui malint, quàm assentato-
riè. At quid illius garrulitatē imitamur? Assentetur,
aduletur, titulorum splendore & cumulo, potētium
dona eblandiatur: ~~Veneri deditis, penem se sequipeda-~~
~~lem:~~ gulæ & uentri indulgentibus, decempedalē uen-
tris uoraginem: bibacibus & uinosis, gruinum col-
lum: bonorum decoctoribus, montes aureos: senibus
uitē cupidis, Nestoris æuū: regnum ambientibus,
Romanam potentiā: belli ducibus, Cæsaris, Pompei,
Annibalisq; uictorias: eloquentiæ amantibus, non
Ciceronis, quam negligit, sed suam, qua se miratur, fa-
cundiam optet, uotis à deo impetret, ad suarum epis-

u : stolar

stolarum caput comprecetur. Istas Erasmi ineptias facile patientur, quibus nota est Erasmi assentatio: At suo ille ingenio dum per nos nulla reprehensione utitur, sinat quoque, qui antiquos breuitati studentes, & ab assentatione fugientes imitantur, in epistolæ principio, assentatorios titulos, officiorum nomina, & superuacanea omnia uitioque proxima aspernari & prætermittere. Salutem plurimam dicat, & nos salutem tantum dicentes non rideat. Rideat tamen, si libet, qui sæpius usurpatas à Cicero ne locutiones, sæpius cum affectatione usurpant, & nihil unquam mutant, nihil transferunt, eos liberè cum doctis omnibus rideat, eos enim rident omnes, atque ante Erasmus nemo non iure risit. Sed quid ad risum exhortamur, risui natum & scurrilitatē? Sua se sponte ad suam garrulitatem innouat, & quæ

*Theologia materia
est segetis lo-
quacitatis Erasmi.*

illi pro loquacitatis materia & segete est, ex theologia deblaterandi argumentum ducit, eo nos semper cuniculo, ut forex, eludit. Aberit (inquit ridens) à Ciceroniano, qui sic orsus fuerit epistolam. Gratia, pax, & misericordia à deo patre, & domino Iesu Christo. Item qui pro, cura ut recte ualeas, ita claudat epistolam. Sosпитet te dominus Iesus: aut incolumem te seruet deus totius salutis autor. Christiana hæc esse nemo inficiatur, sed ut usu trita sint, opus est illa Erasmi charitas, qua flagrat, qua ardet, qua æstuat, qua ebullit: qua constans est & modestus, qua neminem offendit, qua neminem

laceſs

Ironia.

laccelsit, qua omnes amat & colit. Ea nos uelut Erasmus incēdet, ut nihil præter Christum spirantia scriptis nostris asligamus, ut nullis nisi Christianis uerbis uel nugemur, uel rixemur, uel conuiitemur. In arena, (quod aiunt) sua Erasmus uersatur, in theatro suo est, cum de theologia sermonē alicunde aucupari atque arripere potest: tum tonat, tum fulminat, tum nihil præter Christum & cogitat & loquitur, tum uel Christum ipsum rebus omnibus superare uidetur: tū nos suis ad Christianam charitatem, ad Christiana uerba, ad Christianū cultum adhortationibus, tum nos interlucrabili balbutie obtundit: tum excurrit longius, egreditur, euagatur, aberrat: tum omnia sermonis ornamenta, atque rhetoricæ præcepta ad Christianismum reuocat, ut magnam animi uerè Christiani significationem præbeat. Christiana scribere possumus, nec eam obrem ad barbariem, aut minus comptas loquendi formas deflectendum est. An Christiana mente uel charitate (ut theologicè cum Erasmo loquar) salutem amico dicere non possumus, quemadmodum hoc sermone uti? Gratia pax & misericordia à Deo. Quis pluris hæc faciat Christianismi nostri uerba Christiano animo carentia, quàm Romanas uoces Christiano animo scriptas? Hic se totum fundit Erasmus, & garrere gestiens, eam nobis interpretationem admurmurat. Quantò melior emphasis in formulis Christianorum? Gratia declarat gratuitam cōdonationem admissorum: pax, quietem & gaudium

conscientiæ, quòd Deum pro irato habemus proprium: Misericordia dotes uarias & corporis & animi, quibus suos locupletat arcani spiritus benignitas, quoq; magis speremus nobis hæc fore perpetua, additur, à Deo patre & domino Iesu Christo. An criminum & scelerum nostrorum gratiam nobis à Deo fieri, an Deum nobis reconciliatum nesciremus, nisi huiusce rei memoriam subinde nobis excitaret, præscripta ab Erasmo salutandi formula? An aliud crepant noui instrumenti libri? an nos hæc parum docuere antiqui religionis nostræ interpretes? Docuere quidem satis, nec stomacho aut ira plena epistola, ob Erasmicum istud salutandi genus, aliud nos animaduertere, aut animo agitare sinit, quàm quod scriptum legimus. At semel cucullo tectus Erasmus, cucullatis Monachis propria salutatione utitur, & ut omnes similes habeat, utendum admonet. Contractum cucullo ingenium, abiecto cucullo non exuit. Vt duplex est tere cucullus, duplici quoq; ille animo est. Christianè salutat sæpe, & aliena à Christiani modestia lenitateq; scribit. Pacem statim ad literarum caput loquitur, mox sui oblitus, aut ad suam se potius naturam reuocans, conuitijs oppugnat & conuellit, furit, debacchatur. Iam suas Christianas salutationes iactet, iam Cicronianos alijs utentes rideat, Erasmi ob fraudulentam suam Christiani animi ostentationem tam parum laudo, quàm certum omnibus est, M. Tullium barbaras istas uoces fuisse uitaturum, quibus

Contractum cucullo ingenium, abiecto cucullo Erasmus non exuit.

quibus, si uiueret, eum usurum asseris. MOR. Diem totum tua in Erasmus indignatione consumes, nisi te ad alia retraham, neque cætera audies, si, quæ pluribus infirmari forte possint, pluribus coneris infirmare. Colloquimur, non causam in foro dicimus, ubi amplificationum loci conueniunt, sermoni familiari non apti. Ad reliqua igitur propero. VILL. Nihil impedio. MOR. Hoc tuorum imitatorum genus ipsi Ciceroni inuisum esse debet, qui per tales imitatores non aliter infamatur, quàm bonus præceptor per malos discipulos, probus uir per improbos liberos, formosa mulier per imperitum pictorem. Perspexit hoc Quintilianus, dum queritur, Senecam infamari quorundam immodico studio, qui uitia duntaxat imitabantur: itaque fiebat, ut qui Senecam non legerant, ex illorum scriptis, Senecæ facundiam æstimerent. Quemadmodum autem nulli magis se iactant uenditantq; de præceptorum ac maiorum nomine, quàm indocti discipuli, & improbi filij, aliunde captantes uirtutis opinionem, cum suis bonis eam conciliare non queant: ita nulli superbiunt insolentius nomine Ciceronis, quàm qui Ciceronis dissimilimi. VILL. Notior est & illustrior Ciceronis eloquentiæ fama, quàm quæ labe aliqua aut nubecula inobscurari possit. Boni præceptoris nomen per malos discipulos non contaminatur, neque probum uirum ob improbos liberos damnamus aut aspernamur. Ciceronem qui legerit, & illum ob facundiæ

præstantiam suspicit, si quid postea legat minus elegantè à Ciceronis imitatore scriptum, non idcirco Ciceronem despiciet minus'ue mirabitur: cuius laudem nostrum neque studium, neque imitatio aut auget, aut minuit. Stat illius integra semper existimatio, sed ut illum exprimimus, ita docti & elegantis imitatoris laus nobis aut adesse aut abesse solet. Probatur in ea exercitatione nostri uel ingenij felicitas, uel stupiditas & inertia ab alijs irridetur. M O R. Verum, ut, quod à nobis institutum est, peragamus, fac esse qui totum Ciceronem in uerbis, figuris, & numeris exprimat, quod ipsum tamē an multi possint, nescio, quantum is habebit Ciceronis? Sit hoc in imitando Cicerone, quod Zeussis fuit in effingēdo corpore muliebri. Expressit lineamenta, colorem, ætatem, & ut summū artificij præstiterit, affectus non nihil, hoc est, dolentis, gaudentis, irati, metuentis, attentis, aut dormitantis. Hæc qui præstiterit, non'ne, quicquid ars potest, absoluit? Quantum licuit, uiuam hominis speciem in mutum simulacrum transtulit. Nec aliud exigi potest à pictore. Agnoscis formam eius, quæ depicta est, uides ætatem & affectus: fortassis & ualitudinem adde, quod à quibusdam effectum legimus, agnoscit indolem & mores & uitæ spatium physionomon. Sed immane quantum illic abest hominis? Quod ex summa cute conijci potest, expressum est. Cæterum cum homo constet ex anima & corpore, quantum illic est unius partis, eiusque deterioris?

Vbi

Vbi cerebrum, ubi caro, ubi uænx, ubi nerui & ossa, ubi intestina, ubi sanguis, spiritus & phlegma, ubi uita, ubi motus, ubi sensus, ubi uox & sermo: denique ubi, quæ sunt hominis propria, mens, ingenium, memoria, consilium? Quemadmodum, quæ sunt hominis præcipua, pictori sunt inimitabilia: ita summas oratoris uirtutes nulla assequitur affectatio, sed à nobis ipsis sumamus oportet. Verum à pictore nihil aliud exigitur, si præstitit quod unum ars proficitur: à nobis, si totum Ciceronem exprimere uolumus, multo aliud requiritur. Si nostrum simulacrum, quo M. Tullium effingimus, careat uita, actu, affectu, neruis, & ossibus, quid erit imitatione nostra frigidius? Sed multo magis erit ridiculum, si tuberibus, næuis, cicatricibus, aliâ ue membri deformitate demum efficiamus, ut lector agnoscat nos legisse Ciceronem. Finge nos feliciter expressisse in Cicerone, quicquid hominis exprimere potest absolutus pictor, ubi perfectus illud Ciceronis, ubi rerum tam copiosa, tam felix inuentio, ubi dispositionis ratio, ubi propositio- num excogitatio, ubi consilium in tractandis argumentis, ubi uis in mouendis affectibus, ubi iucunditas in delectando, ubi tam felix ac prompta memoria, ubi tantarum rerum cognitio, denique ubi mens illa spirans etiamnum in scriptis, ubi genius ille peculiaris rem & arcanam adferens energiam? Fit sæpius ut æmulatione nostra Ciceronis dissimilimi reddamur. Nihil periculosius est, quàm affectare Ciceronis im-

ginem. Male celsit gigantibus affectasse sedem Iouis. Nonnullis exitium attulit euocasse deos. Periculosa plenum opus alex est, diuinam illam & humana natura superiorem exprimere linguam. Cicero nasci fortassis potest aliquis, fieri nemo. V I L L. Mirarer, nisi Erasmus in re nota & peruulgata multus & insolens esse uellet. Perspicuum est, atque ante oculos positum, lineamenta tantum, & colorem simulacro à pictore imprimi posse, carnem, uenas, neruos, ossa, sanguinem, uitam, motum non injci. Quem hæc, tacente Erasmo, præteribāt? Igitur ut, quæ sunt hominis præcipua, pictori sunt inimitabilia, ita summas oratoris uirtutes nulla assequitur affectatio, sed à nobis ipsis sumamus oportet. Quàndiu his nos uerborum inuolucris Erasmus implicabit? quàndiu his nos exemplis impudenter cruciabit? An quisquam id arbitrat, simulacrum, quo Ciceronem referre contendimus, inuentione, memoria, pronuntiatione constare? Hæc, uitam, actum, affectum, neruos, & ossa simul lacri Ciceroniani Erasmus uocat, quæ uix in simulacro præstamus: sic imitatione nostra. nihil est frigidius, Ciceronem non exprimimus. Quis etiam (inquit) illud Ciceronis pectus, quis rerum tam copiosam, tam felicem inuentionem, quis dispositionis rationem, quis propositionis excogitationem, quis consilium in tractandis argumentis, quis in mouendis affectibus, quis tantarum rerum cognitionem referat? Ad insullas istas Erasmi uoces nemo risum teneat, aut indigna

indignatione non ferueat. Sed neutrum uiro graui conuenit. Quamquam improbitate magis, quàm inestis peccat, grauitatem tamen retinebimus, constanter cedemus, & à nobis ille ita urgebitur. Quid nos, ut summas Tullij in dicēdo uirtutes animaduertamus, & cognoscamus, aut incitat, aut perficit? Eam animaduertendi cupiditatem, & cognoscendi facultatem à natura proficisci non dubitas. Itaque an, quæ nos ad ea animaduertenda mouet, & ad cognoscenda iuuat, similia conantes deseret? An nobis cupiditatem iniecit, quam explere uel nolit, uel nequeat? An Tullio uni ad benè dicendum uiam patere uoluit, cæteris omnibus interclusit? Maneret modò forensis usus, honos eloquentiæ haberetur, esset oratoribus apud nos locus: causas dixissent antea multi, dicerentque nunc non pauci, in quibus non unum Ciceronem, sed sexcētos agnosceres, à quibus Ciceronem non solum exprimi, sed æquari, & superari forte diceres. Confiteor equidē artis oratoriæ, sicut rerum omniū, naturam esse principem, sed simul in illa maneo sententia, eandem rerum parentem, quæ nobis uirtutum omnium igniculos, & disciplinarum amorem ingenerat, Ciceronē in hoc peperisse atque procreasse, ut in eo omnia artis dicendi ornamenta & uirtutes dispicere possemus. Quare si ars tota dicendi, imago quædam est & similitudo in ingenijs omnium insita, quo potius oblectabimur, cui potius similes esse cupiemus, quàm ipsi illi, in quo ueram artis oratoriæ imaginem

contemplemur? Quem potius amplectemur, cui potius hærebimus, quàm illi, cuius lectio & imitatio, eà, quæ orta est iam in nobis & procreata, artis oratoriæ facultatem educet & confirmet? qui ea, quæ animis nostris affixa sunt, & à sensu tradita atque imposita artis dicendi studia, consuetudine & exercitatione, quò aspirant, deducat? qui nobis elegantem uerborum apparatus conferat? qui non in aures nostras dicendi præcepta, ut rhetores, infundat, sed qui, quatenus, & quomodo dici singula oporteat in animo nostro suis orationibus inscribat? Cui potius studebimus, quàm ei, in quo certa sunt & obuia, quæ imitari possis, omnia; in quo omnia patent, in quo sese ultro omnia ad imitationem offerunt, atque prostituunt? quo lecto nihil dediscendum, nihil emendandum, nihil corrigendum? Neque certe id uerendum est, quod Batauus tuus plerisque accidere scribit, ut tuberibus, næuis, cicatricibus, alia'ue membri deformitate Ciceronem referamus. Cui tam effrenata maledicendi libido grauitatem non excutiat? quem ad loquacitatem non impellat? Næuis tuberibusq; , cicatricibus, membrorum mutilatione deformē Ciceronē? Quæ corporis, id est scriptorū, uitia, si in eo uerferis, contrahas, quibus deformis, ut ille, fias? Ad hanc insani uocem, hæc mox alia furentis uerba accedunt. Vt male (inquit) celsit gigantibus affectasse sedem Iouis: ita periculosa plenum opus alex est, Ciceronis linguam exprimere, Libèter obtrectatorem aliquando

do euolutum integumentis dissimulationis suæ nudatumq; uideo. Euomuit tandē, quod illi stomachū premebat, inuidiæ suæ uirus. Quod cum adduxit, ut Dialogum suum Ciceronianum scriberet, ubi eximie generoseq; executus est, & Lōgoliū laudes, quantum licuit, obtriuit, ne uni tantum inuidisse uideretur, posterorum commodis & gloriæ insidias tendit, Ciceronis imitationem periculi & aleæ plenam clamat, damno aliquo, credo, ob Ciceronis lectionem affectus. Easdem dedit ob nimium Tullij studiū poenas, quas Hieronymus. Vapulauit acerrimè, uerbis, Dei iussu, cæsus est. Iniquè eam ob rem cæsum utrumq; dicerem, nisi diuinitus hoc factum uulgo iactitaretur. Etenim ne horam quidem in Ciceronis lectione ab utrouis positā constat. Nihil utroq; à Cicerone remotius, nihil longius obductū, nihil minus Ciceroni simile. Illis tamē nugis cupide nos in metū adduceret Erasmus, isto nos dolo libenter à Ciceronis imitatione deterreret; sed stultis forsitan uerba dabit, paulo prudentioribus ista calliditate non imponet. Diuinam Ciceronis eloquentiam, ut Erasmus, nobis dei non inuidet, illam unam ut colamus, præcipiūt & iubent, nec se quicquam præstantius dedisse hominibus fatentur. MOR. Finge nos & tibi & deorum consilio uel iussis assentiri atq; morem gerere, A' me tamen audies illud Horatianum,

—Breuis esse laboro,

Obscurus fio, sectantem læuia nerui

Ridicula Hieronymi pena ob Ciceronis lectionē.

Deficiunt, animiq; professus grandia turget.
Ita qui affectant atticismum, pro argutis ac uenustis
fiunt aridi: qui genus Rhodiense, diloluti: qui Asia-
ticum, timidi. Laudata est in Sallustio compositionis
breuitas, non ne si quis hanc superstitiose conetur
æmulari, periculum sit, ne concisus & abruptus eua-
dat. Prædicatus est in Demosthene uerborum & ar-
gumentorum modus, cui nihil possis detrahere. Ad
hanc laudem æmulandam si quis componat se an-
xiè, quo Demosthenicus esse uideatur, periculo uici-
nus est, ne minus dicat, quàm oportet. Applauditur
Isocratis, Socratis structuræ numerisq;. Huc qui ue-
hementer annitatur, in periculum ueniet, ne supersti-
tione compositionis sit molestus, & artificij iactatio-
ne fidem amittat. Senecæ laudata est copia. Huius in-
cautus ac sedulus æmulator, periclitatur, ne redun-
dans & immodicus euadat pro copioso. Bruti graui-
tatem si æmuleris anxie, fortassis tristis & asper eua-
des. Laudatur Crispi iucunditas. Huius æmulator ue-
niet in discrimen, ne pro iucundo fiat ineptus aut le-
uis. Noui qui cum mirabilem illam Ouidij facilitatē
conarētur exprimere, uersus effutirēt, & neruis & spi-
ritu carentes, Et ne singulos commemorando tibi
fiam molestus, dicam in genere quod restat. In qui-
busdam eminet argumenti subtilitas, hanc qui uehe-
menter affectat, periclitatur, ne uel frigidus, uel obscu-
rus sit. In alijs admiramur felicem artis neglectum.
Hoc qui cōtendit effingere, fortassis in uulgare dicen-
di uel

di uel potius garriendi genus incidet. In alio dilucet
 summa artis obseruatio. Id qui nitatur exprimere, in-
 cidet in scænicum quoddam dicendi genus. Atticæ
 frugalitatî proxima est exilitas: copioso uerborum
 fluxui, uicina est loquacitas. Ex his uero sunt quædā,
 quæ sic eminent in autoribus, ut pro uitij habenda
 sint, nisi iunctis uirtutibus pensarentur: quemadmo-
 dum in Seneca compositionis abruptum, & senten-
 tiarum immodicarum densitatem multæ uirtutes ex-
 cusant, ut præceptorum sanctitas, uerborum ac re-
 rum splendor, & iucunditas orationis. Nec Isocratis
 laudaretur cōpositio, nisi perspicuitas dictionis, & sen-
 tentiarū grauitas illi patrocinarētur. Quæ omnia huc
 pertinent, ut, cū in Cicerone tam multa sint huius-
 modi, periculosam scias Erasmo uideri illius supersti-
 tiosam & addictā æmulationē, quando uirtutes, quib-
 us ista uel commendauit, uel texit, æmulari non pos-
 sumus. Tam fluidum est illi dictionis genus, ut remis-
 sus ac solutus alicubi uideri queat: tam exuberans
 uerborum copia, ut redundans: tam artis obseruans,
 ut declamatori, quàm oratori propior, fidei iactura
 captans artificij gloriā: tam liber in insectando, ut
 maledicus haberi possit: tam effusus in iocos, ut Cas-
 toni consul risum mouerit: tam blandus alicubi, ut
 abiectus: tam compositus, ut, seuerioribus ingenij
 mollis ac parum uir dictus sit. Hæc ut fateamur in
 Cicerone uitia non esse, propter insignem illam na-
 turæ felicitatem, quam decent, quæ facit omnia: ut

*Declamatori, quā
 oratori propiorē
 Ciceronem uocat
 Erasmus.*

etiam uirtutes sint, sic tamen sint, ut ob uiciniam non careant specie uitiorum sub iniquo iudice, attamen ille reprehensionem eximjs ac plurimis uirtutibus pensauit, ut omnium iudicio calumniator impudens habeatur, qui conetur aliquid in huius oratione reprehendere. V I L L. Nullum haecenus Erasmus dedit maius aut expressius suæ uel loquacitati, uel obtrectationi, uel dissimulationi testimonium. Loquacitati indulget, qui rem neq; cuiquam dubiam, neque necessariam, uerbosius persequitur. Obtrectationis suspicionem infert, qui florentissima uirum gloria, & omni laude præstantem notis turpissimis labefactat. Dissimulationē aperte prodit suam, qui nefariē inflatum uulnus, leuiter postea absterget. Nimirum cuius nisi loquacis, fuit, Attico, Rhodiensi, Asiatico scribendi generi finitima uitia enumerare? Sallustij breuitatē iucunditatemq; predicare? in Demosthene argumentorum modum ostendere, omnia deniq; in omnibus scriptoribus examinare, ut nobis periculosam cum reliquorum, tum Ciceronis imitationem probaret, ut nos à Ciceronis studio reuocaret? Cuius porro nisi obtrectatoris, fuit, Ciceronem tam fluidum appellare, ut remissus ac solutus uideri queat: tam exuberantem, ut redundans: tam artis obseruantem, ut declamatori, quàm oratori propior: tam liberum in insectando, ut maledicus haberi possit: tam effusum in iocos, ut scurra: tam blandum, ut abiectus: tam compositum, ut mollis uideatur? An ista
ad

ad laudem, non obtreſtationem pertinent: an iſta ad ornandum, non detrahendum apta ſunt? Simul cum ~~Vitio~~ garrulus & loquax dicar, ſi, quæ à Cicerone antea propulſauī, eadem nunc in illum ab obtreſtatore collecta & exaggerata, pluribus amouere ſtudeam. Gaudebo potius, & ſumma lætitia efferar, duplex ſenſus ingenium perſpici, diſſimulationem prodi, iniquum animum patēre. Ciceronem ubi uitij obrutum probare adnixus eſt, ſic inuidiam occultat. Attamen (inquit) ille reprehensionem omnem exiis ac plurimis uirtutibus penſauit. Quem igitur ſupra omnem reprehensionem eſſe putabamus, uitio non omni caret, caret autem: at uitij omnibus ſcatet: remiſſus eſt, & ſolutus, redundans, artis nimium obſeruans, Declamatori, quam oratori propior, maledicus, effuſus in iocos, abiectus, mollis, parum uir, exanguis. Colligit hæc Ciceronis uitia identidem ~~Vitio~~ ~~notat~~, hæc diligenter notat, hæc exponit, ut à ſcriptoris tam uitioſi lectione imitationeꝑ refugiamus. Sed quæ uitia ſunt, uel uitio proxima, diuinis textu uirtutibus. Eſt ne iam, qui ~~Vitio~~ uel diſſimulationem, uel inconstantiam animi, uel ſtultitiam ignoret? Contaminauit, quem poſtea ornat: lenit, quem offenderat: hos aſtus nobis occultos, hanc calliditatem nobis ignotam putat. Quibus redundat uitij Tullius, ea nos poſſe ſequi ſcribit, uirtutes inimitabiles dicit, nec ab exēplo præceptis ue peti poſſe affirmat. Colligit, nullius imitationem eſſe periculoſiorem, quàm

Ciceronis : quem si totum & unum tibi proposueris, non in hoc tantum, ut illum exprimas, uerumetiam uincas, non prætercurrendus erit, sed relinquendus magis. Alioqui si illius copiae uelis addere, fies redundans : si libertati, fies petulans : si iocis, fies scurrilis : si compositioni, fies pro oratore cantor. Itaque fit, ut si Tullium æquare studeas, pericliteris, ne hoc ipso peius dicas. ~~Est~~. Habet obtrektor, in quo maledicta sua copiose effundat. Prope esse putat, ut istis iniustis Ciceroni notis territa iuuentus, Ciceronem uelut deformem fugiat, ut Tullium tot maculis contaminatum negligat, ut periculi plenam Ciceronis imitationem reſciat, ut uiam flectat, & studium suum omne in nugas conferat, ut pro orationibus Ciceronis, Querimoniam pacis legat : ut Ciceronis diuinitatem fastidiat, & nescio quas Colloquiorum, Adagiorum, Encomiorum quisquilias tricasque recipiat. At hoc stupidis suadebit, recte institutos à Cicerone non auellet. Periculi nihil habet illius imitatio, neque hoc est timendum, ne, si illum exprimere, æquare, uincere contendamus, tum aut redundantes aut petulantes, aut scurriles simus. Illius copiae, libertati, iocis, compositioni nihil addemus, cui nihil addi potest, sed copia, iocis, compositione rectè & peritè, ut ille, utemur, hoc tantum Ciceronem uincemus, si id assequemur, ut illi pares, non illo inferiores uideamur. MOR. Est alius scrupulus, qui magis urget animum, si non grauaberis

ris audire. An censes ullum hominem eloquentis nomen promereri, qui non dicat aptè? Nequaquam: quandoquidem hæc præcipua uirtus est oratoris, appositè dicere. Verùm illud appositum, unde perpenditur, non ne partim à rebus, de quibus uerba fiunt: partim à personis, tum dicentium, tum audientium: partim à loco, tempore, reliquisq; circumstantijs. Itaque non erit Ciceronianus, si quis in theatro differat de Stoicorum paradoxis, deq; Chrysippeis argutijs: aut apud Arcopagitas in capitis discrimine lalcuiat facetijs: aut de re culinaria, uerbis ac figuris tragicorum loquatur. Iste nihilominus ridiculus erit orator, quàm si quis in tragico cultu saltet Atellanas: aut feli, quod est in prouerbijs, inducat crocoton, simiæ purpurā, Bacchum aut Sardanapalū leonis exuuio, & claua exornet Herculis. Nihil enim laudis meretur quamlibet per se magnificū, si sit ineptū. Nec M. Tullius, q suo seculo dixit optimè, dixisset optimè, si ætate Catonis Censorij, Scipionis, aut Ennij, simili modo fuisset locutus. Nō tulissent priscorū aures cōptū illud & numerosum dictionis genus, nimirum horridioribus assuetæ. Nam istorum oratio moribus illorum temporum congruebat. Oratio quasi uestis est rerum. Vestis autem, quæ decora est puero, non decet senem: nec, quæ foeminæ congruit, conueniret uiro: nec, quæ decet in nuptijs, deceret in funere: nec, quæ laudi dabatur olim ante annos centum, nunc

probaretur. Contemplare in picturis, non admodū uetustis, fortassis ante annos sexaginta editis, cultum muliercularum aulicarum ac procerum, quo si quis nunc prodeat in publicum, futurum sit ut putribus malis à pueris ac morionibus lapidetur. Quis enim nunc ferat in honestis matronis cornua, pyramides, metasq; prælongas in uertice prominentes, frontes ac tempora pilis arte uulsis glabra ad medium propè cranium: in uiris pileorum thoros cum ingenti cauda pensili, oras uestium insectas, thoros in humeris tumentes, cæsariem duobus digitis supra aures derasam, uestem longe breuiorem, quàm ut ad genua porrigatur, uix pudenda tegentem, calceos rostris in immensum porrectis, catenam argenteam à genu ad talum reuinctam? Nec illis temporibus minus prodigiosus fuisset cultus, qui nunc habetur honestissimus. Da nunc, si libet, Apellem ex pictoribus: qui suæ ætatis & deos & homines optime pingere solitus est, si quo fato rediret in hoc seculum, & tales pingeret Gallos, aut Germanos, quales olim pinxit Græcos, tales Monarchas, qualem olim pinxit Alexandrum, cū hodie tales non sint, non ne diceretur male pinxisse? Si tali habitu pingeret quis deum patrē, quali pinxit olim Iouem: tali specie Christi, quali tum pingebat Apollinē, num pbares tabulā? Quid, si quis uirginē matrē hodie sic exprimeret, quēadmodū Apelles olim effigiarat Dianā? Et si quis
templa

templa nostra talibus ornaret simulacris, qualibus olim Lyſippus ornauit phana deorū, num hunc dices Lyſippo ſimilē? VIL. Quorſum hæc, niſi ut ſuo in Longolium odio Eraſmus obſequatur? niſi ut illum ineptē minimeq; appoſitē cauſam dixiſſe probet? ſicq; oratoris nomine ſpoliet? uiri iudicio carentis fama contaminet? Ingenio nemo eſt tam ſtupido, qui ſummā primāq; oratoris uirtutem eſſe neſciat, apte appoſiteq; dicere, ſed nec ille dubitat, uerba rebus ſeruire, quæ non cum rerum ſtatu mutantur, ſed ad res & occidentes, & renaſcentes apte ſemper appoſiteq; accommodari poſſunt: niſi forte Eraſmus (ut antiquitatem aſpernatur, & nouitatis cupidus eſt) nouam linguæ Latinæ formam induci uelit, & antiquum ſermonem repudiari. Iudicio acri orator, & prudens, non in theatro de Stoicorum paradoxis diſputabit, neque in capitis diſcrimine facetijs laſciuiet, nec de re culinaria uerbis ac figuris Tragicorum loquetur, nec Sardanapalum leonis exuuio, aut Herculis claua ornabit: omnia rebus, perſonis, tempori, & loco apta conuenientiaq; obſeruabit, quod ut aſſequi & exequi poſſit, iuuat mirum in modum Ciceronis lectio, atque imitatio: qui ſi ætate Catonis Scipionisq; fuiſſet, aut ſi hoc tempore uiueret, dixiſſet apte tum ille quidem, nuncq; etiam appoſitē diceret, iſdem prorſus uerbis, quibus ſua ætate dixit. Tuliſſent & Catonis & Scipionis aures comptū illud & numeroſum dictionis genus, tametſi horridioribus

dioribus affuetæ horridiora reieciſſent, ſplendidiora politioraꝗq; admiſiſſent: nos omnia diuinè dicentem oratorem miraremur. Rem noſtri temporis quamlibet, puris illis Romanorum uerbis, aut ſuaderet, aut diſſuaderet. Orationē uero uesti cōpara. An in ueste cōficiēda uariatur neceſſario pannus? Nihil certe minus. Pannum eundem ſemper in alias atq; alias formas ſcindit cōſuitꝗq; ſartor. Ita in oratione conſtrueda, eadē ſemper, nec ullo tempore, aut ætate immutata linguæ Latinæ uerba ad rem noſtram accōmodamus, ſentētiās uariamus. Non dabo hoc autē, ut cultus pro diuerſis hominum ſtudijs & luxu quotānis immutatur, ſic uerba ſubinde uariari: concedā tantum, ſpeciēm orationi pro re præſenti adiſci. Fuerit cultus ante honeſtiſſimus, qui noſtris temporibus prodigioſus haberetur. Sane quæ elegantia erant & uenusta tempore Ciceronis uerba, dicendiꝗq; modus pulcher, noſtra ætate nihilominus elegans eſt, & uenustus, & pulcher. Sed loquacitati Eraſmi dum altera parte reſpondi, altera impudentius garrit. Si Gallos (inquit) tales pingeret, quales olim Græcos Apelles pinxit, aut ſi quis tali habitu deum patrem pingeret, quali pictus eſt olim Iupiter, num probaremus tabulam? Digna certè loquaci quæſtio. Græcos, ut temporibus illis, Apelles pinxit, Gallos, ſi uiueret, & neceſſe eſſet, ut his temporibus, picturus, & formam rei propoſitæ expreſſurus, neque quiſquam eſt, qui deum patrem, ut Iouem pingeret: Illi canities eſt,
barba

barba promissa, plena annis facies & rugosa, columbus super caput uolitans: hic ætate florenti pingitur, sceptrum gerēs, quo fulmina iaculatur, aliquādo inter diuos accumbens, nectar sorbillans, Ganymedem suauians, nutu terram concutiens, Mercurio mandata dans, aut ad Argum occęcandū, aut Ledam, Semelem uel salutandam, aut ad Amphytrionē, ne cum Alcmena in opere deprehēdereē, obseruādum. Quis tamen, si quid sit pingēdum album, si quid nigrum, si quid flauum, si quid cœruleum, pictori uulgatos colores omittendos, & nouos quærendos putat? Iisdem coloribus utitur pictor, artem solū & lineamentorum ductus ad simulacrum attemperat, quo uel Iouem, uel deum patrem, uel Christū, uel uirginē matrem exprimere nititur. Eodem modo si quis Latine Græce uel scribet, nō aliū sermonem, quā quo uel Romæ, uel Athenis utebātur, assumet, nec eam obrē minus aptē, aut appositē tum dicet, tum scribet, modo arte perficiat, ut in re ipsa nihil sit uel intra, uel extra, uel supra, uel contra rem. In quo Ciceronis & uerba & artem planē imitari licebit. MOR. Quid uis detur præsens seculi status, cum eorum temp orū oratione congruere, quibus uiuit ac dixit Cicero? cum sit in diuersum mutata religio, imperium, magistratus, respub. leges, mores, studia, ipsa hominum facies, denique quid non? Quid igitur frontis habeat ille, qui à nobis exigit, ut per omnia Ciceronis more dicamus? Reddat is nobis prius Romam illam, quæ

fuit olim, reddat Senatū & curiam, Patres Conscriptos, equestrem ordinem, populum in tribus & Centurias digestum: reddat augurum & aruspicum collegia: Pontifices maximos, flamines, & uestales, ædiles, prætores, tribunos plebis, consules, dictatores, Cæsares, Comitia, leges, senatus consulta, plebiscita, statuas, ouationes, supplicationes, phana, delubra, puluinaria, sacrorū ritus, deos deasq̃, Capitolum, & ignem sacrum: reddat prouincias, colonias, municipia, & socios urbis rerum dominæ. Porro quum undiquaq̃ tota rerum humanarum scæna inuersa sit, quis hodie potest apte dicere, nisi multum. Ciceroni dissimilis: Adeo mihi uidetur res ipsa clamitare, neminem posse benedicere, nisi prudens recedat ab exemplo Ciceronis. Quocunq̃ te uertas, uideas mutata omnia, in alio stamus proscænio, aliud conspiciamus theatrum, imò mundum alium. Quid facias? Christiano tibi dicendum est apud Christianos de religione Christiana: num ut aptè dicas, imaginabere te uiuere ætate Ciceronis: & in frequēte senatu apud Patres Cōscriptos in arce Tarpeia dicere, & ex orationibus, quas in senatu dixit Cicero, uoculas aliquot, figuras, & numeros emendicabis? Habenda est concio apud promiscuam multitudinem, in qua sunt & uirgines, & uxores & uiduæ: Dicendum est de laude ieiunij, de pœnitentia, de fructu orandi, de utilitate elemosynarū, de castitate matrimonij, de contemptu rerum fluxarum, de studio literarum diuinarum,

rum, quid hîc opitulabitur tibi Ciceronis eloquētiā? Cui quemadmodum res, de quibus dicendum est, erant ignotæ: ita non potuerunt usitata esse uocabula, quæ post illum noua cū rebus nouis exorta sunt. An non frigidus orator crit, qui ad has materias uoluti pannos Ciceroni detractos alluat? V I L L. Ciceroni qui studeat, & ea tractare uelit, non pannos Ciceroni detractos consuet, sed Ciceronis lectione, comparata tum splendida uerborum copia, tum scribendi forma elegantiore & uenustiore facta, ornatè, splendide, copiose, uarie, distinctè & dicet, & scribet, quæ uel ~~multa~~ ~~et~~ ~~similis~~ similis, Adagiorum centonibus implicabit, atque inuoluet. At mutatus est temporum status, mutata in diuersum religio, imperium, magistratus, respub. leges, mores, studia. Ciceroniā nē ut dicamus, reddatur prius Roma necesse est, cum suo senatu & curia, cum patribus conscriptis, cum equestri ordine, cum populo in tribus & centurias digesto. His ne, More, minutulis uocibus & nominibus constat Ciceronis eloquentia? An ob hæc tantum uerba omnibus in dicendo præstitit? An his tantum dictionibus lingua Latina continetur? Pluribus non repetam, quæ satis à me antea disputata sunt, nec, ut ~~faciā~~ faciā, qui ut libri sui nugis & loquacitate inturgescāt, eadem millies infercit atq; inculcat. Itaque quod ad hanc rem pertinet, à me sic semel habeto. Nihil est, quod ~~obijciat~~ obijciat, mutata esse omnia, in alio nos esse proscenio, aliud nos spectare

z theat

theatrum, in hac rerum immutatione, si Christiano dicendum est apud Christianos de religione Christiana, non, ut aptè dicat, necessario imaginabitur se uiuere ætate Ciceronis, & frequente senatu apud Patres Conscriptos in arce Tarpeia dicere, sed primum, qua diues erit, & bene instructus, egregiam uerborum sententiarumque Ciceronianarum, id est, uocum purissimarum & splendidissimarum, atque sententiarum graui & sapienti oratore dignarum, reique congruentium suppellectilem exponet: quæ si curta sit in eo genere, & uerba rei Christianæ apta desint, tum, quæ consuetudine diuturna trita sunt, & doctore iudicio non impura, libere aliunde assumet, atque sententiarum pondus ex facris literis corrogabit: sicque & Ciceronianè & Christianè dicet, neque ridiculus aut ineptus erit, siue de laude ieiunij, siue de poenitentia, siue de fructu orandi, siue de utilitate eleemosynarum, siue de sanctitate matrimonij, siue de contemptu rerum fluxarum, siue de diuinarum literarum studio orationem habeat: Quæ quoniam Ciceronianè tractare non potuit, Ciceronianè tractari non posse putat. Sed quo hæc modo Ciceronianè tractasset, temporum nostrorum nouis uocibus addicta, qui soluta alia & libera Ciceronianè non scripsit: tanto uir in eloquentes odio, tanto male dicendi studio ardens, ut, quæ nec assecutus est, nec præstitit, ea eximie præstaret aut criminetur, aut perpetuo rideat, nec ullam orationis formam probet, nisi prouerbiorum farragine, & exemplorum cumulo extrusctam.

etiam. Quousq; uerò affluere mendacijs senem patiemur? Hanc unam habet garriendi materiã, Ciceronis quòd simios esse dicat, quibus sordent uerba omnia, nisi ex Cicerone deprompta: qui religionis nostræ uoces, ut putidas & squallidas aspernãtur. Modum iam faciat garriendi senex: nominet, proferat, indicet Ciceronianũ quendã tanta in uerbis aut sollicitudine aut religione, qui si alias uoces non reperiatur, uel ad cultũ nostrum maxime appositas esse sciat, ab eis religiose temperet aut abstineat: tum cum illo ridebimus, tum Ciceronianos conuitijs, ut ille, lacerabimus. Sed cùm sciant, qui Ciceronem imitãtur, multa ab eo in libris rhetoricis & philosophicis ficta atque inducta uerba Latinis antea inaudita, cùm etiã apud eum reperiant beatitatem, beatitudinẽ, finem bonorũ, uisum, uisorem, speciem, propositũ, reiectum, occupationẽ, contentionem, superlationẽ, complexionẽ, traductionẽ, frequentationẽ, licentiã, gradationẽ, statum, constitutionem, indicationem, continens, firmamentũ, inductionẽ, propositum, aggressionẽ, insinuationẽ, acclamationem, & sexcenta alia uel peregrina planè, uel in eam significationem detorta, quam Pop. Rom. non agnoscebat, an uerisimile est, illos Ciceronis exẽplo, quæ linguæ Latine deesse uidet, aliud mutuari dubitare? Non dubitãt mehercule, neq; uoces Christianas horrent: quod genus sunt, ecclesia, apostolus, episcopus, catholicus, orthodoxus, hæreticus, schisma, charisma, dogma, chrisma, Christus, baptizo, paracles

z z tus, eu

tus, euangelium, euāgelizare, euangelista, profelitus, cathecumenus, exorcismus, eucharistia, symbolum, anathema. Hæc & his similia, si quādo opus erit, usurpabunt. Veruntamē, an huiusmodi uocibus necessario in orationē nostrā immigrātibus, uel ornatiores, uel sordidiores sumus? An his continet Ciceroniana dicēdi forma? Aliud est, quod à te quæsitū uelim, & dissolutū, si possis, quod te posse non spero. Finge Ciceronianū quempiam orationem de re Christiana habere apud promiscuam multitudinē, in qua sint uirgines, uxores, uiduæ, & curati melius sacerdotes, quā curātes, turba ut artium omnium, ita linguæ Latinæ ignara: an quod Christū sæpe nominet, an quod ecclesiam, fidem, & illas tuas uoces tertio quoq; uerbo repetat, rem ideo apertius explicabit: an magis delectabit: an acrius cōmouebit? Obstupeſcet utiq; imperita multitudo, neq; ob frequentem christianorū uerborum usum & inculcationē, christum charius aut iucundius amplexabitur. Quod si doctis & linguæ Latinæ nō uulgariter peritis scribat, ut doctis docti non indoctis scribunt, aut si coram eloquētibus & facūdis uiris de re christiana oret, ac pro ecclesia sacrā concionem, aut ciuitatē, aut remp. pro ethnico perduellem: pro hæresi, factionem: pro schismate, seditionē: pro fide christiana, christianā persuasionē: pro excōmunicatione, proscriptionē: pro excōmunicare, diris & igni interdicare: pro apostolis, legatos: pro Romano Pontifice, flaminē dialem: pro cōfessū Cardinalium, Patres

Patres Conscriptos : pro synodo generali. S. P. R.
 Reipub. Christianæ : pro Episcopis, Præsides pro
 uinciarum : pro electione Episcoporum , comitia:
 pro synodica constitutione, Senatusconsultum : pro
 Summo Pontifice , summum ciuitatis præfectum:
 pro Christo capite ecclesiæ, summum Reipub. Præsi-
 dem : pro diabolo, sycphantam : pro propheta, uas-
 tem, aut diuinum : pro prophetijs, oracula diuûm:
 pro baptismo, tincturam : pro Missa, uictimam : pro
 consecratione Corporis Dominici, Sacrosanctum pa-
 nificium : pro Eucharistia, sanctificum crustulum:
 pro Sacerdote, sacrificulum aut sacrorum antistitem:
 pro Diacono, mistam aut curionem : pro gratia Dei,
 numinis munificentiam : pro absolutione, manumissi-
 onem ponat : an doctos audientes, minus aut doces
 bit, aut oblectabit, aut commouebit. Verba propria
 non esse scient & pulchre translata dicent, allusiones
 laudabunt, remq; tam eximijs uerborum ornamen-
 tis illustratam illuminatamq; mirabuntur. M O R.
 Paganitas est Villanouane, paganitas est, quæ ista
 persuadet auribus atque animis nostris. Titulo dun-
 taxat sumus Christiani, corpus aqua sacra tinctum
 est, sed illota mens est : frons cruce signata est, animus
 crucem execratur : Iesum ore profitemur, sed Iouem
 optimum maximum & Romulum gestamus in pe-
 ctore. Alioqui si uere, quod dicimur, essemus, quod
 eandem sub sole nomen oportuit uel cogitationibus,
 uel auribus nostris esse iucundius nomine Iesu : per
 quem

quem à tantis malis erepti, cuius gratuita benignitate ad tantam dignitatem uocamur, ad æternam felicitatem inuitamur: ad cuius mentionem contremiscunt impij spiritus, generis humani plusquàm capitales hostes: ceruices ac genua submittunt æthereæ mentes. Quod tam efficax est, ut ad huius inuocationem fugiant dæmones, cedant immedicabiles morbi, reuiuiscant mortui: tam blandum & amicum, ut nulla sit tam acerba calamitas, quin magno solatio leniatur, si Iesum ex animo nomines. Et hoc nomine persuademus nobis sordidari nitorem orationis, cum Annibal, & Camillus mera sint orationis lumina: Ejiciamus, reuellamus, profligemus ex animo paganitatem hanc, pectus uere Christianum ad lectionem adferamus, & uidebimus lucidissimam stellam additam orationi, quoties Iesu Christi nomen fuerit insertum: eximiam accessisse gemmam, quoties Virginis matris, quoties Pauli, Petricq; nomen admiscebitur: multum decoris accessisse, quoties ex diuinarum literarum adytis, quoties è spiritus sancti lecythis ac myrothecijs, sententiam uiderimus interiectam. Mihi crede, sub Ciceroniani nominis uelo, per speciosi tituli prætextum, insidiæ tenduntur simplicibus, & ad fraudem idoneis adolescentibus. Paganitatem profiteri non audemus, Ciceroniani cognomen obtendimus. V I L L. Quis sic loquentem Erasmus audiens, Erasmus esse existimet? ~~quis qd p dicit~~
~~Verba dicitur potius idcirco dicitur~~ boan-
 tem

tem, tonantem arbitretur? sed fallor: Erasmi omnes agnoscent, qui Erasmi consuetudinem non ignotam habent, nulla in re, quàm in theologico sermone loquacioris, aut insolentius garrientis. Subito è recta deflectit, & se in suæ dicacitatis campum rapit: ubi Longolio detraxit, ubi Ciceroni, quas potuit, notas imposuit, ubi nos ab illius lectione reuocare conatus est, nec se quicquam profecisse uidet, tergiuersatur nō incallide, Ciceronis imitationem, paganitatem uocat: titulo duntaxat eos esse Christianos clamat, Iesum ore profiteri, sed Iouem optimum maximum, & Romulum in pectore gestare scribit, qui Cicerone oblectantur: tum titillante garrulitatis uoluptate, sese in nominis Iesu laudatione fundit, illius uim explicat, illud multis dignationibus cumulat, nemini ignotis quidem illis, sed in hoc tantum ab eo exaggeratis, ut liberius profususq; garriret, ut nos sua loquacitate obtunderet. Probatum est à nobis proxime minutulis istis uocibus nihil arti dicendi aut addi posse, aut detrahi. Quid plura in eam rem adducam? offert se aliud, in quo paulum immorandum est, ut Erasmi maledicta reprimamus, ut tantam conuitiandi libidinem compescamus. Paganitas est (inquit) quæ Ciceronis imitationem suadet, Paganitatem profiteri non audemus, Ciceronianum nomen obtendimus. Inaudita ista Bataui graculi garrulitas, perniciosum istud Bataui teorpionis uirus, mentem mihi penè adimit, facitq; ut ~~utrumque~~ ~~placuisse~~ ~~nesciam~~, an tam maledict

Sadoletus.
Bembus.

cum hominem à natura potuisse procreari, an à nobis uel cum fauore & beneuolentia tam diu tolerari. Paganitatem Ciceronianis obijcit. Te in paganitatis suspicionem uocat Sadolete, qui Ciceronem tam pulchre refers. Te eadem perstringit Bembe, qui totus Ciceroni hæres. Vos sceleris omnium teterrimi insimulat: uobis labem foedissimā turpissimamq; aspergit, tametsi uos amare, colere, obseruareq; simulet, nemini ingenuè amicus, omniū laudi inimicus. Prodeat in apertum tua Sadolete integritas, atque innocentia. Eluceant laudati ab omnibus tui Bembe mores, & uita nullis flagitijs inquinata. an in uobis Ciceronis affectus redolebit paganitas? an in uobis religionis contemptum olfaciet ~~uobis~~. Hæc uobis suspitio nullo modo timenda est, quæ si in uos cadere posset, amicorum existimationem tueretur Erasmus, non læderet, uir amoris, ut præsert, in uos multi. At enim inuidia & odio in Longolium flagrās ad quem eloquentiæ laude accedere non potuit, cum religionis nomine superare conatur. Illum paganitatē professum scribit, sub Ciceroniani nominis uelo. Longolio qui familiariter usi sunt, simile nullum de Longolio testimonium dicent, omnia sancta & religiosa de illo loquentur, bene moratum referent. Ac quoniam quid quisque de re quauis sentiat, facile aut uultu aut sermone dissimulatur, scriptisq; nos sæpius aperimus: quæ ~~scripsit~~ edidit, quæq; à Longolio relicta sunt, iudicibus non ignaris legantur, diligenter

diligenter ponderentur, seu erè examinentur. Nemo Erasmi stilum mollem, muliebrem, puerilem, absurdum, absonum, perturbatum, discrepantem, præposterum, impolitum, incomptum, dissolutum abiectumq; non iudicabit. Longolium planè eloquētem affirmabunt omnes, illiq; non dissimilem dicent, in cuius scriptis est studiosè & multum uolutatus. Verum nihil hæc ad religionis specimē. Altera discutiantur parte ~~et~~ commentationes. Quibus, ut debet, displicet effrenata Lutheri audacia: quibus inuisa est Lutheri secta, Lutherum ipsum sub Erasmi scriptis latere, Erasmus totum Lutheri uenenum exhalare asserent, neq; alia causa dissimulanter & dubiè pleraq; locutiū illum, nisi ut, qua inuidia Lutherum oneratum uidebat, eam sua dissimulatione & dubio anticipiq; in omnibus sermone fugeret, consulcretq; suarum lucubrationum immortalitati, quas à plurimis, sed à Gallis maximè, reiectum atq; explosum iri prospiciebat, si eadem, quæ Lutherus, scripsisset. Sua nobis dicacitate & scurrilitate illudi posse sperauit, eaq; per dissimulationis cuniculos induci, quæ aperta reiecturi uidebamus. Ista est Gallorum, Italicorum, Britannorumq; de Erasmo sententia atque opinio. Apud Germanos, & Lutheri partibus studentes, eo est numero, quo scurra, ad inepta audax, pugna, di-

Quare Erasmus non aperte scripsit, ut Lutherus.

ut audit Erasmus apud suos.

A leuiss

leuissimam aut dicacitatis, aut nimiae audaciae, aut insolentiae, aut erroris, aut impij animi suspensionem commoueret: Perduellionis reus sese Romae defendit tanta modestia, tanta prudentia, ut accusatorum criminationes tantum dissoluerit, neminem sua oratione irritarit. Causam in Lutheranos dixit: quam forte obrem illum paganitatis accusat Erasmus, ei quod charam seditiosorum nationem oppugnet. Hoc, credo, nomine paganitatis labem Longolio inurit. Sed litem hanc suam faciat: eam alij æstimabunt Erasmo saniores & religiosiores. Ad hæc, quatuor epistolarum libros reliquit, ubi quid impium? quid paganitati proximum? quid non christianum? Vocem unam, More, uel literam ex Longolij scriptis profer, quo inanem Erasmi tui accusationem adiuues atque corroborea: prostant, uæneunt, omnibus nota sunt. Grammaticis Erasmi tui mancipijs da negotium, ut Longolium perlegant, omnia calumnientur, ut Erasmus assententur: quid tandem renunciaturos putas? Id sane, quod constat, Longolium nulla paganitatis macula contaminatum, christianeque omnia loqui & scribere: impie & inique flagitij ab Erasmo insimulari, à quo abest omnium maxime. Paganitatis uero & impietatis plenus est, qui probum & uere christianum uirum in paganitatis suspensionem adducere contendit. Nominis Iesu suauitatem suauietur, Virginis matris simulacrum amplexetur: Petri, Pauli imaginem exosculetur: apostolorum reliquias ueneretur,

retur: ligno crucis, & crucifixo hæreat: sacris signis
& altiorum statuis bibliothecam suam ornet: de theologia perpetuo garriat Erasmus, eum animo esse nimè omnium christiano, & omnium maximè impio, inuido, iniquo, sceleratoq; credam, qui tanto pere omnibus detrahere, & cōuitia facere gestiatur, qui usque adeo mendacijs oblectetur, qui tam insolenter petulans sit & dicax, qui defunctorum famam non obsecuret solum, sed impiorum etiam nomen eis impingat. At his maledictis Longolius non inuidiosus est: detestabilis est, imbecillis, caducus Erasmi conatus. **M O.** Quis sit, ut, quibus Longolium lædi suspicere, ea durius accipias, & tam uehementer mouearis? **V I L L.** Amici existimationem & laudem deprimi mihi non tam graue est, quanquam sit grauissimum, quàm illius mores ita ab Erasmo culpari, ut non solum uitæ innocentiam adimat, sed obiecto religionis contemptu, religionis fama clarum, inique maculet. Impertunum est hoc etiam & indignum, ubi iuuentutem ridicule proposito uitæ periculo, ualitudinis perturbatione, ætatis dispendio, à Ciceronis imitatione reuocari non posse perspicit, illius lectione paganitatem contrahi scribere. Quis ad hanc impudentiam non cōmoueatur? quis illum non exagitet? quis conuicijs nō obruat? Agat uero, insaniat, inuidia & dolore disrumpatur, garriat, balbutiat, deblateret, repuerascatur, desipiat, eadem iterum atque iterum repetat, ante dicta sæpius inculcet, Ciceronis imitationem nouum
A 2 lepræ

Epilogus.

lepræ genus uocet, à Cicerone oratoris perfecti nos
 men abiudicet. Ciceronem ipsum multis ~~uicibus~~ ~~uicibus~~
 cis, uocalium hiatu deformem, redundantem, dissolu
 tum, elumbem, gloriæ nimum appetentem, suarum
 laudum iactantio rem, inconstantem, fide nulla, pa
 rum in quibusdam Ciceronianum, infelicitè uersus
 Græcos conuertere, mancum, mutilum, lacerum esse
 dicat: Ciceronem inimitabilem, Ciceronis nullum ho
 die esse usum uociferetur: Ciceronianorum tardita
 tem in componendo rideat, Ciceronianos omni
 parte laceret, Ciceronianos omnibus modis insectes
 tur: quid aliud, quàm senis furias maniasq; securi
 spectabimus? quid aliud, quàm senis balbutie gar
 rulitateq; ut scurræ dicacitate, oblectabimur? Cice
 ronis diuinitatem nihilominus suspiciemus, illi nos
 nihilominus dedemus, nihilominus quisque cursum
 tenebit coeptum, ac Ciceroni similis fieri auebit, &
 contēdet. Tu, quod reliquum est ex ~~Erasmi~~ ~~Erasmi~~ ineptijs,
 recita. M O R. Restat tantum, ut, quæ fert tum de anti
 quis, tum de nostræ uel paulo remotioris ætatis scri
 ptoribus iudicia, si libet, audias. V I L. Isto labore sus
 per sede: facile per me in memoriã reuoco, quæ ~~Eras~~
~~mus~~ iudicia, de antiquis scriptoribus, & æqualibus
 nostris tulit. Etenim locum recognosco, q me, quū datū
 à te dialogū percurrerem, plus cæteris offendit, quicq;
 plane ~~Erasmi~~ insolentiã, obtrectandiq; cupiditatē indi
 cauit. Nō satis exactè Quintilianus de antiq; iudica
 rat, nisi accessisset ~~De Erasmi~~ ~~De Erasmi~~ Luculens
 ti &

ti & audacis scriptoris, Theologi uerbosi, ~~et~~ ~~sententia~~ ~~qui~~ ~~Ciceronem~~ ~~cane~~ ~~peius~~ ~~&~~ ~~angue~~ ~~odit~~, qui Ciceronem aspernatur, qui à Ciceronis lectione semper abhorruit, an antiqui Ciceronem referant, tanquam perpetuo in Cicerone uersatus, expendit. Patere hoc loco illius insolentiam quis negarit? Patuit mox clarius obtrectandi cupiditas, cum se ad recentiores scriptores contulit. Nihil attinebat Laurentij Vallæ, Poggij, Hermolai Barbari, Angeli Politiani, Georgij Trapezontij, Theodori Gazæ, Georgij Merulæ, Pomponij Læti, Philippi Beroaldi, Petri Criniti, Antonij Sabellici, Baptistæ Egnatij seculum uelut trutina examinare, & uirorum tam doctorum atque eruditorum ingenium literasq; audaci iudicio perpendere atque æstimare. Magni sunt & immortalitate digni, licet Ciceronis imitatione non celebres, ad quam si se totos composuissent, maiorem retulissent omnino laudem: quod ab ea res moti sunt, non ideo abijciuntur aut negliguntur à doctis. Ad æquales nostros propero. Quid uiuorum scripta discussit, quid de ijs suam tulit sententiam, nisi ut nonnullis assentaretur, alijs inimicè detraheret? Laudat, fateor, ut par est, & minus forte, quàm eorum est doctrina atque eloquentia, Iacobum Sadoletum, Petrum Bembum, Ioannem Pinum, Nicolaum Beraldum, Lazarum Bayfium, Germanum Brixium, Franciscum Deloinum. Eos omnes modicè: quos amplius & magnè sententia laudari nemo ægre tulisset.

Desine mirari quare post ponat

Budæum Badio, plus fauet ille pari.

Hoc te fateri oportet, si obrectationis suspitione
 Erasmus liberare cupias, nisi forte obligatione ad-
 ductum eum id fecisse dicas, quod Lutetiæ à Badio
 splendide & laute, cum illic ageret, aliquando acce-
 ptus, illum re aliqua remunerare necesse habebat: ne-
 que fuisse, quo cumulatius obsonatori gratiam refer-
 ret, quàm si grammaticum eo eruditionis gradu con-
 stitueret, in quo stat Budæus summo omnium applau-
 su atque assensione: cui non soli, quæ potuit, detra-
 xit ~~verum~~, sed de Gallorum semper ingenijs ubiq;
 male sensit, & cum tulit occasio, datusq; est iudicandi
 locus, iniquè & maleuolè scripsit. Verùm habet
 Gallia, qui ~~verum~~ nulla cedant, facileq; illius im-
 pressiones sustineât, & accepta uulnera, si uelint, ulci-
 fcantur, uberrimis ingenijs affluentes, ac quantum sa-
 tis est ad scurræ dicacitatem reprimendam, doctrina
 & eloquentia instructi. M O R. Hactenus quæta fuit
 & sine stomacho nostra disputatio, tu uide, ne, quod
 inter nos à principio conuenit, à te modò negligatur,
 & ab instituto recedas, dum in ~~verum~~ incenderis. Si
 quid superest, id psequamur potius. V I L. Superest
 plane nihil, nisi id, qd & tibi & oïbus persuasum uolui,
 unū nobis sectandū atq; imitandū Ciceronē, si uerbis
 usitatis & pprie demonstratibus significatibusq; nō
 peregrinū sonantibus aut olentibus capimur, si delectū
 amamus, & rusticā insolentiā asperitatemq; fugimus,

A 4 si pu

si putidam uocum turbā uitare cupimus : si orationis lumen, non obscuritatem & tenebras : si sili uenustas-
tem, nō rusticitatē: si dicendi genus nitidum, nō horri-
dum: si plenum, non ieiunum: si distinctum & facile,
nō implicatū : si uarium, non per omnia simile: si gras-
ue, non inane, & abiectum: si pressum, æquabile, & les-
ne, non uastū aut hiulcum quærimus. Itaq; hoc uides-
rint rectē instituti adolescentes, an meo utātur consi-
lio, an ~~per~~ per omnes scriptores uagandum mo-
nentem audiant. Nos uero iam surgamus, quoniam
probe animum relaxauimus, & cœnæ tēpus instat.

Annuit Morus, idq; eo libentius, ut se domi cyra-
ret, & quiesceret, ob uix molestiam & equitationē ali-
quantum perturbatus. Ea fuit nostra post meridiem
exercitatio. Tum in urbem reuersi, Villanouani iussu
Morum domum deduximus, & misi ab illo facti, do-
mum quoq; abiimus. Non tantus meus fuit in his
scribendis labor, mi Langiace, quāta mihi est cōstan-
tia & animi grauitate opus, ad excipiēda senis Bataui
cōuitia, si morem suum seruet, & sua in nos loquacia
tate utatur. Excādescet, combibones inducet, qui crua-
da plurima & male concocta in ~~uocum~~ uocant.
Pungi grauitè feret, qui omnes strenuè lacerauit: suū
in literis sacris studiū & operā rideri grauitè patiet-
huc illucq; ab eo cōmeabunt epistolæ, querelarum &
expostulationū pleng. Frēdebit, minabit, succēsebit,
omnia detorquebit, & calūniabitur, laceffet. Quid me
facturū putas: conijcere te malo, q̄ hīc à me aperiri.

Errata.

- Pag. 18. lin. 14. lege, numero
 pag. 19. lin. 22. lege, mediaſtūmis
 pag. 29. lin. 2. lege, peritecꝑ & ſcienter
 pag. ead. lin. 5. lege, alluſionem
 pag. 38. lin. 3. lege, quos
 pag. 40. lin. 19. lege, furat
 pag. 42. lin. ult. lege, ſcobas
 pag. 48. lin. 18. lege, non ad quaſtum ſcribendū fuit
 pag. 51. lin. 22. lege, uideor
 pag. 66. lin. 22. lege, à propoſito
 pag. 70. lin. 14. deme tacitus, aut ſilentio, & ut uoles,
 legito, uel ſilentio prætereā, uel tacitus præteream
 pag. 94. lin. 14. lege, odioſæ
 pag. 95. lin. 19. lege, imitationis
 pag. 96. lin. 19. lege, illius
 pag. 103. lin. 25. lege obſcœnitatem
 pag. 109. lin. 25. lege, quàm
 pag. 113. lin. 6. lege, anteaſtarem
 pag. 147. lin. 19. lege, progrediatur
 pag. 164. lin. 7. lege, quò aſpirauit
 pag. 165. lin. 16. lege, abductum.
 pag. 170. lin. 8. deme, V I L L.

THE HISTORY OF THE

MONASTERY OF

THE

OF

THE HISTORY OF THE MONASTERY OF THE

CHAPTER

THE HISTORY OF THE MONASTERY OF THE

125

~~Monocolon, ad Iacobum Rostagnum~~ IAMBICVM
monocolon, ad Iacobum Rostagnum
adolefcentem optimum, & ami-
cum fuauiffimum.

Sup. pag. 198. Naturam non minus nunc felicem & potentem ferendis
præclaris ingenijs, quàm quondam fuit: sed qui feliciter
nati sunt, aut uoluptate implicati, aut parentum auaritia ab
humanioribus studijs ad quæstuosas artes prima adolescen-
tia reuocati, aut laboris plus satis fugientes, aut paupertate,
& rerum inopia preffi, ad antiquorum laudem non aspi-
rant, iacentes ignobiles.

C A R M E N.

Efficeta non plus est, uel ingenijs inops
Natura, quàm quondam fuit, miracula
Dum rara quædam hominum, uelut superbiens
Sua potentia necnon inexhausto sinu,
Fundeat ultro: sed quibus feliciter
Nasci dat, & largitur amplè uiuidos
Acrescens sensus, atque non agrestem animum,
Aut plus satis molles liquefcunt, & fluunt
Luxu & uoluptate: aut patrum cupidine
Cæca, à bonis & fuauioribus studijs
Ignobiles trahuntur ad artes, simul

Vt pri

Vt prima tantum elementa uix norint bene:

Quo fit quidem ut, sicut lolio sterili nimis,
Lappisq; auenaq; enecatur lactea'
Seges, iuuentus sic cadat mox obruta.

Sunt, quos item terret labor, quo Palladis
Scandendus est mons, mons uia haud ita breui,
Die nec uno aut altero cuiuis patens.

Sunt, quos supellex curta, egestasq; opprimit
Et spiritus uetat per altum tollere.

Dirum malum, pestisq; egestas pessima,
Quæ spiritus uetat per altum tollere,

STEPH. DOLETVS, IACO
BO ROSTAGNO, S.



CONSVETVDINE magis & officio adductus, quàm quòd opus esse existimarem, id ad te literarum dedi. Itaque tantam meam in scribendo diligentiam sedulitatemq; & proba, & lauda, noui nihil à me in præsentia expecta: rumor enim quisquis hic increbruit, iam raucus factus est, neque, quod scribam, occurrit. Scæuam nostrum saluta meis uerbis diligenter, atq; illi insta, ut, quæ à me accepit de Imitatione Ciceroniana dialogum, eum quàm castigatissime excudendum à Gryphio curet. Meos Latinæ locutionis commentarios breui istuc mittam: qui ut characteribus elegantissimis excusi, & emendatissimis mi excant, dabis cum Scæua operam.

Vale. Lutetiæ,
pridie calendas Ianuarias.



EIVSDEM, AD EVNDEM, MO
nocolon iambicum archilochium.

CARMEN.

Id quod decenter factitant homines belli,
Vt, quod uolunt munus dare, illud omnino
Dent, quod sciunt illi futurum tum gratum,
Tum suaue, tum mirè expetitur, cui mittunt:
Hoc hercle nunc facio libens, & quod spero
Tibi futurum gratum & acceptum, dono:

Nam quem scio nullis capi donis tantum,
Quantum canoro carmine, & non infulso
Versu, saluto uersibus te Rostagne
Musarum alumne suauiorum Rostagne:
Ac id tibi precor sub hunc ineuntem annum,
Vt lætus æterna fruaris ætate,
Et omnia ex sententia tibi cedant.

Tu fac boni æqui consulas meum hoc munus,
Ac singulare exosculeris nostrum in te
Studium, & uoluntatem tibi usq; adeo addictam:

Vel, quod decenter factitant homines belli,
Pro literario meæ musæ dono

Mitte aureum non pondere leui, at ingenti.

Sic, quod decenter factitant homines belli,
Vt quod uolunt munus dare, illud omnino
Dent, quod sciunt illi futurum tum gratum,
Tum suaue, tum mirè expetitur, cui mittunt:
Hoc hercle tu facies, dabisq; tum gratum,
Tum dulce, & in primis mihi optatum munus.





